



Bodo and Dimasa Heritage Digital Archive



Title of the book: Khurang (2020)
Editor: Biswajyoti Barman

Photographed by: S Ningthoingambi
Singha
Location: Assam University, Silchar



KHURANG

Dimasa Sahitya Sabha Laihjab
Khaikhoga Jaih :: November, 2020



DIMASA SAHITYA SABHA
(Dimasa Lairidim Mel)
Dangjohmsgao



KAPILI TIRTHOHA DIGRUBA



2020 maithai March bdainha Langkhlangkroh (Panimur, Kapili Tirtho) ha digruba, rung jahng thanglaiba, mdai bauba odebasini photo. Haiba Hojai rogong Komoroakata nohlaini Gedemah Janmejy Longmailai.

KHURANG

Dimasa Sahitya Sabha Laihjab

VOL.VIII

Khaikhoga Jaih, November, 2020



Dimasa Sahitya Sabha
(Dimasa Lairidim Mel)
Dangjohmsgao, Haflong : 788819
Dima Hasao, Assam

Rehpsaikhusgao
Biswajyoti Barman

KHURANG (THE VOICE), A DIMASA SAHITYA SABHA JOURNAL
Vol. VIII. November, 2020

Edited and Compiled by Biswajyoti Barman

Published by Ringpendra Nunisa, General Secretary, Dimasa Sahitya Sabha,
H.Q. Haflong- 788819, Dima Hasao, Assam

© Dimasa Sahitya Sabha, Central Committee. All right reserved.

Khaikhoyah:

Ringpendra Nunisa, Danghojasgao, Dimasa Sahitya Sabha,
Khusi Bokhoh : Haflong - 788819, Dima Hasao, Assam

Rehpsaikhusgao :

Biswajyoti Barman

Courtesy :

Education Department,
Govt. of Assam, Dispur, Guwahati

Cover Page :

Waterfalls,

Langkhleng Khroh, Kapili Thirtho, Panimur, Dima Hasao

Cover page Photo by :

Zed Nunisa

Jurusandi Beseng :

Price : 150.00 (Rjasih gejer)
(Rupees one hundred fifty only)

Printed at :

SILCHAR SUNGRAPHICS

Premtala, Silchar-788001

KHURANG

Dimasa Sahitya Sabha Laihjab

Dihonga Jaih

Rehpsaikhuhojaraoni Johm, 2020

Biswajyoti Barman (Daolagajau), Kalijoy Sengyung, Jatiram Barman Bodo, Braja Gopal
Barman (Daolagajau), Nirmal Diphusa, Sunil Kumar Barman (Phonglo).

khuranglaihjab@gmail.com

Eboh laihjabni bauthai motamot gibin gibin buthu sosih rehpyahraoniseh. Eboni khilaihi
khaikhoyah, rehpsaikhusgao ba rehphojaraoni johm dayi niya.

Disclaimer : Views, facts and analysis expressed by the authors are their own and not
necessarily those of the editor or publisher.



RENLAIH

- * Rehpsaikhusgaoni Graujensong 05

Rehpjuh

- | | | |
|---|--------------------------------|----|
| * Kopili Thirthoni Jarimin | Babul Barman (Phonglo) | 07 |
| * Dembra Haphai | Kumud Chandra Bodo | 11 |
| * Hadam Guphu Maimuh Gisim | Jatindralal Thaosen | 16 |
| * Phatri`ni Grauthai | Nirmal Diphusa | 21 |
| * Thaimeser | Nirmal Difusa | 23 |
| * Dimasaraoni Laihrimin Hadaithaini Jarimin | Biswajyoti Barman (Daolagajau) | 28 |

Kharminsah Gdain

- | | | |
|---|-----------------------------|----|
| * Bithihase Julu Grengfase Sehngphong ? | Biswajit Barman (Maibangsa) | 42 |
| * Rihampha | Najendra Nunisa | 46 |

Khuhrgai Kharminsah

- | | | |
|-----------------------------------|--------------------------------|----|
| * Thoroga jahng Maogusani Kharmin | Mohanjoy Barman (Hojai) | 49 |
| * Phanthaoraja | Biswajyoti Barman (Daolagajau) | 57 |
| | Mohanjoy Barman (Hojai) | |

Japhunuthaisah

- | | | |
|-----------------|-------------------------|----|
| Nanah Gjauthaih | Deepak Barman (Gorlosa) | 62 |
|-----------------|-------------------------|----|

Thairili

- | | | |
|---------------------------|--|----|
| * Phanindra Kumar Gorlosa | | 65 |
| * Anupama Naiding | | 67 |

* Jyotiram Chorong	70
* Famiebar Barman (Gorlosa)	76
* Prafulla Barman (Thousen)	78
* Jatiram Barman (Bodo)	80
* Biswajyoti Barman (Daolagajau)	82

Rabindranathni Thaislaiyaba Rjabthai-Thairili :

Biswajyoti Barman (Daolagajau)	85
--------------------------------	----

Dimasa Laihsi Rehpyaraoni Saujarimin Songthe

* Sonaram Thaosen	89
* Nirupama Hagjer	91
* Jatindralal Thaosen	93
* Uttam Chand Barman (Hagjer)	96
* Anupama Naiding	99
* Vijayananda Barman (Khemprai)	101
* Kumud Chandra Bodo	104
* Phanindra Jahari	107
* Biswajyoti Barman (Daolagajau)	109

Dongsengyaba :

* Dimasa Kharmin Dongphayaba odeh Gibim jahngyaba Dimasa Kharmin Laihsi	113
* Duha Sohsiha Dimasa Sahitya Sabha Khaikhoyaba Laihsi	114

Rehpsaikhusgaoni Graojensong.....



Lamela jakhabo Khurang baigophaidu. Thikkhabo Khurang-ni khurang lodaonaikha. Odebani Khurangkhe bahsguginyarao khrangkhuginyarao nisi mriklailama nangkha. Rehpyahrao odehe phorisong phoriyahraose Khurang-ni khurang gibi. Odebani magrau grau Dimakhe srerao khasaodu bonsikhe Khurang bihladu, khainsuladu- smaukhulai khurangkhe jrulai. Khurangkhe jrubade jarni magrau grau Dimakhe jruba, khasaubalaise.

Khuranga rehpsong rehpyahraokhe khlimladu odehe lugu lugu dekhusgangrao, jalairao, naga-mathla khribkhebo jmaladu 'phailai thaisi thikkhabo nisi Khuranga rehplai, magrau hadailai'. Gdainrao rehpyahrao rehpthaini lugu jarni boyos graude bisilai rakha rehphalaithing. Olai thikkhala jing saikhuba laidaonang.

Dangdao blaidao japhalangbalai, rehpdao blaidao japhalang phudu. Odebani eboh Khurang laihjabha gdainraobo laihrimin rehph hadai phunang. Gdainraokhe hamside thairili, thaisari, kharminsa odebasi rehmane thihladu. Eboni lugu khrib rehpyahraokhe thihladu nisi rehpthai jmabakhe jonhi dongma nangya. Rehpsonghi donglai odehe jini email address-ha rehpthai haisonghi donglai odehe jing dangblau jakhade jingkhebo sibringha, jingthanebo khah-bolmah jruha.



Khurang duha jahng khaikhoga jaih. Eboha jihng duha sosiha grau Dima jahng sining givin givin rehpthai rehpuh, kharminsah, japhnuthaisah, thairili odebasi khaikhoba. Thihkhabo jajaolaidu thihkhade yahonni nising Khuranga English graujahng research article (essay) rijanangthi jihng baulaidu. Thihkhabo rehpuhbuthu Dimasa jadini grau, laihrimin, yawairimin, jarimin (language, literature, culture, history) odebasi habbaha research type jama nangre. Olai thihkhala Dimasa odehe mlai ringkhringrao (academicianrao) rehpyabakhebo maiphunang, phoriyahraobo bangdaonang odehe Khurang laihibbo ahro hamdaonang bauladu. Eboh grauha jihng khribni hamside Dimasa Sahitya Sabhani hojaraoni jajaothai jajaoyathaini graukhe mithima nangjaodu.

Khribnebo hamajaomah khasaumah riladu.

Juhthai-

*Biswajyoti Barman (Daolagajau)
Rehpsaikhusgao*

Kopili Thirtho-ni Jarimin

Babul Barman (Phonglo, Mairongmah Daoga Bsah), Silchar

‘Dilaobra Sangibraha phradesari, phraphangsari, boso daurijing yader mihrijing’ niphrang phaiyahrao Dimasaraoni Dimapurha raja dongba bubli niphrangning sengphong, jilik, khel dongphabuba thihi khnadu. Majigni daikhonibo jadi jadi mdai, khelni mdai givin dongne. Sibrai Gamadi khening jing Pha-mdai, Ma-mdai thihi manihi phailaidu. Graude jing Dimasaraode gda niphrangning ‘*Hindu*’ dhormokhe manihi phaiyahraose.

Givin givin thaniha thirtho thani graude hah gthar di gthar dongbalaining Dima Hasaohabo Panimur thani rogongha ‘*Kopili Thirtho*’ thihi hathani dongbakhe rajasau nising mithijaophabudu. Dimasaraobo thirtho thihi manilaidu. Eraha Kopili dimani dibrom ba dibaiglai (waterfalls) masi dong, boh hamsining mjangbi naiya naithaosisi, dau rijing mih rijing dongyaba thani. Gdahabo ‘*muni-rishi*’ rao buthubo hagra giri gara dima dirgunghaning phraphang bakhlahi thirtho thani bauhi marsi-marsa, dau-mih hahng gnang dongbasini hammani khilaihi mdainiha *toposya* khlairene graude bihre thairene.

Sengkhring Thirtho thangbani Grau :

Mnang mnangha Dimarajarao jbaha thangbani sgangha mdaini daikhoha *noroboli* rire graude bandai sengrene. Boh bubliha Senekhi thihi sengyagao sausi dongbane. Boni bsah sausi dongyabani bumu Sengkhring Rajiyung. Boh nagasa niphrang senhng jahng dainlaiba blaibani raja ‘Sengkhring’ bumu dengbane. Sainsikhali Raja jarni sengyahsgao Senekhi jahng sainlaihi buphani hathaniha bsah Sengkhringkhe sengyahsgao slammani grau thihlaikha thidu. Bupha Senekhibo bsah Sengkhring-neh grauamakhe khnariphailakha. Khnahi Sengkhring rajane sainthine buphakhe thihkhane, raja daikhoha *noroboli* (subung khe bandai sengba) ribani darakhe haigarre thihkhade boh sehngyahsgao janang niyakhade japhuya. Sengkhring ni grau khnahi raja odeh sengyahsgao hamsining thamsi baigokha, odebani Sengkhring raji haigarhi thanglama glaikhane.

Boh bubliha Sengkhiring thirtho thangyahrao odeh ginbin jadini subung buthukhe goronkha. Bonsini lugu maithaijahng khrah jahng thirtho thani buthuha thangkha odehe hindu shastroni graubuthukhe mithima maikhane. Yahonthao Ganga-Jomunani suphlathani dibramah thirtho thaniha sohikha. Orah Sengkhiring badainjahng maithaijahng Brai Sibraikhe bihi thaihi dongkhane. Budu glau laihbani yahonha horsikhali sauminjahng nujaophaihi Sengkhiringkhe singkhane, “Nihng sumu dukhu jahng ahngkhe juruba, sumu nihng nangjaoba?” Sengkhiring thihkha, “Baba Sibrai jini dimarajiha lon mosoljahng niya niya khusi hamya danglaidu, daikhoha subungkhe boli ridu. Eboh niphrang gophumane jingthane lamah phunumane nihngkhe bihladu.” Khnahi Sibrai thihkhane, “Dakhna phorongmaha nihng dugruhi musuhi phraphang bakhlah thangkhaning dauphri jorsi nini yauha baphainang. Boh dauphri magnikhe yaolaini thaoha dugrurihi yaolai bogrong gurmukhaphahi sainja gedehe haiha. Yaolai grong glaiphalangnang, buphang brephalangnang. Boni yagain songhi thangkhaning nihng gathaisiha dauphri bojorkhe nuphinnang; bo hathaniha nihng thirtho-thani slam. Orah dugruhi rajini khribbo *pap* nising gophunang.” Olai thihi Sibrai gmalanglakhane.

Kopili Thirtho jabani Grau :

Nokha naihi Sibrai thihbalaining dongbasi jatharkha, dangtharkhane. Boni yahonha Sengkhiring yaolai gurmuni yagain songphalangi maithaijahng khrajahng daohi daohi Dilaojahng Kopilini suphlathaniha sophaikha, oraha yaolai gurmukhaphang nukhane. Brahmaputra dikhro gedehe yaolai buphang nuyahi Kopili dibukhe daokhukhane. Kopili dibuni dirgung dirgung yaolai gurmukhaphang odeh bogrong nuhi Sengkhiringni khah khajakhukha. Rungjahng daokhubuhi Diyungbraha horsi dongkhane. Boni yahonha Diyung narha yaolai gurmukhaphang nuyahi Kopili dibukhe daokhubokhane. Panimur dibrom ba dibaiglai thaniha sohiyasani *kilometer* thamlai sgangha Lairihatho thihyaba di-gejer hakhroha dauphri bojorkhe nubokha thidu. Olai nuhi Sengkhiring Sibraikhe bihphinbokha. Sain sni hor sni bihbani yahonha Sibrai nujaophin phaihi thihkhane, “Ahro khaisa sgangdaohi thankhaning dauphri bojorkhe nuhibonang.” Olai thihining Sibrai gmalanglakhane.

Daokhudaolanghi Panimurha Sengkhiring rung ahro jaokhu langphuyabani Kopilini sainkhlip narha horsi phlaikhane. Naijuh jabajahngning boh dauphri bojur gurba (bringba) khe khnaba maikhane. Sengkhiring muhgumhi Sibraikhe bihphinbokha odehe phorongni sain brebakhe jonhi dongkha. Nokha naikha, sain jurang brekha. Bongphang basauha naikhubade Gongga-Jomuna suphlalaitani nising boh haigarhayaba dauphri bojorse.

Mussi khinyahi boh dauphri bojor Sengkhring-ni phaogrong magniha baphaikha odehe eboh thanining Sibrai thirtho slamma saniyaba thihi haphrang mairikhane.

Sengkhrng phorongni phinsi Sibraikhae bisni bihlakha thailakha odehe Gongamani bumu rimhi dugrukha. Sainja gedehe jnakhuyaba sain majang nuhi boh baulakha, boni pha-thani pha-rajini khilaihi joog gdain masi jenbalai jakha. Sengkhring Kopili Thirtho slamhi Sibraini ashirbad jahng pha-thanini dhormo saikhuslammane jonhi dongkha. Kopil munini bumujahng Sengkhring thirtho thanini bumu dengkha. Eboh Kopili Thirtho jaba maiphahi kharmin gibin donglakhabo boh buthu lonjagothai niya odeh shastroni grau maphi boh buthu dophaya thihi Dimasani bumu gnang rehpkhring, Kopili Thirthokhe msakhuphinyba Gedema Kumud Chandra Bodo rehplangba gnang (*Kopili Thirtho, Kumud Chandra Bodo, khaikhoba Kopili Thirtho Somaj, Panimur, N.C.Hills, February, 1984 A.D., buphin-11*). Eboh thirthoha Sengkhring phaijenba dini nirphrang maithaijahng 300 thaoyakha. Gibin gibinraoni mote eboh Thirtho-thani Sengkhring phaibani sgang nisingning dongne.

Kopili Thirthoha Tamradhwaj thangbani Grau :

Maibangni Dimaraja Tamradhwaj Sengkhring Rajiyungni thirtho-gathami graukhe khnahi jarni nobrajik rani Bhanumotini mang-grengkhe boh thirtho-thaninini di-gatharha dangkhalimane phaibane. Boha boni lugu bisik gni, bengya-bengsa, miyung-goraibo dongphabane. Bisikgni bumu jakhade Dermidi (Debudi) odeh Ahrmidi (Ahbudi), mairongma dauga.

Raja phaibani graukhe Sengkhringne khnarilakha odehe jarni bisik gnikebo mithirilakhane. Sengkhring thihkhane rajiha noroboli riba graude subungkhe bandai sengbani darakhe haigar khilaihamane raja grau rire thihkhade oraha mang-grengbo dangkhlai phunang odeh dugrubo dugru phunang. Raja grau ribani boh sainkhali niphrang rajiha subungkhe bandai sengbani dara jambane. Boni yahonha Sengkhring thihkhane, boh thirtho thanikhe naisoma nusomane boni lugu masainjik sausi nangdu bedeh thihkhane boh saujahng blaisophuya. Boh yahon phinhi longmaisah lemphahayaba sereni sauha glaihinang bokhening raja galangma glainang thihi Sengkhring thihkha. Boh thihbakho, sereni sauha glaihidu boh gajau-guphu gainsari khohi *sonyasi*-jik jahi Kopili Thirthoha dongma glaima. Boh grau buthukhe raja ahjaolakhane.

Sengkhringni ahr bumu masi Thaiphlungdodab. Yaphongha yau dohi dohi rjabbani boni bumu Thaiphlungdodab thaobane. Boh lemphahayaba longmaisaja raja bisik



gididaoyaba Ahbudini sauha glaihikhane. Raja khaha nangjaoya thihkhabo grau ribani bisik gidiyabakhe Kopili Thirthoha dengbuma glaibane. Dambra gayaba bumani bese gasainma maine buphani graukhe baiglaiyahi Ahbudibo Sengkhringni lugu oraha donglakhane. Tamradhwaj bisik radaoyabakhe lahi Maibangha gidingbulakhane. Ahbudi Sengkhringni bihi jahi thiyadusi Kopili Thirthokhe naiso nuso donglabane. Boh nising Sengkhring odeh Ahbudini bsah bisik buthu Warisa-Warijik jahi mithijaoba odeh dini sosibo Kopili Thirthoni *panda* (bamunsah-bamunjik) jahi khusi dangsoba. Thirthoni yawaihi phaiyaba dara-disa maphi Warisah odeh Warijik rao dini sosibo hamsi donghi gathar jahi dongma nangdune.

Khnaba maphi Tamradhwajni sainkhalihaning eboh *thirthokhe* Dimasaraoni buthuni thirtho thihi raja khnarilangbane odehe maithaiphrong Siba-ratriha rajaraoni maphi li-li-thi-thi khilaihi eraha mela gede salaihi Dimasa Dimajiraokhe raja dugrumane longbane. Maibang nising Khaspurha rajathani disailangbani yahonha eboh thirtho thani negarjaore thidu. Siboratri phaogun badainni *krishno pokko* graude dain daokhlai bohorha glaire. Odebani panda Warisa hamside Warijik buthu Phaogun badainni dain daokhu bohorni (*shuklo pokko*) *choturdoshi thithi*ha dugrudahi gathar jahi dongma nangdune.

Eraha dithar khaobaha Dimasa deorirao Bhagirotthni graukhe thihre odehe Jonthairao Dibrama (Ganga-Jomunani suphlalaitani) ni graukhe thihre. Era bisagni sengphong dugrulaphudu, mussi gaso suso grih. Thihkhabo khamphlai masiha khamphuyabani Dimajikrao dugrubahade khasa khusu dara-disa dong thidu.

Reference : Eboh rehpyukhe rehpbaha Gedemah Kumud Chandra Bodo grau Ahsum jahng rehpyaba 'Kopili Thirtho' (Kopili Thirtho, Kumud Chandra Bodo, khaikhoba Kopili Thirtho Somaj, Panimur, N. Hills, February, 1984 A.D.) laihisini jrumah laphaba.

Gedemah Babul Barman (Phonglo) Dimasa Sahitya Sabha, Silcharni Danghoja. State Bank of Indiaha sakhri danghi retired khlaiba. Duha Rongpur, Silchrha dongdu.

Dembra Haphai

Kumud Chandra Bodo,
Panch Bhandar

{Eboh rehpyukhe 1986 maithaiha baigoyaba 'Dima Khurang' laihjab nising suguba. Laihjabni rehphoja Gedemah Sonaram Thaosen rehpyuni grau jusengha edehe rehpa- **Dimasani Hathani Grah** : Dembra raji danglaibi, jilaibi. Hahyung hahdao bobra Dembrasarao manang mangha thihre- "Mondholbabu, rahng rinang, ahngthane hah dari, khajana suphuya." Duha meserhi Mondholneh rahng jasikhabo hah maiya, mlaini jadi gablaikha, gdani hari khasedaokha, sereba Shankardevkhe rimphong lahi jadi garkha. Dembra haphaini manang, duha, danangni graukhe rimhi Gedemah Kumud Chandra Bodoni eboh badera. Gdani grauha bokhe jruba Gedemah Rukmising Majumdar odehe Komorakatani Gedemah Tagding Daulaguphu. Dembraha Dimasarao garausi lamsi jama nangma. Dembra haphaini khrib Dimasa Dembrani dara-disa odehe Daikhokhe manima nangre. Gdani Daikhoh ronthai haphai jahngse. Sengphong, Khel, Khisong jahng niya. Khrib daikhohbo khiribni khaoyungse.}

Dembra haphaini hari maithaijahng rja brilai sgangha sainja gede Dijuwa, sinjoroba gede Gathangsani raji, sainyauda gede Longding dibu, Serga rangthai, Lanlobarba raji, sainyausi gede Kolong odeh Diju dibu. Maibangha Dimaraja dongbaha Diyungbraha Gurji Lisgir haphai sgau jahi dongba. Asim rajajahng jabba jahi yahonha Kolong dibukhe hari khilaihi *sondhi* khilailaiba. Duhani Hoyborgaonha jabba jabaha hagra gadabni Hoyborgaonkhe Dimasarao Hagra Gadab thihrene. Hagra Gadab niphrangse Hoyborgaon jabane. Kolong dikhari odeh Lalong dirgungha dinibo Kacharipar thihi nohlai dongkho. Gurji Lisgir bsah Namuram Lisgir Nogaonni *dokkhin path*-ha dongbaha Namuram Shankardevni *shoroniya* jajenba. *Dokkhin-path sotroneh* hah noh ritharhi jaibulaba odeh Kampur rogongni Changchokiha raji khaphaiba. *Dokkhin-path*-ha dubo Kachari *sotro* thihi *sotro* masi dongkho. Namuramni bsah Bhimsingni somoiha British buthu eraha sophaiiba. Bhimsing jahng Tularam somoy masini haphai-sgau. British buthu Bhimsingke smu nangre thihi singbaha musibo nangya thihbani Tularam jarkhe Dembra haphaini haphai-sgau songmane dabi khilaiiba. Odebani Bhimsingbo phrik phrik dongyahi ode thihkhade bonebo haphai masi rima nangre thihi dabi khilaiiba. British sorkar Nogaon zilani duhani Kathiyatoli, Chohori, Gorubath odeh Karbi Anglongni Rongkhang *mouzakhe* Bhimsingne



yauphaba. Bhimsing *mouzadarni* bojohm odeh boh somoyni Dimasaraoni bojohm duhabo Changchokiha dongkho. Bonsi khathi Dimasa thihkhabo shoroniya jatharkha, sengphong rehpslaikha. Bhimsing Mouzadar bani boni bojohm sereba Majumdar, Gurji Lisgirmi bumu jahng sereba Laskar, sereba Kakoti rehpkha. Thihkhabo sere sumu sengphongni bojohm singkhade Dimasani givin givin sengphongni bojohm thihi thihladu. Bonsini bisingha ganangbo bangsabi. Laihsi ringyaraobo bangkha. Gini Professor dong odeh B.A. pass jayaraode bangkha. Nij Kampur nohlaini Tularamni busuthai Late Bolidhar Rajkonworni bojohm odehe Changchoki, Singimari nohlaiha khathi Dimasarao erhi phaihi dong. Koch jadini masainjikraokhe noh jahi Dimajikni jilikde girikha. Maithai jahng bisa gnilai sngang sosi bisingni puja (*bhitor puja*) thihi honoh dainhi bonsibo Dimasaraoni mdai haithikke hurene. Duha bonsi mdai huyakha odeh graudima ringyakha. Thihkhabo Dimasarao sugukhade bonsini bisingha Dimasa japhinma mijingyarao dong.

Changchoki nohlaini Shri Buddheswar Majumdar (85) niha Dimasani gadani gonda bugurni phi grang gni odeh jabbani seng (torowal) gongsi dongbane. Kampur Higher Secondary Schoolni Principal Shri Kunormol Agarwala odeh Late Khorgeswar Majumdar Assam Museumha dengma thihi langlakhane. Assamni jarimin rehpyah Benudhar Sarma-bo naiphaibane. Maibangni dimaraja sausi Gurji Lis'girkhe longhayaba Kampurni phrang Maibang sosi Diju jahng rjasi khon doh baibaha daindoh somoy nangbani grauthaikhe Changchokini Dimasarao dubo thihdukhoh. Gurji Lis'girmi khorong hading dubo Diyungbraha dongkhoh. Dovokani mdaikhoha Dimasani gdani sehng odeh *torowal* khribjahng gong jijaih dongkho. Eboh buthuning Raisia phatrini sehng odeh Tularam jbbahsgaoni *torowal* thihi khraorao thidu. Moudongaha Tularamni *kaman* dongkho. Dimasani jbbahsgau buthuni yaudi grah gejesi langthar phuyahi Hojai rogongni Habaipur billha lemsinghi galangbane. Nah guyahrao billha nah gubaha maihi gejesi langlakha odehe gejesi didabha gibibhi donglaphurene. Manangde nah gubaha gaphnangrene.

Dovokani mdaikhoha manangde subungkhe bandai dainrene. Duhade mih daukhe daindu. Dovoka rogongni Nahar Gaon, Buri Gaon, Haldihiati nohlai buthuha Kempraisaraoni bojohm buthu duha Shoronia jahi Bora, Bordaloi sehngphong rehphi Asimsa jalanglakha. Graudima ringyakha. Bonsi ma-mdai, pha-mdai dangkhlaibani bonsini sehng buthukhe duha Dovokaha Shri Haren Laskar labutharhi dengladu. Dovoka rogongha Jabong than thihi duhabo than masi dongkho. Dimasarao Dovoka niphrang Alongkaha jaibubaha Jabong daikhokhe labuphahi Alongkaha khamriphaiba. Duhade Dovoka rogongni Jabong daikho mlaini yauha thangkha. Alongkaha duha Jabong bandola daikhoh, Wari daikhoh, Hanuman daikhoh odeh givin givin daikhohkhebo sowadu. Sganga rehpbuyaba Bhimsingni mouza mabrini haphai sainja gede Dauga hajuh, sainjroba gede Gathang rajji (*Khasia*), sainyauda gede Dijen (Jamuna) dibu odeh sainyausi gede Kolong odeh Diju.

Tularamni haphai sainja gede Dijuwa odeh Dauga hajumi bedeb, sainjroba gede Langkhlang (Kapili), sain yauda gede Diyung, sainyausi gede Dijen. Bhimsingjahng Tularamni eboh haphai magnining Dembra haphai. Tularam Hawar niphring phaiya saniha Dembra haphai dongbasi Gurji Lisgimi yauha dongba. Dembra haphaiha daikhoh daiyah yawaiba. Dembra haphai dude manangtha khasidaokha. Gdani Dembra haphaini Dimasaro gejesi gma gmu jalanglakha. Duhani Dembra haphaikhe haphai matham jahng phijare— (1) Alongka, (2) Hojai haphai, (3) Moudunga. Janumamukh, Dijebra Jogijan Hojai haphaiha glaidu. Hojai haphaikhe Dimasarao Yaphangbo thihre. Moudonga haphai Karbi Anglongha glaiba bangdao. Dembra haphai gdaha Dimarajini sainyausini hasima haphai (Border Region). Odebani nohha thikha baikhabo nokha naikhaning jabbahha thangmaire. Noha thihi baihi hahgusu nohgusu jakhade jabbaha thangthaoya. Odebani nokha naikhaning daudembra ba dainjabbah thihhi Dambraha thangyabani bumujahng daunoh, daudi dainhi muduru makhari songhi githine makham garre. Kapiliha mahnggreng luhi suthaigrong yaulaigrong jahng sauthar nothar khlaire. Dambramahne daunoh dainbani Daudembra ba Daudembra. Daudembra dainyarao dongyaba hathanning Dembra haphai. Dembraha baminrao habphaiya sanihade daudembra dainhining maimuh tharyakhabo sulibane. Blaikhali hadam dibuni somoykhe naihi rajine bandra jirirene. Hojaiha Dimasani Hojairao dongbani Hojai haphai. Nagarao khaokhluhaba dainba badailaibani Komorakata, Hojai rogongni Dimru dibuni di sworba lenbani (muruhbani) Dimuruh dibu. Dimarajani somoyha Longkaha Alongkhoh (jelkhana) dongbani Alongka. Duhsosi Dimasarao Longka haphaikhe Alongkase thihre. Karbi Anglongni Habaipur mouza Alongkani bisinghaning. Eboni bumu gajam Gamna Hawar. Hojai rogongni Habaipurha dongyaba Late Sandhyas Saulase orani 'sign board' khe sgaohi Lanka rogongni Gamna Hawarha phaphaiba, musuh khuthi khuliphaiba. Boh niphrangse Gamna Hawar Habaipur jalanglaba. Duha Habaipur gathai gni jakha. Hojai rogongni Habaipurha mnangha Dimasaraoni nohlai dongbane. Nohlai gubrubani ba baihbani Habaipur jabane.

Dimasarao gdaha dengyaba grau Dimani hathanni, Dibuni bumu buthukhe dini mlai dengslaitarkha. Odebani Dimasani jariminni haganthi diganthi gmadu.

Gdaha duhalai lamah gribani odeh di lingmane dikhor maiyabani Dimasarao gda niphrang dirgong dirgon dongbaisi. Dibukhe manggithi, mihgithi bemar gajaoba. Boni dikhe linghi Dimasarao jahamya jahi thikhribbani record sorkar nokhoha dong. Dijen, Diyung, Langkhlang dibukhe Dimasarao rung jahng, walem jahng gda niphrang jaokhuba, jaokhlaiba, khunsa dangba, yulai dangba, bephar hapharbo rung jahng khlaiba. Hasao Hamri, Langlobarba, Dijuwani Dimasarao elai slaislo jahi dongphabuba.

Haripha jahng Harimahni (Dumaidi) graukhe khribbo khnadu. Jamuna nohlaini Hulmani nohlaiha Hariphani bojohm buthu dongkho odehe Harimahkhe labubaha Haripha rung jaoyaba baitha gedeba dini sosi dongkho thihba khnadu.

Langkhlang dirgongkhe (Kapili upotyaka) hawarbani Dimasarao Hahyung thihba. Hahyung hahphaikhe himsobaha khraasi (Daindoh) nangbani Hahyung Khraasi thihhi dinibo Dimasarao khraorao thihdukho. Duhabo Dijenbra rogongha Hahyung nohlai dongkhao. Dijenbraha Dimasani Hamyadao bonjuh meser gaiyaba bonjuhphangkhe nuyarao bangbikho. Dijenbraha sainmudi Dimasarao naga rjasih mathla rjasih digru smaibani grau dong. Eboh somoy masiha Hahyung haphaiha Dimasarao saulekha bangbani grauganthi.

Lumding rogongni Longlaimah hajuhni nohlai hamba phanthao Phang gabaodoh, mithilaih warba mihsaisa jujaba, lamasakhongkhe rung sikkhlaihi phaibani rjabthai Diyunggha sophabaha dikhro diyaphang thar maiyabani jijaih saihi naibani therkhu duhsosi Dimasaraoni khuha dongkhao.

Dimasarao Dalao (Brahmapurtra) haphai niphrngse thanghi Hasaoha yahonthaoha Hawarha thaohiba. Dimasani budu glau gdani jariminna yagain grauthai yadergrah Dilao dirgunggha odehe Dembra haphaiha baihi dong. Yaderkhe rikhima smaima nangre.

Danglam Jilamha Dembra :

Hadam dibune Dembra haphaini hah hamsining hambu. Hasao, Hawar, Semkhorma, Dijuwa, Langlon, Barba odeh Hamri haphaini phrang Dimasarao somoy somoy phaihining dongbase. Odebani Dembra haphaini dara-disa gibring gathabse (composite character). Gdaha srab thanglai phuyabani haphai gibinha dara-disa gibin jalabade gibin grau. Thihkhabo Dembralai haphai masihaning, nohkor sihaning, subung sausihaning dara-disa (*dhormo*) gibring gthab yaowaiyaba haphai nuphnangyakho. Eboh dara gbang, dara gmang yaowaibanibo Dembra haphaini Dimasarao rahnggha riha gilikdu. Grausi khah masi japhuya. Bukhu jahng Dimasa masi Dimasa phasi thihdu khajahng olai baolaiphuya, khusiha danglaiphuya.

Dembrani Alonka haphaiha Dimasaraoni baithaih, luhthaih, damthaih suthaih, dauthaih gainthaih, Dimasani dara-disa khaisa dongkho. Hojai, Jamunamukh, Moudunga haphaini Dima rajiha Dimasani baithaih luhthaih, damthaih suthahi (Khram Muri) gmakha.

Kampurni Changchoki nohlaini Dimasaraokhe naihi jing lonphudu Assamha Dimasarao gda niphrang jarni dara-disakhe mjangrima, rgao rima, jarni jadini birimkhe mthaomane khah riya. Jarni dara-disakhe regejaohi, mlaini dara-disakhe yaowaibaihi jarni

Dimasakhe naislehi mlaikhe mjangjaohi jarkhe khasijaohi, mlaikhe dedaojaohi Dimasarao gda niphrang gmah gmuh japhabuba. Duhabo gmahining dongkho.

Alongkaha tribal belt block dong. Assam revenue act mote eng 1953 maithaiha eboh khorongkhe khaba. Assamha khrib jahng khonthimji dohlai elaiyaba traibal belt block dong. Alongka haphaini eboh khorongkhe khabaha hathanini khraoraokhe garkhabo eboh khusi Gedemah Late J.B.Hagjer odehe Gedemah Late Debendranath Naidingni yaublai thihma nangre. Dini eboh khorong jugaophaikha. Khorong gijikhe baji niphrang Gowalao musuh mihsib gimsinghi Dimasaraoni bthai bikhimkhe jiridu.

Dembra haphaiha ITDP odeh Tribal Welfare Board-bo dong, Thihkhabo ebojahng Dimasarao hamsining gakhuphuma thihhi thihma grih. Tribalsaraoni mithijaomah (Identity) dara-disa gibin dongbani tribalsarao eboh buthukhe maiba. Thihkhabo eboh hosom buthuni hojaraoni bauthai yader thuyalai jadu. Hojai *mohokumani* Tribal Welfare Board-de Dimasaraoni yauhaning dong. Morigaon Tribal Sub-planha Dimasarao gnisening member maire. Duha Hojaine gibin ITDP dabi khlaidu. Morigaonha Lalungarao jon bangdaobani Dimasarao gbang subidha maiphuya.

Subung jamane, gakhumane Dembra haphaini 95% khrosongni hah noh dong. Bepar haphar khlaimanebo lamah-blahm dong. Thihkhabo Dimasarao kormi (active) niya. Jarni khusikhe dangba jagabya. Dukhu khlaiyahi lengyahi magna maima bauyarao bangdao. Ju odeh jih haglai ling haglaiha harbi. Dembra haphaiha kham haglai, song haglai, sain khma, hor khma bangbi. Rahng rih yawaibaha hisab (*mitobyayi*) grih. Odening mlai suburyah, sedreyah bangbikho. Odebani duhani dangthai jithai jahng dongkhade danangha Dimasarao jarni hah nohkhe, rajikhe raokhihi dongphuba dumase. Saulekhaha, rahng-rih, ringba grikbaha Dembra haphaini Dimasarao dini mlaikhe deyakha. Dimasaraoni jarni jadini smauthai (*jatiyo chetona*) masi grikhade danangha laihsi ringkhabo maijikka, mailingkhabo Dembra haphaiha Dimasaraoni jarni birim (swokiyo boishistho) gmasolaphure.

Eboh rehpuh Assamese rehpmi jahng dongyabakhe roman rehpmiha slaiba graude transliteration khlaiha Biswajyoti Barman (Daolagajau).

Gedemah Kumud Chandra Bodo Dimasa kobikhring sausi. Grang khon damsai laihsi rehpkha. Khajenbaha Dimasa Sahitya Sabhani melhoja-pharain dongba. Boh Kapili thirthokhe msakhuphinyaba hoja gede. Gedemah Bodo gibin gibin yausandi odeh mansandi maiba bangbi.

Hadam Guphu Maimuh Gisim

(Dimasa Phoriansarao phori-gejer thaobani karon)

Jatindralal Thaosen, B.A. L.L.B.

Umrangso

{Eboh rehpujikke 1986 maithaiha baigoyaba Dima Khurang laihjab nising suguba. Laihjabni rehphoja Gedemah Sonaram Thaosen rehpuj jenha edehe grau jusengba- "Laihsi ringba odeh educated jabani givin ortho, dini dakhnani slingthai slingrithai bedeh jama nangre grau buthukke rikhihi masi bauthai gnang thought provoking thihrimin Gedemah Jatindralal Thaosen niphrang maiyabakhe eraha sugudu. Eboh thihriminni grau bijlik jakha- 'Slingthaini biyam (base) hamya'. Jing thaisi bausengdu- 'Biyamning grih.'- Rehphoja.}

Laihsi smuneh phoriba ? Ringma grikmani khilaihi. Laihsi phorikhasining ringba grikba ? Odebo jablaiya. Sausi gnide laihsi rehpa ringya, phoriba ringya thihkhabo, ringdu grikdu giyani jadu. Rajyo shason khlaiphudu, dhormoni grau mithihdu, mdailai jadu. Somrat Akbor laihsi ringya. Moghol samrajyo boni somoyhaning hamdaothao dongba. Thoilongo Swami, Bhakto Kabir, Latu Moharaj bosi laihsi phoriba rehpa ringya. Thihkhabo mdai masilai yaba subungbuthu. Thihkhabo olaiyaba subung sehngbi. Bosini ringthai griktai hajaibahaning maiphabayabase. Khribbo hajaibahaning maiphabuba thihkhabo bosini kormlophol hamdaobani hamdaohi ringdaohining thaiba.

Ringmah grikmah baji niphrang maiyaba bosthu niya. Bisingni bosthuse. Swami Vibekanda thihba "Knowledge is inherent in man. No knowledge comes from outside; it is all inside." Eboh bonoh maimani blahmkhening Swamiji thihba- "Education is the manifestation of the perfection already in man." Subungni bisingha hamtharhi donglayaba bosthukke phlaphuyaba blahmkhese 'Education' ba 'Shikkha' thihba. Laihsi phoriphalanghi jadi jadi khoborkhe grauthaikhe khakhuhi denghi khakhe luth phuth khlaikyabakhe education thihya. Education masi slingthai, hadaithai, khakhe phaikhongthai. 'Real education is the Concentration of mind' - bakhakhe bauphlung bauphlang bauriyahi bojohm khilaihi gathaisiha dengbase asol shikkha. Sere jarni khakhe bisilai bojohm khilaihi dengphudao boni education hamdao, bangdao, ringdao, grikdao, giyani jadao.

Khakhe bojohm khlaiphudao phukhaning khusiha khah riphudaobase; khah ridaokhaning khusi hamdaobase. Khah rihi rih sukhade phudaobalaining, yam hobabo, rih

daubabo hamdaobase, mjangdaobase. Olaining laihsi phoribabo. Sere khah rihi phoriphudao, boning ringdaobase.

Hadaima slingma thihkhala hadaithani slingthani nangdu. Eboh buthu jakhade dini daknani School, College, University buthu. Hadairiginyaba, slingriginyaba buthu jakhade boh buthuni hojarao Teachers . Gibin givin boh phorikhoh buthuha phorima nangyaba laihsi buthu jakhade hadaithaini blahm ahr class buthu jakhade habah. Eboh buthu dongbasikhe hojakhe garhi yaudi thihlaphure. Bisilai eboh yaudi buthukhe sere yauwai phudao yauwaiba ringdaonang boni habah judaonang boh phoriansa ringdaonang; giyani jadaonang. Laihsi, Master, Professorraode lamah phnurimanine sining dongba. Lamah himginyabade phoriansase. Lamah phnurijaohi lamah mithikhaning thangginyaba hathaniha sohiya, himhi thangkase sohima. Dini dakhnani phoriansarao buthukhe himayahining ba himgejer himhining sohima baubalai ang nudu. Elai sumo jabani jaba? Concestration of mind kom jabani. Khahkhe sikjohmhi deng phuyabani. Eboh concentration of mind dini-dakhnani phoriansaraoniha sumo jabani bangya daoba? Karon bangbi. Thaisi thaigni eraha thihnang.

1) Nohlai nohlai school jabani ahr ringyarao master gribani.

Nohlaini school buthuha phoriansarao khajamah gmangma nuhi slingmani blahm maiya. Hadaithaiha khajamah maiya thihkhade khah slehi slingphuya. Slingyahi bedehe ringma grikma?

Nohlaini masterrao bangdaohining jarning ringya. Jarning ringya thihkhala ansaraokhe bede slingriphuma? Masterrao jar ringkhase ansaraokhe khajasisi khilaihi bujaiphuma; bikhlik gubrusi thihphlaphuma ; khnahi ansarao khajama, hadaima mijingma. Olai jaya. Slingrithaiha master jahng ansaraoni hathoha communication gap debi.

Nohlaini school buthuha masterrao dongsongya. Tolob khojimoni khilaihi officeni khusini khilaihi givin givin chuthi buthuni khilaihi maithisiha bosu dainthambo phoririya. Phoririthaiha habah jagauha bangbi. Hathlau bangbi. Hathlauha maiphang jalakhabo hamya. Maiphang jalare thihkhabo yader hamsi suphuyabani sain dungkhaning rainphakha, hadi hakhaning gubukha; buphang thar jaya bathai grikphuya.

Phorithaiha dhormoni grau gribanise jathing, masterrao ringyanise jathing, bosu grihi dongba bangdaobanise jathing dini dakhnani ansarao masterraokhe man khilaiya. Sere khoro gongphuya man khilaiha ringya boh subung gainsong phuya, dahiphuya. Gainsongyahi subung musikhebo ringphuya. Masterraoni basauha phoriansaraoni shrodha gribani masterraobo bosu ringlabalai mamangbo slingrima bauya. Phorijen phorikho

niphrangning jini slingthaini biyam hamya. Biyam hamya thihkhala bedo dalam dangphuma ? Dimasa phoriansarao phori gejer thaolabani pass japhuyabani eboh grau thaisi.

2) Bangdaohining masterraokhe Political appointmentse riba. Aptitudekhe naihi meritkhe naihi appointment riya. Bangdaohi masterra Forest Guardni khusikhe maikhade master janang niya. Gibin khusikhe maiyabanise masterha hapba. Smu jabani tolob bangyabani, maithaih gribani, promotionni lamah gribani. Masterraoni tolob bangdaoma nangre. Meritorious ahr master khusi dangmani aptitude gnang subungkhe master khusiha haprima nangre. Ode niya thihkhade jini phorithai hamdao nang niya.

3) Slingmani Bisoy bangbangkha :

Dini dakhnani phorikhoh buthuha phorimani bisoy bangbangkha. boh buthu bisoykhe hamsisi phoririmani masterraobo ringya. Ringkhabo hamsisi slingrimani somoy maiya. Ansarao buthu khabaosikhe molophuyasani ahr khabaosikhe dusengriha jaobalai nudu. Odehjang phoriyaba bisoy buthukhe bosu hojom khlaiphuya. Hojom khliphuyabaning dini dakhnani phoriansarao adisari jabase.

4) Atmosphere hamyabani :

Nohlaihase jalathing, townhase jalathing jing Dimasaraoni atmosphere hamya! Ansarao laihsi phoriphugothai niya. Bomah, bopha phorikhase, hadaikhase, laihsi phoribani grau sainlaikhase ansarao buthubo phorimamu, hadaimamuh. Jing ode jaya. Bomah bophani jathai, dongthai dangthai, bauthaikhening ansarao buthu slingba bangdao. Jing Dimasarao bomah bopha jaya'rao bangdaohining adorsho bomah bopha niya. Jini jathai hamya banining jini somaj hamyabase. Jing jar jar hamdao nang jini somaj hamdao nang. Somaj hamdaokhaning somajni bthai bikhim ansarao hamdao nang.

Mnangni khraorao phoribatha ringdaoba atmosphere hamdaoba goronbani. Boh somoyha somaj hamdaobani. Somajni subung man-mohan khilaihi donglaibakhe ringdaobani. Ansaraode gibinya.

5) Somajha gibi gribani :

Somajha gibi gribani somajni subung sausibo jar jami khusikhe duty bauhi dangya. Masterraobo dangya. Masterraokhe ahr gibin gibin subungkhe nuhi ansarao dangya. Phorikhoha nalai thangya, nalai laihsi phoriya. Phoriyahi slingyahi hadaiyahi pass jama

baudu. Nokol khलाई, andolon khलाई. Bol jahng pass jama baudu, sausi gni jabo jadu. Odehjahng gdani grau 'Chatranang odhyoyonong topo' duhade soliyakha. Duha nangyabade 'Chantranang andolonong topo'se.

6) Barsoya Khrengjao– Somajni Loksan Gedeba :

Rijingsilai phorijen habah songbani yauhonha rjasilai pathshala, danlai M.E., jilai Matric, sausilai B.A. ha sohiphudu ba pass janaidu. Matric niphrang bakhlaha thaoyarao barsoya khrengjao jedangmalai linglang thaoyarao. Bosi somajni bobain gedeba, loksan gedeba. Bosi buthu gejer godo mamangbo Matric pass jare thihkhade Dimasani somaj gibin jamamuh. Bobain debalangi Dimasa somaj eboh bobainkhe bainya thihkhala bosu khlaima ? Sakhri dangmane laihsi ringya. Thihkhabo babu gede jama nangjaodu. Bosini blahm magni – Contractor jama rahng kamaima, rahng kamaihi Politics-ha hapma Member jama. Gede jama. Eboh khusi mungniha gibi grih. Gibini ashroy layahi mosoljahng gedeba japhudu, gnagbo japhudu. Somajha mosol bangdaodu, somaj hamyadaodu. Jini somaj hamyadao hamhayadao thangbani eboh karon magni.

Thihkhala Bede Khlaima ?

Dinini ansa daknani khrau. Ansraose jini bhabishyot. Bosi hamkhase, ringkhase, grikkhase jini somaj hamma. Bosikhe bede khlaihi hamri phuma, griki phuma, giyani khlaiphuma bokhe bauma nangma, bauhi khusi dangma nangma. Karon subung gmabatha mussi jadini gmathaibo dedaoya.

Ahni bauthaiha–

1. Educationkhe compulsory khlaima nangma. Maithai doh niphrang maithai jra sosi meyah masainjik phoriya goya khlaima nangma.
2. Nohlaini school basah basah buthukhe sbaihi hathani gejerha school gede gede dangma boh school masihaning matric sosi phoriba maima nangma. Smu bisoykhe smu ansa phorima nangjaodu boh bisoykhe schoolha phoriba maima nangma.
3. Graudimakhe ba grau Dimajahng mainar sosi phorima. Grau ringkhase yader hamba. Gibin gibin bisoykhe mithiba laidaoba.
4. Olaiyaba phorikhoha Boardingkhe garhibo Haspatal, ansaraokhe naimani Ayah odebasi

dongma nangma.

5. Ebohbutu dongbasi khorso D/C ba State ajaoma nangma.
6. Eboh school butuha haptasiha sainsi haithibari basain ahr maithaisini phorikkha ribani yahonha daingnikhe garhi mussi chuthi thihhi grima.
7. Masterrao well trained jama nangma. Strict discipline dongma nangma. Mlauthai mnithi khajathaini blahm dongma. Nangbasi equipment dongma nangma.
8. Literatureha hamya yaroo ansaraokhe technical ba vocational education rimani blahm dongma nangma. Ansaraoni aptitude ba bent-khe naihi sre smukhe phorikhala hamadao nang bokhe naihi nuhi saikhuhi phoririma slingrima.
9. Khraoraokhe ringdaoyaraokhe man khlaiba, phoriansarao da-phuyunglai donglaiba, mussi khusibo judao hidao griba (dignity of labour) eboh buthukhe slingrimaning nangma. Eboh buthukhe ringkhase phoriansaraoni choritro hamma.

Elaiyaba school grangjralai ahr maithaikhon lai mamahng salai phukhaning ang baudu jini eboh Hasao raji ganiyani, ju baolaraoni ahr lathowa, mosol, sle buthuni hathani jayahi gjauni hathani ringyarao grikyaraoni khusi dangyaraoni hathani janangmuh.

Elaibasi khusikhe serening baunang ? Serening dangnang ? Hojaraoni khusi bangbi. Bosi sranya.

Eboh rehpuh Bangla rehpmi jahng dongyabakhe roman rehpmiha slaiba graude transliteration khlaiba Biswajyoti Barman (Daolagajau).

Gedemah Jatindralal Thaosen Dimasani bumu gnang rehpkhring sausi. Graudima jahng baigojenyaba thairili laihsi bonining. Dimasa Sahitya Sabhani melhoja jajenyaba boning. Gedemah Thaosen Assam sorkarni officer gede dongba Gedemah English, Bangla odehe grau Dima jahng rehpre.

Phatri'ni Grauthai

Nirmal Diphusa

Diphu, Karbi Anglaong

Phatrini grauthai buthukhe khribbo mithidu je Phatrirao mdairaokhe bihi mulugha/habsaoha bliphaiha (in future) jagneyabasikhe sgangdahi grau-makhao jahng (with words of hidden meaning) thihlangyaba grauthai buthu thihi. Odelaining, gdaha, Koli Jug jenba maithai gli buthuha, Dimasa Phatrirao givin-givin maithaiha mdaikhe bihi, phatri gahi mulugha bubliphaiha jagneyabasikhe mdai thihribalai sgangdahi thihlangyaba grauthai gabangning bangsabi thihdu. Khu-rgai jariminkhe khnabalai thihkhade gdaha Dimasaraoni Daikho grah, Dimapurni Lungmailam Daikhoha maithaiphrim gerba basainkhali sausi subung Phatri gahi mdairao thihribalai nangba grauthai buthukhe grau-makhao jahng rajiraone thihphlahi/thihrihi khnarirene. 1900 A.D. maithai yahonha Mdai eraha (Dimapurha) dongya jahi Dimapur niphrang Lungmailam Daikhokhe givin-givin hathanha dihsaima glaie oded yahonthaoha Mohongdijuwa thihyaba nohlaiha thaohire (duhani Karbi Anglong jilaha). Dini-dakhnade, eboh Lungmailam Daikhoha sausi Phatrikhebo phatri gaba nuhyakha, phatrini bumu jahng laiha-bonha jabhi sining Daikhoni Jonthairao dau thaibakhe nuhre, Phatrine laiha jabbade thimji-jra (30-15). Olaining Daikhoha 'Muhri' jahng 'Maduli'ni (khram/dol) bumu jahngbo laiha-bonha jabhi dau thaiba nuhre.

Odelaining, Dimapur Rajathani gubrubani yahonhabo, Dimasarao dongyaba givin-givin haphaiha, givin-givin maithaiha Dimasa Phatrirao phatri gahi mdairao thihribalai nangba grauthai buthukhe sgangdahi rajiraone thihlangyaba grauthai gabangning dongba bangsabi thihba khnare. Boh buthuni bisingha Alaidao jahng Hanggedao phatri gnini grauthai buthukhe duhabo grahraoni khu-rgai jahi phaikhuyabasikhe thihphla phudukho. Grahraoni khu-rgai jarimin niphrang mithibalai thihkhade eboh Phatri gnibo givin-givin maithaiha phatri gahi ortho masih, jathai masihkhening givin-givin thihthai jahng, givin-givin grauthai jahng rajiraone thihlangba thihdu. Hanggedao Phatrini grauthai sgangdahi thihlangyaba buthu khu-rgaiha khnayabasikhe bakhlaha thaisi-thaigni renhadu,

**'Koli Jug sophera
Ang duha nisikhe**

Khabao gorohi denphuyakha,
 Sima bahkhuhi denphuyakha,
 Jekhali longthai glangnang,
 Dimai glignang,
 Lamayung rih-glao bophainang,
 Lamyung akhi barphainang,
 Lamayung duyung rennang,
 Yaga(Ehga) gri dolai khainang,
 Grang gri singgao birnang,
 Daukha gisim phuphainang,
 Boha nisi mahlonla,
 Thihkhabo, nisi mdaikhe bihi dongla,
 Ang nisikhe khabao gorohi dengphinnang,
 Sima bahkhuhi denglanang.'

Eboh Phatrini grauthaibo rja-rja maithai sgang thihlangyabase thihdu, ortho thubi, grauthai libbi, eboh phatri gaba sainkhali haphaiha hagra-bongrase bangdaoba, subung banyadao. Boh sainkhali Dima Raji haphaiha duhalai gari gri, lama gri, singgaobo grikho. Ang mithibalai thihkhade eboh Phatri thihlangyaba grauthaini orthode edehe,—

'Habsaoha Koli Jug sophaikha, mulugha gjai yawaiba bangdaophaikha, dharmo genedaokha. Odebani, Mdairaobo marsisa-marsisukhe sganglai gabang sau nangphuyakha, khrib gede hamsi naiso phuyakha.

Dabo, lohnya thihkhade jekhali nisi nuhlanang, Raja jihi phaiyarao, jnadaohi dongyarao glignang, haru-nohru janang ahr sgang hagra-bongraha dongyarao raja jihphainang, gakhudaonang, hagra lamabo pucca japhainang (black topping/white topping), lama bijing-bijing dalam noh japhainang, telegraph/current budu renphainang, lamayunggha gari-motor phainang, singgao (aeroplane) birphainang boha nisi lohlanang, mithisolanang.

Ode thihkhabo, Habsauha sere subung dharmo yawaire, bohsikhe Mdairao sganglaining khasaolama-naisolama.'

Gedemah Nirmal Diphusa graudimajahng rehpuh rehpring sausi. Duha grau Dimani thaihseb rehpsaihi dong. Dimasa Sahitya Sabha, Karbi Anglong zila johmni melhoja dongba. Duhade Diphu Dimasa Clubni melhoja. State Bank of India nising Deputy Manager jahi retired jaba. Email : nirmaldifusa@gmail.com. Phone : 7637856486

Thaihmeser

(Antonym)

Nirmal Diphusa

Diphu, Karbi Anglong

'Mulug'ha Dimasa jadi, masih jadi grah, yahder grah thihi jihng Dimasarao khribbo mithilaidu. Dimasarao givin-givin 'jug'ha givin-givin haphaiha Raja jihi phaibani grauthaih Ramayan thairili, Mahabharat laihsimah grah ahr givin-givin laihsimah grah, jarimin laihsihabo Dimasa jadi raja jihi phaikhubani grauthaih thihphladu. Treta Jug, Dahphor Jug ahr duha Koli Jug jenba maithai buthu sohsi Dimasarao givin-givin haphaiha raja jihbani grauthaih jarimin rikhikhringrao Dima jadini yahder-budung khaihonba, rehpkhuba dongbani hisab maidu. Dimasa jadi yahder gnang, yahder grah thihbalaining Graudimabo (Dima grau) yahder gnang, 'habsao'ha masih 'Grau-grah', thihphudu. Luguha, Dimasaraoni yawairimin (culture) odehe laihriminbo (literature) olaining grah thihphudu. Gdaha Rajasauha Graudimani rehpmi dongkha thihkhabo gmajaokha, mlai jahngthi sgmajaokha, odejahi gdaha jini rehpmi dongba thihkhabo duha grilai jahi thaoma glaikha odehe yahonthaoha Graudimani phantha 'Roman Script'khese ajaolaima glaikha, odebasih jathaila khribbo mithilaidu. Graudimani 'laihrimin' grah jabani dara jahng Rajasaojni Dima Raji gubruba hangdu laosakha thihkhabo, khu-rgai bakhuhi phaikhuyaba, labukhuyabasih jarimin, kharimin, laihrimin duhabo gabangning bangsabikho. Laihriminni bisingha, Graudimani rjabthaih grah, grau-sol, grau-grah, phatrini grauthaih, Jonthairau-Hojairau Mdai huba-garbaha yawaiyaba grauthaih buthu, grau-khaphari, grau-bahari, grau-hari (homonym), grau-rabai (auxiliary words), thaihmeser (antonym), ahr odebasikhke garhibo Graudimani grau bthai duhabo gabangning bangsabikho.

Graudima jahng 'Thaihmeser' (Antonym) wainsoba mainbasikhe bakhlaha gijisa renhadu. Thaihmeser eboh buthusining dongba thihide thihphuya, eboh buthu thane barabo gabangning dongkho, duhade ahng jar wainsoba mainbasikhe sining eraha khnarihaba odeh eboh rehpyabasiha khaisa-khusu gjai jaba nuhkade ahr ang rehpbaha rehpgorohn rehphajaokhade phoriyaraukhe saikhulamane bihlahadu.

- | | | |
|------------|---|------------------|
| 1. Ahnsa | : | Khrao |
| 2. Aphna | : | Mlai |
| 3. Banjihk | : | Bantla / Bandola |

4. Basai	:	Bihi	
5. Basau	:	Bakhla	
6. Bda	:	Bubi	
7. Beren (serial)	:	Gublung	
8. Bidi @	:	Bgab	@ Bidini ortho bangbi, eraha samlai bidi odelaiyabakhe thihba.
9. Bising	:	Baiji	
10. Bkhan	:	Naisleba	
11. Blabba	:	Groba	
12. Blibba	:	Mthainba	
13. Blilai (past)	:	Bliphai (future)	
14. Blingba / Blengba	:	Geder	
15. Bodo	:	Buduri	
16. Bojor	:	Khaoda/Saikhao	
17. Brabba	:	Miliba	
18. Braiba	:	Phainba	
19. Bringba	:	Phrihk-phrihk	
20. Burna	:	Bupha	
21. Bungba / Bumba / Bimba (thick)	:	Singba (thin)	
22. Daumah	:	Dausa	
23. Dain gablai/Dain gibim	:	Dain thiba/Dain griba	
24. Daokhuba	:	Daoglaiba / Daokhlaiba	
25. Dehba	:	Khaseba	
26. Dehphaoba	:	Ramthaiba	
27. Di	:	Hah	
28. Diba	:	Khahba	
29. Dibba	:	Jiliba/Jliba	
30. Dikhro	:	Diyaphong / Diyaphang	
31. Dimih (whale)	:	Nahsa (small fish)	
32. Dimlang (sea/ocean)	:	Kharnai/Ditho/Wari (pond/lake)	
33. Dongba	:	Griba	
34. Duhba (costly)	:	Laiba	
35. Dungba	:	Mgainba	
36. Gababa (joining)	:	Degauba	
37. Gablaiba	:	Khongja	
38. Gaisengba	:	Khurba	
39. Gthang	:	Githi/Gimin/Graing	
40. Gedeh	:	Khase	
41. Gejebba	:	Gubruba	
42. Gejer	:	Bijing	

43. Gdain	:	Gajam
44. Gibi	:	Mosol
45. Gibim	:	Phikhao/Gojo
46. Gidi	:	Gakha
47. Gidinglu	:	Gepher
48. Gimin	:	Gthang
49. Gjain	:	Rogong / Sampha
50. Glangba	:	Gligba
51. Glao	:	Sungthe / Songthe
52. Gnang	:	Dukhisa
53. Gosong	:	Gebeng
54. Grah	:	Gli/Gili
55. Grain	:	Gisi
56. Grigba	:	Bihriba
57. Gudung	:	Gesen/Mgain
58. Guphu	:	Gisim
59. Gusu	:	Gathar
60. Guthuba/Guthumba	:	Srieiba
61. Guyuba	:	Moyoba
62. Habsau	:	Dambrakhor
63. Hah-gojo	:	Di-gojo
64. Hahbudu/Habdu / Hadubuh	:	Hahgrain
65. Hahjihk	:	Hahblai/Hahsmaih / Haphlai
66. Hajaiba	:	Thiba
67. Hamjaoba	:	Naisleba
68. Hangiya / Hainga	:	Hangiyajihk / Haingajihk
69. Haphai(block/district/small territory)	:	Hahyung (nation/country)
70. Hayung (hadi haba)	:	Sainyung (sain dungba)
71. Hogblaiba	:	Hukhriba
72. Horthu	:	Horglai
73. Huiba	:	Phnuba
74. Jainba	:	Sampha
75. Jajaoba	:	Musuba
76. Jenba	:	Suthaoba/Jamba
77. Jihk	:	Jla
78. Jlang	:	Maising
79. Jnaba/Majahngba	:	Morbah
80. Jorai	:	Khaoyung
81. Joyah	:	Joyahjihk

82. Juba	:	Hiba
83. Jukhuba	:	Jogoba/Sasoba
84. Khajama	:	Waimu
85. Kharauba/Khadehba	:	Gimyao
86. Khasaoba	:	Naimaba
87. Khitha	:	Bujuo / Bujuh
88. Khothai	:	Mlang
89. Khruba	:	Phungba
90. Khurangsih	:	Thuraosih
91. Laihridim	:	Laihgrah/Blaih grah
92. Lamjaoba	:	Rukhlaba
93. Laoba	:	Sungba / Songba / Songthe
94. Lekhasih (singular number)	:	Lekhathu (plural number)
95. Lohnba	:	Khasaiba
96. Maigdain	:	Maigajam
97. Melsa	:	Melyung
98. Mithimba	:	Saikhlaiba
99. Mithimba	:	Nuhphlaba
100. Midimba	:	Maramba/Mramba
101. Miniba	:	Graba
102. Minsah (rehpmin khaseba)	:	Minmah (rehpmin gedehba)
103. Miyah	:	Masainjihk
104. Mthangba	:	Sthaiba
105. Muh naiba	:	Muh phungba
106. Muhjihba	:	Dasiba
107. Nehba	:	Sigba
108. Nohgdain	:	Nohgajam
109. Nohmah	:	Nohsa
110. Nohsgang	:	Nikhikhor
111. Pherbah	:	Jobba
112. Pherba/Phraba	:	Lenba
113. Phrong	:	Sainbli
114. Phuba	:	Simba
115. Phungbah (fat/healthy)	:	Ramba
116. Raja	:	Rani
117. Rajaba	:	Baleba
118. Rajisa	:	Rajiyung
119. Rauba	:	Miyaoba
120. Rehpmathao	:	Khu-rgai

121. Rgaoba	:	Regeba
122. Rijingba (light weight)	:	Risiba (heavy)
123. Rihmba/Remba	:	Haigarba
124. Rmaoba	:	Nehgarba
125. Sa	:	Sihk
126. Sain	:	Hor
127. Saingejer	:	Horgejer
128. Sainja	:	Sainjro
129. Sainjra doji	:	Horjra doji
130. Sainraoli	:	Horraoli
131. Sainyung	:	Hayung
132. Saujahng	:	Buthujahng
133. Sariphong	:	Naiju grah
134. Saumi	:	Muhgthang/Muhgathang
135. Sgang	:	Yahon
136. Sgangthao	:	Yahonthao
137. Siba	:	Rainba
138. Sraiba	:	Sthabba/Sdabba (sticky)
139. Sremba	:	Sububa
140. Sugu / Suk	:	Dukhu
141. Thaijen (prefix)	:	Thairik (suffix)
142. Thairili (poem/sonnet/lyrics)	:	Thaidab (prose)
143. Thimba	:	Nuhjaoba
144. Thuba	:	Smauba
145. Wah gli	:	Wah grah
146. Waihphri	:	Diphri
147. Wainsoba	:	Blaoba
148. Warba (wide)	:	Sebba (narrow)
149. Yahder	:	Boso
150. Yausih	:	Yauda
151. Yauwarba	:	Mithibba (khaithiba)

Gedemah Nirmal Diphusa graudimajahng rehpjuh rehpring sausi. Duha grau Dimani thaihseb rehpsaihi dong. Dimasa Sahitya Sabha, Karbi Anglong zila johmni melhoja dongba. Duhade Diphu Dimasa Clubni melhoja. State Bank of India nising Deputy Manager jahi retired jaba. Email : nirmaldifusa@gmail.com. Phone : 7637856486



Dimasaraoni Laihrimin Hadaithaihni Jarimin (Rajasau nising 1980 Maithai Sohsi)

Biswsajyoti Barman
Rongpur, Silchar

Dimasaraoni laihrimin graude sahitya (literature) hadaibani jarimin hamsining gjamsehmu. Dimasa rajanokhohade rja rja maithai sganghaning laihrimin hadaikhalai jadu. Dimasarao Khaspur, Maibang, Dimapurhasining raja jiba niya. Kamruphabo raja jikha thihhi jarimin rehpyaraoni grau. Odebani boh sainkhalihaning raja nokhohade grau Sanskrit jahng lahrimin hadaikhalai jadu. Dimasarao laihrimin rehph hadaibade duha nising maithai jahng 300 (rjatham) thaosonang niya. Thihkhabo jenbahade rehphi phaihide Dimasarao Sanskrit, Bangla odebasi grau jahngse laihrimin hadaiba odeh rajanohkhoni subung ahr raja nohkho jahng dophayarao sining olai hadaibalai jadu.

Pandit ringkhringraoni grau, Aryan grauni probhab jahng sainyausi sainja haphaini grau buthu hamkhudao phuyabane. Odehjahng eboh haphaiha gedeh Bodosa (Boro niya) rajiyung japhuya' bane. Jug-gejer (medieval period) ba boni sgangha dhormo yawaitai odeh rajaraoni jrumajahngse rehphi laihrimin yerba phaiha. Dimasa-Bodosa bongso nising yeryaba thaihyaba rajarao Kampur, Kochbihar, Herombo graude Cachar odeh Tipra (Tripura) rajiha Sanskrit, Bangla odebasi graujahng rajanokhoni khusi haphrai dangbane barabo boh graubuthukhe slinghi sahitya hadailaiba. Dimaraja Suradarpanarayanni (1708 - 1730 A.D.) sainkhali niphrang Dimarajathani Khaspur sahitya hadaithani bokho khongsi jare.

Dimasarao Bakhali Rehphenba, Sahitya Hadaiba ?

Sganghaning thikhka, jami mahgrau Dimasa jahng niyakhabo rajasauhaning laihsi rehphenba phaijhenba. Rehphenyahraobo Dimarajaraoning. Dimarajarao rangkhrai (coin), longthaimin (stone inscription) odeh laiherehph (letter) odebasi rehpbakhe garhi gihin rehpthaih khakhuhi rehphenyaba duha sohsi mithiba maphide raja Suradarpanarayan (Hasnusa). Boh raja jiba 1708 nising 1730 A.D.sohsi. Boni yahonha Ramchandrathwajnarayan, Krishnachandranarayan, Gobindachandra narayanbo rehpha thihdu. Krishnachandra Gobindachandra khaphuyung gnide laihsining rehplangkha (Mani Charan Barman,



Hoidimbo Bhasa Probesh, 2nd Edition, Bongabdo 1320; Upendra Chandra Guha, Cacharer Itibritta, 1912 A.D.).

Thiikhabo jenbaha thihhbalai Dimarajarao rehpyaba buthu Sanskrit odeh Bengali grau jahngse (sreba srebyaba olai rehpyabakhe Assamese grau thihibo dabi khlaidu). Bonsi Mdai khlimbani rjabthai (Devotional Song) rehpb. Elai rjabthai buthukhe Manicharan Barman rehpyaba odeh khaikoyaba Hoidimbo Bhasa Probesh (Hoidimbo Bhasa Probesh, 2nd edition, 1320 Beng, =1913 A.D.) bumuni laihsia mauidu. Suradarpa rehpyabakhe rengni mamang eraha sguhi ridu -

Deenadayamoyee nam tomar !!dhu !!
Shuniya bharosa boro hoiyache amar !!

Raja Krishnachandra 'Rasalilamrita' odeh 'Basantabihar' laihsia rehpb thihhi Upendra Chandra Guha-ni Cacharer Itibritta (Cacharer Itibritta, Asom Prakashan Parishad, Guwahati, 1972, p. 113) laihsia rehpyaba dong. Thiikhabo boh laihsia grang gnikebo smaihi maiya. Raja Gobindachandra rehpyaba laihsia grangni jakhade Srirasotsov Geetomala (Srirasotsov Geetomala) odeh horad jabaha rjabbyaba Keerton Geetika (Keerton Geetika). Eboh laihsia grang gniha sngang'ni grang sikhke yahonha Nikhil Cachar Haidimba Barman Samiti 1955 maithaiha odehe yahonnikhe Nalinindra Kumar Barman 1378 Bangabda (=1971 A.D.) maithaiha saphaihi khaikhoriba.

Raja Krishnachandra (1774 - 1813 A. D.) 1780 A.D. maithaiha Sanskrit jahng Mdai masainjik Chandikhe khlimhi rehpyaba rjabthaini chondokhe Bengali Novelist Bankimchandra rehpyaba 'Bande-Mataram' jahng suphjadune. Bohni rentham edehe -

Joyoti Shricharano Chondikang
Brohma-Hori-Horo
Seboye podo nokho Chondikang

.....

Ebokhe Nalinindra Kumar Barman English jahng edehe thaislaiba -

Glory be Thy graceful feet,
O, powerful Mother Chandi,
Which, manicured by crescent moon
Are adorned by the doyens of gods,
Brahma, Hari and Siva,
and lords of Demons

.....

(Queens of Cachar or Herambo & the History of Kachchhari ..., Bijoypur, Cachar, 2007, pp. 162-163).

Krishnachandra (1774 - 1813 A.D.) odeh Gobindachandra (1813 - 1830 A.D.) ni sainkhaliha raja nokhor jahang dophayarao gibin aristocrat Dimasarao laihsi rehpyarao bumu gnangrao jakhade Maniram Barman, Ananantaram Barman odeh Chandra Mohan Barman.

Ananta Ram Barman 'Brahmapurana' khe grau Bangla jahang thaislibane. Eboh laihsikhe jing maiba grih, eboni phantha khasa mamahng Cacharer Itibritta laihsia dong. Chandra Mohan Barman jakhade thairili khakhuba Bangla jahng. Boni sehngphong Haphilasa. Boh Raja Krishnachandra odeh Raja Gobindachandrani sainkhaliha Bikrompur haphaiha Commander in Chief (Haphai Sengyahsgao) dongba. Chandra Mohan rehpyaba thairili nising ren doh eraha sguhi ridu -

Herambo rajar nam jiggasila tumi !
 Mon diya shuno kohi opurbo kahini !!
 Krishnachandra name raja Haidambo Iswar !
 Tar bhrata Gobindachandra ek sohodor !!
 Krishnachandra somo raja nahi punyoban !
 Sotyobadi jitendriyo dhorme motiman !!

(Upendra Chandra Guha, Cacharer Itibritta, 2006, Edited, Parul Prakashani, Agartala, Tripura, p.83).

Ebobuthuni basauha Dimarajasauha rehpyaba gibin laihsibuthu jakhade 'Herambo Rajyer Dandabidhi', 'Herambo Rajyer Rinadanbidhi' odeh 'Das-dasi Bishoyok Puthi'.

Rajasauhaning ahr laihsi grangsi rehpyabani bumu jakhade 'Chikitsarnov'. Rehpha nripatmaj Gobindaram. Eboh Chikitsarnov laihsi jathai hungthainihi khlaihi Ayurved-ni moli-sandini laihsi. Eboh Gobindaram jakhade Dimaraja Tamradhwaj-ni bsah langjer Gambhirsingha nising yeryaba Anandaram Hasnu-ni bsah. Anandaram Tularam-ni bidi gidi jadao thaoyaba. Ebokhe rehpha 1768 saka (= 1744 A. D.) maithai bleb'ha (Srinaradi Rasamrita, 2007, Parul Prakashani, Kolkata, Edited by Amalendu Bhattacharjee, p. xxii). Eboh laihsini yahonthaoha grau Dima jahng rehpyaba ren sih dong thihdu. Boh edehe - 'Dephrangya Juphrangya Selengi Mdaita'.

Rajasau Jamba Yahon Nising Swadhinni Sgang Sosini Grau :

Dimaraja jiba jamsore 1854 A.D. maithaiha. Eboh maithaiha Tularam Senapatini bsani yau nising Sainkhlip Cachar (North Cachar)khe British East India Company yaumah lasolare. Eboni yahonha khurgai kharmin badera, rjabthai khakhulaikhabo laihrimin rehpha phaibade gbangning sehngnaikha.

Maithaijahng rjamaithai khon (20th century) jenphaiba blebhade grau Dimakhe rehph'hi phaihi slamkhumani habah jenbakhe jing nuba maidu. Eboh habaha Dimasani lugu

lugu Guphusah rehpyahsah odeh Christian Missionaryraoni graukhebo manlekha jahng jenphama nangdu. Christian dhoromokhe mithirimane roman rehpmi jahng grau Dimani laihsi baigo jenyabani bumu 'Ramos Rebyaba.' Roman rehpmi jahng grau Dima Phaiseb bumuni Dimasa pathigonit (Arithmetic) laihsi baigoba 1905 maithaiha. Laihsikhe Assam Secretariate Office nising khaikhobane. Eboni braibarai beseng dongba anagnigejer. Boh bleb'ha 1908 baigoyaba gibin laihsi grangsi jakhade W.C.M.Dundasni 'An Out Line Grammar And Dictionary Of The Kachari (Dimasa) Language (Based on Mani Charan Barman's Kachari Grammar). Braibarai beseng thokthamni eboh laihsikhe saphaiba Estern Bengal Assam Seretariate Press, Shillong. Eboni yahonha Rev. T.W.Reesni 'Elementary Cachari Grammar' baigoba 1911 maithaiha. Eboh buthukhe garhi S. Endleni Shillong nising 1884 maithaiha baigoyaba 'Out Line Grammar of the Kachari (Bara) Language' bumuni laihsia grau Dimani graukhe khaisa khusu nuba maiphadu. Erah ahr laihsi grangsi graukhe jenma nangre, boh jakhade Mr. C.A.Soppitni 'A Historical and Descriptive Account of the Kachari Tribes in the North Cachar Hills : With Specimens of Tales and Folk-lore'. Eboh laihsi baigoba 1885 A.D. maithaiha. Engraji jahng rehpyaba laihsia Dimasa khuhrgai Kharmin maji damsi dongphadu. Thihphajare, C. A. Soppit Veer Sambhudhan jahurkhuba sainkhaliha North Cachar Hills Sub-Division-ni Sub Divisional Officer (SDO) dongba. Boni laihsia Sambhudhan-ni graukhebo rehphadu.

Rajasauni yahonha baini maithaide Dimasarao laihsi rehpha phaiba thihi hamsi mithijaoya. Thihkhabo Dimasa gni jisgu rja maithai jamba bleb'ha bising bising laihsi rehphalai jadu. Bonsi gni jakhade Manicharan Barman (Dibragede) odeh Joykumar Rajiyung Barman. Graudimakhe slamkhune errine, phairine laihsi rehpyenya Manicharan Barman:

Sgangdayaba graude Manicharan Barman'ni laihsi Hoirombo Bhasa Probesh (Hoirombo Bhasa Probesh) 1st Edition baigoba 1904 A.D. maithaiha. Sganganing thikhha eboh laihsini juma lahining W.C.M.Dundas ni laihsi 'An Outline Grammar And Dictionary Of The Kachari (Dimasa) Language (Based on Mani Charan Barman's Kachari Grammar) baigoba 1908 A.D. maithaiha.

Manicharan Barman rehpyaba'ning grau Dimani graugonthai odeh word book / dictionary (Thaimin Laihsi / Thaiseb) baigo jenyaba laihsi. Eboh laihsia jenba gedehe Dimasani jariminni graubo khasa dongphadu. Eboh laihsini 1st editionkhe jing smaihi maiya. 2nd edition baigoba 1914 A.D. maithaiha. Eboh laihsini photo copy'de jinihabo dong. Manicharan Barman-ni laihsi thaba bangkhane. Hamside Hasaoha bephar khilaihyarao Hadisa odeh Thuruksarao boni laihsikhe braiba thihdu.

Manicharan Barman Cacharni Hawarmah nohlaini. Yahonha boh Barkhola rogong Bijoypur nohlaiha jaibure. Boh Dimaraja Krishnachandranarayan'ni montri dongyaba Joysing Barman alias Sulai (Dibragede) nising yeryaba. Hajairenha boh Joysing nising

doh (6th generation) thihdu. Manicharan 'ni Buphani bumu Ramjiban Barman. Sehngphong Dibragede. Bumahni bumu Chandradi thihi khnaba. Jilik Yamthaidi-ne.

Eboni yahonha baigoyaba laihsi jakhade Joy Kumar Rajiyung Barman-ni jarimin laihsi. Eboh Dimasa rehp 'hi baigojenyaba jarimin laihsi odeh grau Hadi jahng rehpyaba. Laihsini bumu Dimarajar Bongshavali (Dima Rajar Bongshavali). Eboh laihsi bakhali baigoba thihphrang phuma dusabi. Smuni thihkhade laihsia saphaihi khaikhobani tarik rehpyaba grih. Laihsia khosai graude chapter gibin gibin buthuni bakhlahi 1896, 1897, 1898 A.D. maithai rehpyaba dongkhabo eboh buthu laihsi khaikhoba maithai jathaothao jaya. Smuni thihkhade Joykumar Rajiyung Barman 1921 A.D. maithaiha jarkhe 39 maithai rakha thihi boh laihsihaning rehpphadu. Olai thihkhala 1921 maithaini yahonhase eboh laihsi baigobalai jadu.

Jing rikhihi mithiba maphi Joykumar Rajiyung Barman 'ni hajaithani Cacharni Thappha (duhani Chalitachera) nohlaine. Nagasauha boh Kohimaha thanghi sibaiyani Army Medical Crops Unit-ha gbahi promotion maihi Compounder jahi retired khlaibane. Boni bsathai, bisikthaithu duha Karbi Anglong zilani Dhansiri haphaiha dong thihdu.

Swadhin jayasaniha laihsi rehpyarao ar gni dongba thihi jing rikhihi mithiphukha. Bonsi gni jakhade 'Jamya' thihi hamsi mithijaoyaba Debicharan Barman odehe Trailokhya Barman. Thihkhabo bonsini laihsi swadhinni yahonhase saphaihi baigoba.

Trailokhya Barman 'ni laihsi Sotyo Narayanni Panchali (Satyo Narayanni Panchali) 1947 A.D. ha 1st Edition, yahonha 1950 A.D. ha 2nd Edition baigoba. Khaikhoriba rehpyahni nobrajik Nrityamoyee Barmmani. Eboh laihsi Bangla nising grau Dimaha thaislaiyaba laihsilai jadu. Ebohning grau Dima jahng baigojenyaba thaislai-laihsi jama nangre. Laihsikhe 1928 A.D. maithaiha rehpsoba thihi yahonthaotha saphaiphadu. Trailokhya Cacharni Dalu nohlaini. Eraha laihsini yahonthao nising ren doh sguhi ridu -

“ShriSatyonarayan kharmu khurub gibi gaja !
 ShriSantyonarayan thihi Hari bolo thihga !!
 Hari Hari Hari thihi jarni hahng johre !
 Dambrathani soh sohire pap khaitharre !!
 Rungyaraobo goron langdu raoyaraobo jendu !
 Ode thihi Gorlosani Trailokya kharmu sajamdu !!

Eboh nising mithiphukha Trailokya Barman 'ni sengphong Gorlosa. Buphani bumu Ranjit. Boni bihi Nrityamoyee jakhade Milaopha thihi bumu jayaba Nandalal Barman 'ni bisik. Nandalal bumugngang dongba. Boh rajanokhoni subung. Bumah Shoilindri; bupha Ramprasad Barman (Laobangdisa) Rani Chandrakala 'ni mdaikhohni pujari dongba thihdu.

Swadhin'ni sganha Hawarha rjabba blaibani khlaihi ar sausini hamsining bumu jabane. Boh Cacharni Bijoypur nohlaini rjabring 'Jamyā' thihi mithijaoba.

“Jima lungma girikhabo malaini majiha,
Subung thihi thijaolaba rungba gurubaha.
Dimasaha dini sosi subung olaiyaba,
Baigoyako nujaoyako olai thijaoyaba
'Jamyā' thihi odebani thijaolabane,
Bumang basau jamlangkhabo bumu jamyane.”

Jamyani asol bumu jakhade Debicharan Barman (Sengphongde Laobangdisa). Boh jakhade Dimasani sausi charan kobi dongba. Swadhin'ni sganha Belah (jadisi string instrument) damhi rjabrene, Dimasaraoni nohlai nohlai daobailangrene, rjabthai khakhu phalangrene, brabai brabai nomah thaophalangre odeh khnathaosisi rjabphalangrene. Boni rjabthai buthukhe smaikhonhi bojom khlaihi yahonha Nikhil Cachar Haidimba Barman Samiti 'Jamyani Rajathai' thihi laihsi khaikhoba 1955 A. D. maithaiha. Laihsiha Jamyani rjabthai 47 damsi dong. Nalaini jathai yawaitai, dukhu hadi jing nuyaba jayabakhe maiphahining boni rjabthai buthu. Eraha jing khribnihabo dophayaba Jamyani rjabthai thaisi suguhi ridu -

“Hajaihi habsauha hamba khusi dangyakha.
Hamyaba danghinu dude, tima japhaikha.
Ansahabo malao lakha nagahabo daobailakha,
Bohade hamba dangyakha dude rapaikha.
Hambakhobo dangpuyakha jabakhobo tipuyakha
Lama gajain himpuyakha iyasugu sapaikha.
Debi tidu habsauhala tiglaolainu nuh baolabala,
Jaglaolainu nuh baobala dude wainsokha !”

Swadhin Maiba Maithai Nising Jenhi Dimacha Magazine Baigothaoba Sohsi

Dimasa Laihrimin habah-ha rajasauha odeh boni yahonhabo Cacharni Dimasaraonining yaublai dongba bangdaoba. Olaining swadhinni yahonhabo. Jini desh Bharatbarsa swadhin jaba 1947 maithaiha. Eboh nising jenhi maithai 25 (khonbonwa) damside Dimasa khribni laihrimin habbaha Hawar (Cachar) ni Dimasaraonining yaublai phunudaobase. Boh bleb'ha 1954 maithai bleb'ha Cacharni Dalu nohlaiha yau jahng rehph'hi sahitya patrika grangsih khaikhoba. Bokhe naisoyahrao jakhade Shansangka Barman, Mohanlal Barman odeh Uttam Chand Barman-thu. Oraha Nirupama Barman (Hagjer)bo thairili rehpbane. Thihphajare, Nirupamani Bijoypur nohlai Doluni nohlaihari. Elai

danglaithaining yahonha 'Dimacha' magazine khaikhomani bauthai mairibalai jadu. Odejahng, eboh maithai khonbonwaha laihsi baigobathanebo dedaoyaba grau jakhade laihrimin hadai khaoyung'ni habah jenthai.

Boh habahni bumu Dimacha (Dimasa) laihsijab' laihsi graude magazine. Eboh baigojenba 1960-61 A.D. maithaiha. Thihkhabo eboni sgangha laihsi grang bonwa damsi baigokha. Eboh phantha bangdaoning swadhinni sgangha rehpha phaibani yaublai.

Graudimani rjabthaini laihsi baigojenba 1950 A.D. maithaiha. Rehpha Cacharni Dalu nohlaini Kamini Ranjan Barman (sehngphong Ardao). Laihsini bumu Daing. Eboha thaiside Rabindranatha Tagore ni rjabthaihkhe grau Dima jahng thaislaiyaba.

Boh hathoha 1955 maithaiha Nikhil Cachar Haidimba Barman Samiti laihsi grangtham khaikhoba. Grang gnini graukhe sganghaning rehpkha. Grang sih Raja Gobindachndra-ni 'Moharasilamrita' odeh ar grang sih jakhade Debicharan Barmanni 'Jamyani Rajathai'. Thaoyaba grang sih jakhade - 'Malaukhrung-ni Malauthai Rongha Dihaseh'. Ebokhe rehpha Digbijoy Barman (Laobangdisa). Boh Jamyani bsah. Cacharni Bijoypur nohlaini. Eraha boni Mdai Gurukhe khlimyaba rjabthai grau Dima jahng dongyabakhe boni laihsi nising suguhi ridu -

Bumang basau thihsophuya
Dongba hathani thihtharphuya
Kurubnebo thangdao (nung) thangdao guru!
Nungkhe khulumdu.

.....

Hormauba wai jengbalai
Jabla kani (nung) haprang olai
Nini iyagani iyapaduri lahi khulumdu.
'Jamyacha' githi gamau
Bakka giri nungkhe nugalau
(Bokhe) Phungsi mamang kasaudi nung
gonghi khulumdu
(Bokhe pungsika kasaudi nung grahi khulumdu.)

Eboh japhnuthaisa (dov-jatra pala) khe Bangla 'Nouka Bilas' nising thaislaibalai dongmaijaodu. Laihsikhe Nikhil Cachar Haidimba Barman Samitini jahi danghojagao Anil Kumar Barman (Kemprai) khaikhoba. Minisi 2019 maithaiha Gedemajik Umashashi Barman Silchar nising laihsikhe saphaihi khaikhophinkhane.

Eboh maithai buthuha gibin karon mungsini khlaihi rjabathai khakhulaiba odeh japhunuthai (Jatra-pala) khakhulaibakhoh. Eboh japhunu-pala buthu laihsi jahi



baigoyakhabo eboh buthukhe laihsimin hadaithai thihi rimajadu. Boh bleb'ha Cacharha jatra-pala rehpyarao odehe japhnuyarao haphai gibin gibinha dongba. Eboh jatra-pala, dob-jatra, theathre-buthu sorasi gbangning sol jaba.

Khaspur haphai Noyarbond nohlaini Ramkrishna Barman (Diruwa) japhunuthai magni rehpha - Kamrup Raji odehe Heremdi thihi. Cacharni Dalu nohlaini Kamini Barman (Ardao) rehpyaba japhunuthai magni jakahade Maihi Phaiba Habsauha odeh Kamala Rani. Ganganagar nohlaini Phanibhusan Barman (Haflongbar, duha Diphuha dongyaba rjabring) boh japhunuthai rehph'hi bairiba. Japhunuthaini bumu Gjaibani Dukhu. Boh bleb'ha odeh yahonha Hasaoni Nabdilangtingha M. E. Schoolni Headmaster jahi dongyaba Vijayananda Barman Khemprai japhunuthaih rehph'hi slingrihi japhunuriba. Boh buthukhe boh haphaiha hamsining hamjaolaikhane. Boh rehpyabasi japhunuthaihbutu jakhade - Dima-Raja Jashonarayan (Jarimingnang Japhnuthaih) ; Raja Harish Chandra Narayan (Jarimingnang Japhnuthaih); Hamyagri-Thaoyagri (Samajik Japhnuthaih) ; Vir Sambhudhan (Jarimingnang Japhnuthaih) odeh Karnarjun (Mohabharat'ni kharmin maiphahi Japhnuthaih).

Boh sainkhalihai Nikhil Cachar Haidimba Barman Samiti salaihi maithai sihni phinsi Birat Sabha (melmah) jare. Boha rjabmanebo rjabthai khakhulaire. Nani Gopal Barman (Dibragede) khakhuyaba ahr birili riyaba olai rjabthai thaisi -

“Thuyaba jadi diniha bajahi
 Buthu buthu phaidu badha maniyahi
 Jadini hamba labuma dini
 Phai phai sehngyah phai vir dini
 Ridi joy, tidi joy, ridi joy
 Joy joy Ranachandini.
 Garhi miniba malaoba seleba
 Dhormo diyarao saukhe khaba
 Hamba lamaha khurubbo phaidi
 Phai naga mathla phai bumah bupha;
 Ridi joy, tidi joy, ridi joy
 Joy joy Ranachandini.”

Slingjenkhoha Graudimakhe Phoririba Jengrongba :

Eboh joraha 'Deemasa Porijen (Poriseh)' laihsi grangsi baigobalai jadu. Laihsiha khaikhoba maithai rehpyaba grih, grau Dimani eboh porijen laihsikhe Shillong'ni Aguan pressha saphaiba thihide rehpphadu. Eboh laihsikhe 1955-56 maithai bleb'ha saphaiba thihi Gedemajik Niripama Hagjer-ni rehphu maisiha maiba (Nirupama Hagjer, Dimacha



Sahitya, Khurang, Maithaijen, khaikhogajen, 2011, Haflong, p.30). Khaikhoba - Haflong Bodo Sahitya Sabha. Eboh laihsikhe Hasao rajini slingjenkhoh buthuha phoririba jenbamuhne. Thihkhabo maithai sih phoririgronghi rajkanti (Political) ni bar bokhe giphinribane thihi Gedemajik Hagjer rehp'phadu (ibid, p.31).

Boh joraha Bodo (Boro niya) grau khaoyung slammani habah-ha gbahgronghi Dimasa hojarao himjaibalai jabakho. Boro bumuni laihsikhe ha Gedemah Joybhadra Hagjer odeh Sonarm Thaosen phinsi phingni rehp'kha. Eboh buthukhe mithidaoma nangjaoyarao boh laihsikhe phorilailathing odeh rikhiseng lailathingmuh. Smuni thihkhade eboh jariminkhe mithima nangre yahonni lamah sringrimane.

Dimacha Magazine :

Graudima jahng baigojenyaba magazine'ni bumu Dimacha (Dimasa). Baigoba Cacharni Silchar nising. Baigojenba maithaih 1960-61 A.D. Jajenyaba editor jakhade Girish Chandra Barman. Eboh magazinekhe khaikhoba Dimacha Chatra Samiti bosong jahi Dimacha Magazine Committeeni dara jahng. Maithai jra damsia eboh magazine bidihng jogoyasi baigoba. 1972 A.D. sohsi maithai jigini damside eboh Dimacha bumuni magazine mamahng sining grau Dima jahng laihrimin hadaimani hadam riba. Eboha sausi gni Bangla odeh English jahngbo rehpre.

Sre rehpya eboha ! Dimasa laihrimin rehpijenyahraoha grahrao Sonaram Thaosen, Anil Kumar Barman (Kempri), Nirupama Hagjer, Nalinindra Kumar Barman (Kempri), Jatindralal Thaosen, Uttam Chand Barman (Hagjer), Nojendra Barman (Nunisa), Anil Kumar Barman (Daolagajau)-thuni rehpu jahng eboh magazine ghang jakhuba. Gibin jadiraoha rehpyah sausi jakhade bumugngang jariminkhring Debabrata Dutta. Eboh magazineha rehpuh, thairili, kharmin, mnithai-therkhu odebasi dongre. Graudima jahng rehpyabang bangdao, maphao sining Bangla, English jahng dongba. Rehpyarao dongba Hasao, Hawar, Dembra, Dijuwani khrib haphaini Dimasarao. Magazine khaikhomani rahngbo khrib haphai nising jrure. Odejahng eboh gibi gibini laihrimin habah-ha Dimasa jadini yaphri, khurang'lai jaba. Odejahng eboh maithai jignikhede Dimacha jug thihjare.

Eboh Dimacha magazine-ni rehpu'hoja (editor) dongyarao jakhade -

- 1) Girish Chandra Barman, 1960-61; 2) Nandachand Barman, 1961-62; 3) Monoranjan Barman, 1962-63; 4) Monoranjan Barman, 1963-64; 5) Mukut Ranjan Barman, 1964-65; 6) Vijayananda Barman, 1965-66; 7) Vijayanabda Barman, 1966-67; 8) Birottam Barman, 1967-68; 9) Nripendra Kumar Barman, 1968-69; 10) Birendra Daolagupu, 1969-70, 11) Birendra Daolagupu, 1970-72, 12) Swarajmani Barman, 1972-73; 13) Birala Barman, 1973-74; 14) Birala Barman, 1974-75.

Eraha Dimacha magazine baigojenyaba nising Khaspur haphaini Thaligramni Ramkrishna Barman (Diruwa)ni thairilisa 'Graujma'khe suguhi ridu -

“Belepjahng kharimin thihngangmuh
 Kharimin belep thihrunnya.
 Belepjahng badera jonangmuh,
 Badera belep jorungya.
 Blaijahng laihsi rehpnangmuh,
 Laihsi blaijahng rehprungya.
 Hadam guphu maimuh gisim
 Bokhe jung dangrungya.”

1972 A.D. maithaih nising grau Dima jahng rehpha phaihba, laihrimin hadaibani habbaha khara-jug gdain khongsi jenphaire. Thikhkhabo Dimacha magazine baigophalangre 1974-75 sohsi.

1972 A.D. maithaihke smuni Graudimani laihrimin habsauha khara gdain jenyaba maithaih thihba boni gibin gibin karon dong. Boh maithaiha haphai gibin gibin nising grau Dima jahng graujsma laihsi, laihsjab odebasi baigoba. Graujma laihsi baigo jenba Haflong niphrang. Bumu–Gdain Khurang(Gdain Khurang). Khaikhoyah odeh Rehphoja Sonaram Thaosen. Baigoba 17 July, 1972. March bdain 1975 maithaihha baigothaore.

Boh beleb'hanig Cacharni Silchar nising Demalu thihi daingaprong'ni graujsma laihsi baigore 1973 maithaihha. Khaikhoyarao jakhade Silcharni Dimasarao. Bosong jaba - Uttamchand Barman (Hagjer), Suresh Chandra Barman (Hojai), Jaharlal Barman (Khera) odeh Naba Gopal Barman (Dibragede)-thu.

Ojahng Cacharni Khaspur haphai Thaligram nohlai nising Daunaijuh thihi daintham gaphrongni laihsjab grangsi baigore. Eboni rehphoja dongba Mahikshit Barman (Diruwa). Boh hatho bleb'ha Maibang nising Dimakhurang odeh Diphu nising Sainjurang laihsjab baigorekho.

Eboh maithaini bleb'ha laihsi gibin gibin baigokhakho. Boh buthu jakha -

1. Kirtan Gitika, 1971, Raja Gobinda Chandradhwaj Narayan rehyaba odeh slingriyaba horadni kirtan, Ebokhe Nalinindra Kr. Barman naisohi khaikhoba, Bijoypur, Borkhola, Cachar.
2. Deemacha Porigniba (Kho maner pathyo), 1972, Sonaram Thaosen, Haflong, N. C. Hills
3. Ansaraoni Sainrenlaih, 1972, eboh slingjenkhohni khilaihi Bangla rehpmi jahng

- saphaiyaba grau Dimani dharapat laihsi, Rehpba Jtindralal Thaosen; khaikhoba - Assam Phorilaihsi Naislam Naihi Khaikhoyarao, Gauhati.
4. Dimacha Bhasa Sikkha, 1972, Nirupama Hagjer, Bangla grau jahng rehpyaba eboh laihsi grau Dima slingneyaraone khilaihi.
 5. The Queens of Cachar or Herambo and the History of the Kachchhari Part I, 1972, Nalinindra Kr. Barman, Bijoypur, Barkhola.
 6. The Queens of Cachar or Herambo and the History of the Kachchhari Part II, 1974, Nalinindra Kr. Barman, Bijoypur, Barkhola.

Dimacha Magazine Baigothaoba-ni Yahon Nising Maithaih Bonwa :

Graudima jahng laihrimin hadaimane 1972, 1973 maithaih bleb'ha nujaoyaba khajathai, huraj hurja jalaihai budu glau thangba grih. Thihkhabo Dimacha magazine baigophalangkhako. Eboh magazine baigothaoba 1974-75 A.D. maithaiha. Gdain Khurang graujma laihsibo baigothaore 1975 maithahini March bdainha.

Eboni yahonha maithaih gni damside laihsi baigobani hisab maiya. Hamside rahng rih gmangbani khilaihi grau Dimani laihsi, laihsib graujmalaih baigosong phuyaba janaidu. Dangyaraobo dangsong phuyanaiba karon givin gibinni khilaihi. Dangneyarao sakhri dangyarao transfer jababo karon mungsi. Smuni thihkhade Dimasaraoha dubo suru suru hamsisi bubain baingneyarao maiba dubi. Odejahng Dimasaraoni jabaisini khilaihi habah khaoyung buthuni hahngduh laoya.

Cacharni khilaihide elai jabanibo karon givin dongbalai jadu. Boh jakhade hurja hurja jamani hadam givin maiboba. Boh hadam jakha All India Radioni Dimasa Programme. Silcharha All India Radio (AIR) jenre 1972 maithinih 11 August. Eboh AIRni Dimasa programmeha rjabma, garujuh joma, rjabthai rehpma, mukhri (rhyme) khakulaima, japhunuthaisa rehpma, slinglaima hadailaima odebasikhe harlaidaoba. Boh bleb'ha radio programme khnalaimakhebo khajalaiba bangba. Cachar ba Kolongma dibai haphaiha sining niya Dimasarao dongyarao haphai givin buthuhabo eboni bar sohiba. Odejahng grau Dima ahr laihrimin hadaibaha All India Radio'nibo habah dongba desabi.

Eboh joraha 1978 A.D. maithaihha Haflong nising grau Dimani thairili laihsi baigojenba. Rehpba Gedemah Jatindralal Thaosen. Laihsini bumu 'Deemasa Deemayung Sadeenang'. Khaikhoyah Gopal Chandra Naideeng. Graudimani baigojenyaba eboh laihsiha 100 (Rjasi) thairili odeh hojagede Joybhadra Hagjer'ni saurimin dongphadu. Dongjenyaba thairili 'Deemasa Deemayung Sadeenang'. Eboh thairili ren khonbrini. Bokhe eraha suguhi ridu -

Deemasa Deemayung Sadeenang

Magera thilikba khnaba
Deemaroo daobuhi phaibane
Deegalau jubuhi phaihineeng
Halae rajee khabane.
Halalee rajenee yahonha

Deemabong rajee khaphaiba
Deemabong jambanee yahonha
Maibangmah rajeeha thauphaiba.
Maibangmah halalee hamajang

Garyamuh garmaiba buthujahng
Maibangmah garbani yahonha
Khaspur rajee khabane.

Maibangmah Khaspur garmaikha
Mosomah yajongdi halakha
Naphimah khudabdi deelakha
Raja Hartikorha jambane.

Raja girinee Deemasa
Daumah girinee dausalai,
Amang Deemang jalahi-
Hasau Hawar thaobane.

Phai ! Adungrao ajangrao
Graudeema jo-iyarao
Magera graukhe hadaihi
Deemasa Deemayung Sadeenang.

Eboh laihsini thairilikhe All India Radioni Dimasa Programmeha Dimasa ansarao mukhri thihre odehe birili rihi rjabthai slamhibo rjabre. Dimasaroo grau Dima hadaiyahrao hamside rehpyarao eboh laihsikhe khrimhi phorima nangremuh. Eboh sining niya khraorao rehpyaba buthukhe phorima nangre. Smuni thikhade odejahng jadi jadi slingphudu. Hamside grau (language) slingma maidaodu.

Eraha Laihsini yahonthao nising thairili masi suguhi ridukho. Eboh, laihsi rehpyarao, laihrimin hadaiyarao khrib Dimasa rehpyahraoni khah bising'ni grauthai gibi.

Sumu Rehpnang Sumu Phaihnang

Sumu rehpnang sumu phaihnang
 Sumukhening jonang ;
 Rehpborehpnang phaihbo phaihnang
 Serening phorinang !
 Deemasani laihsi girih
 Graudeemah rehpnegirih
 Phorinebo subung girih
 Bede khlainang.
 Grau deemah grau majang
 Deemasarao subung majang
 Graudeemah ringyanang
 Jadi gmanang.

Phai ! Adung ajang jalairao
 Naga mathla khraorao
 Deemasa deemajik bangbasi
 Hasao hawarni dongbasi
 Grau Deemah jahng rehpnang phainang
 Jadi mathaunang.

Deemasa Deemayung Sadeenang thairili laihsi baigoba maithaihaning Cacharni Bijoypur nohlai nising ahr laihsi grang sih baigore. Boh laihsi jakhade English jahng rehpyaba jarimin laihsi. Rehpborehpnang Nalinindra Kumar Barman (Khemprai). Thihphajare, Barman - Deemasa Deemayung Sadeenang'khe sadiyabani bahau. Jarimin laihsini bumu 'The Queens of Cachar or Herambo and the History of the Kachchhari Part III'.

Eboning eboh maithai renji-ni baigothaoyaba laihsi janaidu. Lailangyaba maithai rjani bisabri renjikhede grau Dima hadaini habah jensongthai thihjare. Smuni thihkhade eboh nising maithai maithaibo grangsi niya grangsi laihsi baigophalangre. Eboh bisabri renji jenbabo bau gdainni jenthailaiko. Smuni olai thihba bokhe duha phlanang.

1980 ni sgang sosi Dimasarao jarde grau Dimani laihsi buthukhe Bangla ba Assamese rehpmi jahng sining saphairiba. Thihkhabo 1980 haning Dimasarao jar 'Roman' rehpmi jahng saphaihi laihsi khaokojenba. Olai khaikoyarao jakhade 'Jalairao Hosom'. Bonsi khaikhoyaba grau jma laihsini bumu jakhade 'Waimijing'. Boh grau jma laihsikhe nuhi ang hamsining khajare. Thihkhabo roman rehpmibani niya jalairao buthu khahi grausi jahi grau Dima hadaimane baigobani odeh ang jar sganghaning 'Waijum' thihi thairili rehpborehpnangbani. Waimijingkhe Cacharha Waijum thihyarao dong. Eboh grau jma laihsi bdainsini

janaidu. Sre rehphoja jaba wainsophuya. Sausi gniniha rikhihibo mithiphuyakha. Thihkhabo hoja-bosong jayaraoha Ramendra Langthasa, Johar Bodo'thu dongphabakhe wainsodu. Boh graujama laihsia ang jarbo Hawarni graujama beren rehphi haikha odehe baigojenkhe maithaihsilai sgangha rehpyaba thairilikhe haibaba. Dukhu nangsisi Silchar nising baigoyaba Demalulai eboh 'Waimijing' nibo copy duha smaihi maiya. Asaba jathing, Waimijingha ang rehpyaba baigoyaba thairilide ahni diary laihsia thaoba. Bokhe khasa juhsenghi slaihi baigojenyaba ahni thairili laihsihabo saphaiphaba. Jasosi niyakhabo bokhe eraha suguhi ridu -

Waimijing

Andharini hor maubaha
 Dukhu basainni khorosauha
 Sindai sugu, sindai sugu
 Waimijing hurkhu jengkhu.
 Hajai basainni nini harai
 Daobudi nihng andarikhe riksai
 Hurkhu hurkhu waislai
 Sauthai gjai guphun sauthai.
 Hamyadaoni thaire phinsni
 Wai phnangdi alangsni
 Arikhidimakhe rikhiphalang
 Dishru Demalukhe smaiphalang.

Waimijing waimijing
 Sain dainlai jengma nihng,
 Jlih khailai khaibu nihng
 Hajik haphlai nohmang nohsing.
 Hurkhu hurkhu waislai
 Hairingphalang hajik haphlai
 Smai danglai baigolai
 Sehngyasaro sehng dilai.

Gedemah Biswajyoti Barman (Daolagajau) Dimasa Sahitya Sabhani danggajam Melhoja, duha Sibringhoja. Graudimajahng rehpuh, thairili, kharminsa odebsi rehpre. Duh sosisi boni laihsi grang ji damsi baigokha. Assam sorkarni literary pensioner sausi. All India Radio, Silcharni Dimasa Programmeni Selection Grade Announcer dongba.



Kharmin-gdain :

Bithihase Julu Grenghase Sengphong?

Biswajit Barman (Maibangsa)

Rongpur, Silchar

Goronlaikhaning Daobaidao ahngkhe bonsini nohlaiha thangmane lugu khare. Thangma mijinghabo sramyabani boni graukhe mathaophuya. Odebani ahng lasisibo jajaolare. Thihkhabo sainsi gibi jahngning Daobaidaothuni nohlaiha sohikha. Bonsini noha dongbasi khribjahng khajasisi hainthirao jahng goronlaibalai jajaolakha. Sainlaithu sainlaithuning Daobaidao dorga ahngkhe singkha—

– Khna ahdung, jing Dimasaraola thihdu ‘grenghase sengphong, bithihase julu’ eboh grau gibibo?

Elai singthaini joraha glaiba grih, ahr baobabo maiya, gmanglakha. Smu thihmakho! Phrik phrik donglakhabo jajaonang niya baohi ahng thihlakha—

–Gibibo jalaphure, odebanise khribbo thihba.

Daobaidao bokhro jangkhraihi thihkha—

–U’hun, nihng bauyaba grau jaya. Eboh graukhe maiphahining nihngthane kharmin thaisi sainthinang. Kharmin thihkhabo mosol niyadou, jarni muh jahng nuyaba, khmau jahng khnayabase.

“Sumon jini nohlaini ahnsa sausi, townha donghi sorkari sakhri dangdu. Nohlaisiha deba juba, hakhlisi mlaulaibani Sumon Kabitakhe khribnetha khah jahng muh jahng hamjaodaoba. Ahnsa dongba sainkhali hakhlijuha bihi-basai mlaulaiba. Deba jubani yahonhabo khah muh mailaihi noh khongsi slammani saumin nuhlaikha. Sumon dainsiha phinsi noha phaikhaning Kabita-ni dauphangkhoha khamhi dainsini bojohm jayaba khah muh ni graukhe sainlaihi gnini hamjaolaitaikhe gejeddaorire. Kabitani bumah bupha tharmiya odede nisoya. Thihkhabo bumh buphala phdainha bubli phlaibaning bangdao.

Elai hamjaolaitaini dilamha gajaoba gajaothaojaohi Sumonbo noha phaiba bimdaokha. Elai nuhi khnahi bumani khmaubo gosong jadaokha. Bsani yaphri surba majangya, muh naiba bedebase jajaohi bsakhe jislikjaone khindada bsah sausi

mamangyabakhe sibringlakha. Bsahni mukhang phrangsong jadi-julu, judao-hidao, bithih-begrenni graukhe thihphlakha.

Thihkhabo Sumonni bauthaih jadi gibin, ringthaih lonthaih jadi gbinse. Boniha khah-muh dedao judao, juluthane khasih muhsi majangdao, gathar jadao. Odebani bumani mukhang phrangsong niyakhabo khah nangjaothai khening monthro lai bauhi bumani sibringthaikhe bijing saikhaosi denghakha.

Kabita ahr boni bumah-buphakhebo hamyade thihjaya. Sumonkhe majangsisi khamrihi somajni lonthai, dara-pharani graukhe thihlakha; mussi graukhebo huiya.

Thihkhabo Sumon gibindaoya. Boni grau thaisi sening. Jadi julu subungse slamba. Sausi hamyakhaning, boh juluni khribbo hamya jathaoya. Jathai jahngse subung gede khase, julu jahng niya. Ringthai gibise nangba. Eboh khribkhebo hamridu, majangridu, gathar slamdu. Kabitani ringthai gibi dong. Odebani boh gathar.

Grau era thaokhade, dini kharmin thihma nangyamuh. Gmangmanibo dongyamuh. Thihkhabo mdai daubathi thima, khah magni khah masi jabathi thihma! Sainsi bumah-bupha odeh sausijahngbo tharmai jaoyahi khah masi, muh masini smai phalaikha Sumon jahng Kabita. Townha tanghi court marriage khlailaikha. Bonsini grau jahng somajni daraphara lon gjai lonmosol nising degaobuhi khajasring nohkhoh daumane ya'bojor gni jahng yaphri sursmailaika.

Kharmin erahaning jamma nangremuh, thihkhabo jamya. Ahro thangdaohi gmangthai jonhi dongkho. Bsah sausi mamang jahngbo grau phaihjaobani khah dukhu jahng waimu jahng Sumon bumah sau hamyadao hamyadao jahi sainsi nohaning glaitaikha khroh gidingsaohi. Dergaha nanghi khroh brekhaokha. Thih tangba thaoya, hospital ha langkha. Graujma maibani lugu lugu Sumon jahng Kabitabo sohikha. Daktarkhe singbade daktar thihdu— 'bithi rimaning nangma, niyakhade khoja jayabakhe mathang phunang niya. Sumon, bupha odeh gibin hainthiraoni blood group naikha, miliya. Nohlaini haspatal blood bank grih. Medical College haspatal jainbi. Patient olai jonphunang niya. Bohabo Kabitani blood groupde naiyakho. Thihmathi thihyathi bauhi bauhi khinsi khinsibo Kabita thihkha—
— Ahni blood group ahmaini jahng milikhade ahng bithi rinang. Ahmaisining thangthing.

Khribbo Kabitani gedehe muhlolo naihi thaolailakha, mussibo bringmani hatho maiyahi. Daktar jonsophuyahi gebre gebre Kabitakhe bisingha langkha. Kabita ni blood

group milibani boning bithi rikha. Eboh mdaini muima na subungni khasaoma, humanity. Bithi riblaihi phaihining Kabita thihdu—

– Baba, ahng bithi ribakhe nisi sausibo ahmaine dathi. Ahni bithi ahmaini sauha dong thihi khnakhade ahmai hamsining dukhu nangmase.

Olaining mdai khasaobalai Sumon bumah hamkhuphaikha. Saujahngning songphudu, himphudu. Haspatal niphrang gobuma basainkhali Sumon jahng Kabita bumakhe laihimane haspatalha thangkha. Sumon bumah muthai gdain jahng bsakhke naihi singkha—

– Nihng saujahng sining lao? Nihiraola?

Sumon thimathi thiyathi jahi thu thu tha tha jabaihi bo ... bo..Bohaning Sumon bumah jrikkhaokha.

– ‘Baijiha dong.’ Sumon thihkha.

– ‘Baijiha! Kabita—’. Sumon buma longkha.

Kabita khinhi khinhi baijahng baijahng habphaikha. Sumonbo khindu. Smaba jama jabokha. Odebani thihlakha—

– Ahmai okhali lugu lugu nihngthane bithi nangba. Nini thi-jahng miliba maiphrang phuya. Babani ahnibo ninijahng miliya. Okhali bithi braiba maiyakhade nihngkhe mathangba dukhamuh.

– O, ahr Kabitanila?

– Han, o Kabitani— bokhede—

Sumon bumah thamsi baigohi thihkha—

– Nisi sapha gni jahng ahni sgangha mosol grau jokhabo, daktar ahangthane khrib thihtharkha.

Khnahe khribbo gmanglaikha. Kabita khinhi grahi busumani yathebha glaihi thihlakha—

– Ahmai ahngkhe map khilai, ah, ahng

Sumon bumah Kabitakhe khabaoha sikphalahi khasaomani yau jahng mudi phusarihi thihdu—

– Mapla ahngse sainma nangba.

– Elai grau khuha dalabu. Kabita thihlakha.

– Gibi Kabita, nihng khribni dara phara thel thel sbaitarkha. Sere thihma— subung gusu gede khase jare. Tharmaikha Sumon, nihng thiyaba grauning gibi. Subung jathai jahngning gede khase jabase, julu sengphong jahng niya. Kabitakhe nuhi, boni khusikhe nuhi eboh grau buthuning gibi thihi proman maikha.”


Daobaidaoni khuha eboh kharminkhe khnahe ahng musibo bringma hatho maiyahi

phrik phrik dongbahaning daobaidao thihphinbokha.

– Tharmaikha ahdung! Jing Dimasarao duha Sumon bumakhe smu thihma? Sauni bithihase julu? Ahdung bithila khribnibo gjauningthi. Julu gedeni bithihla smu gibindaoba? Thihkhala Sumon bumahni bithih odeh Kabitani bithihjahng bedehe baosi jakha?

Hahngmah sik'hi phrik phrik dongbane bara ahni smadi thihma dongbakho. Ahng dinibo Daobaidaoni boh singthaini thaislai phinphuyakho. Bilaiyaba gibi, bilaiyaba mosol?!

Kharminkhe Kolongma graujamalai nising suguba. 09 October, 1987 sainrikhiha eboh kharmin Kolongma graujamalaiha baigoba. Bangla rehpmi jahng dongyabakhe roman thaiminha rehpslaiba Biswajyoti Barman Daolagajau.



Rihampha

Nojendra Nunisa

Rihampha nohlaini gambura gnang raja. Mai, rahng, hah bo'gobra. Makham khabaosini khilaihi gmangma nangya. Dangmabo nangya. Mlaining dangladu.

X X X X X

Rihamphani sgangha gelas. Oraha ju-haro dong. Gejer jadukho. Ahr rogongha plate masi; oraha dong ju-khaji, daunoh hainkhe songba. Bijing saikhaosiha bottle jodeng thaisi. Khithuha ju-haro khaisa nuhadu. ... Ju groksi ahr mogong dosih. Thaoba thithani grih. Ju linghi Rihampha guju jahi raja jahi dong.

“O Rihampha! Rihampha!! Som khlaiba?”

“Phai, phai, khamphai. Mister Bedangseh dabo! Phai.”

“Rihamdi mamai ! Khamphlai masi labuhadi.”

Bisik rihamdi khamphlai masi labure. Ahr saniyakhabo plateha ju-khaji labumakhebo blaoyakho. Karon boh tharmidu je, bopha nishchoi yaohonha odebasi jinis labumani sanima thihi.

“Jrola braha thangkha? Lunghasain.” Bophani graukhe khnahi Rihamdi thihkha—
“Phorongha baigolangbani duha sosibo phaiyakho.”

“Aing, eboh ansa masikhede. Mlang jama jakha. Blaiyakha Ju-haro kheisa laharima baobade ...”

“Je nangyala. Kheisa khusijahngse phaiba.”

Bottle jodengha dongyaba ju-harokhe Bedengne gelas-ha lure. Gelas masi thib jakha. Mogong dosih bukhuha senghi Bedang thihkha—“Ahisa, nihng bisilai lahama ? Ahng riphure.”

“Duhade her ji thikhaning jare. Kono rokom eboh ganiya buthukhe yauha dengphukhaning jakha. Olai niyakhade ahni phadain hagra jamase. Ganise asol.”

“Achcha maire. Ahng dinining rihaphure. Nihng esabakhebo ahni oraha haiha.”

Elai thihi ju-haro lingtharhi Bedang samaba khusi dong thihi baijalangkha. Rihampha yahon thihrikhakha—“Jrokhe lamaha nukha dangkha thikhade sengga phaima thihadei.”

Ebokhe khnahi kheisa phaiphinhi Bedang thikhka—“O blaobase, Jrode nohlai bakhlaha ju linghi baola jahi dong. Som bola srab phaiphumakho.”

“Go boh ansa masikhe ahr blaiyakha. Ju daling thikhkhabo khnaya. Khali ju! Khali ju!! Ju ahr ju. Boh gmuhi thaoma jakha.” Rihampha khub thamsi baigore. Thikhkhabo som khlaima? Boh graujahng mamang ‘ju daling’ thihdu, ahr nije jakhade sainjahng horjahng ju lingdu. Jarning olai lamah phunuhila serekhe magnamakho? Manabanila grau lahajaonang? Lahajaoya. Olai grau lahajaoma thikhkade nije hamdama nangre.

Rihampha thamsijahng muthai nuyasi jakha. “Boh ansakhe dinide thik khalainang.” thihi baijabahaning baolajahng brum sublub’hi glaikha ahr lugu lugu gusumah baigokha. Gusubaha gahadiha bithih phaikha. Bithih gabakha. Maophuyahi orahaning thaokha.

Olai jaba nuhi Bedang phaiphinhi Rihamphakhe bamkhuphaikha, ahr noha dongyaba buthujahng milihi bichanaha langkha. Doctor lungkha. Doctor phorikkha khlaibaha T.B. bemarni proman maikha. Ahr boni mote Rihamphakhe Shillong ni T.B.Hospital-ha haihakha. Oraha boh maithai gatham naijaoma nangkha. Eboh hathohaning boni rahng-rih, mai, hah sesh jakha. Nira-khora jakha. Noh thihbani noh mamangseningkha thikhkhabo jare. Dongbasi sesh jakha bemaar naijaobahaning. Juharo Rihamphakhe sesh khlaikha.

Rahng-rih jambani yahonna, maithai thamjahng Rihampha hamkha. Hospital nephrang phailaba lamaiha orahani Doctor thihba je, “Nihng ahr ju dalingsi. Ju lingkha thikhkade nini bemaar gukhurmase.”

Rihampha orahade “Dei, dude ju linyakha” thihba. Thikhkhabo baisila som linyahi dongphuma! Hospital nephrang gobajahngning Shillongha juharoni moholkhese nukhulaihikha! Bas, ahr shuru. Moholha linghi mamang thaoyakho, bothol jodeng masihabo labubakho hotelha lingmani. Thikhkhabo khub khah dukhuni grau je, sibrai Rihampha boh jukhe lingmane mamangbo somoi maiyakha. Juharo bottle bamhi Rihampha boh dongyaba hotelha phaimane bus masiha gakhuhakha. Busha boh thik derga rogongha khamba. Lamah gogoiha bus gari gidingsahaning Rihamphani jodeng juharo bottle yau geblehi baijiha baigolangkha. Ahr Rihampha bottleni niyakhabo juharoni mayajahng bottle rimhama jabahaning jarbo baijiha baigosolangkha ahr harang bakhalaha graisenghi Rihamphakhede

samaibaning maiyakha. Bottle jakhade jodeng nephrang jagaohi boh harang bakhalaha Rihamphajahng baosi thangphakha ahr bokhro jodeng lamaha thaolakha.

Eboh kharminkhe 'Dimacha' laiijhab (1965-66) khaikhogadoh nising suguba. Bangla rehpmi jahng dongyabakhe roman rehpmi jahng rehpslaiba Biswajyoti Barman (Daolagajau).

Saikhu'johmyah ni grau : Eboh kharminsah grau'dimani laiijhab baigojenyaba 'Dimacha' magazine ni 1965-66 issue ha baigoba. Boh magazineha eboh kharmi khakhuyabani bumuni lugu sengphong rehphaya. Thikhabo bumuni bakhlaha nohlai Sibnagar, Dhansiri thihi rehpu. Odehjahng eboh kharmi khakhuyasah Dimasa Sahitya Sabhani melhoja dongyaba Gedemah Nojendra Nunisa-se thihi rikhihi mithiphukha.

Khuhrai Kharminsah :

Thoroga jahng Maogusa-ni Kharmin

Mohanjoy Barman (Hojai)

Joypur, Cachar

Hagra masiha thoroga jahng maogusah masi khaphling khalaihi donglaibane. Khaphling sablaiba thihkhabo sainsini sausi jahng sausi nulaiyahi donglaiphuyane. Gni jahng khusi dangsmailaire, sausi sausini noha thanglaire phailaire. Elaining gni jahng basain phlaihi khaja-mini donglaire.

Sainsibakhali maogusah thorogakhe bothorbliha hagraha bathai-bikhim samaijima thangmane lugu khakhane. Maogusabo nohni khusi sining bisi dangma lugu jahng hagra daobaibahabo khajama dong bauhi lugune grau rilakha. Odehe sainsibakhali gni jahng hagra thangmane baigolaikha.

Gni jahng hagra hursihi thanghi thanghi gathai siha thailik gimin buphangkhe mailaihikha. Thailik giminkhe nuhila maogusala libibala ede thihphuyakha. Libihi khudi molobase moloba jasikha. Olai nuhi thoroga maugusakhe thihkha, “Dei thihkhade khapling thailik khaojilainang. Nihngla bongphang sau gakhuphudu, angla gakhuphuya. Gakhuhi nihng jibo ji odehe anghanebo bakhlahai thaisi thaigni khokhlaiha.” Thorogani grauthaikhe maihining maogusa thailikphang sauha gakhulangka. Gakhuhi maogusala sumukhe thihma, thailik khuba jiba khlaihi thailik bedeng gederangmakhe jitharbalaining jakha. Sihbrai thorogane rining rihaya. Bedeba jahi jiba hathoha yau niphrang glaiyaba thailik thaisikhe thoroga hah niphrang khonjibala hamsining thaojaolakha, dijaolakhane. Odebani thoroga khaphling maogusakhe bothanebo khaisa thailik buphangkhlaha lemklairihamane alang alang thihlahakha. Thihkhabo maogusa jibani lalos jahng khaphlingkhebo thokhihi ‘khaisa jon’ thihi jarni boho gablaisi thailik jitharlakhane. Odehe yaohonhase khima mijinghi thailikphang blai jekhaohi khisengdada buju juhi bakhlahai thorogane ‘ge thailik gimin ble’ thihi rihakhane.

Thorogala khathikbani gibi gibi bauhi bakhlahai bujuh lemklaihayabakhe khonkhuhi khuruhi jinaibala sumu thihma bikhi bahai hau hau. Thihkhabo thoroga basainha dongbani jaba baulahi thamsikhe phaikhonghi, khahdukhu phoronhi phrik phrik donglakha. Bauthaiba ringbani maogusa jahng nalailaining lugu khalaihi donglakha.

Danangla sainsibakhali, olaining hagraha breh phaijima thihise maogusala

thorogakhe lugu khaphinbokha. Thorogabo khaphling thihbani niyalaphuyahi thangsmaine grau rilakha. Gni jahng breh phaijime hagra thanglaibokha. Olaining hagra hurlaihi gathaisiha brega dongyaba bondo longkhor masi mailiaihikha. Danangla maogusa thorogakhe thikhha, “Khaphling ! nihngla bongphang basauha gakhuphuya, ahr nini yaula ahnili lauya. Thihkhaning anging gakhui bondoni brega longkhorha yau jaosenghi breh- bsakhe khnojinang odeh ningthanebo rihanang. Nihng buphang bakhlahasing jonjihi dong.” Thorogabo lonlahi bongphang bakhlahi jonjihi donglakhane. Danangla maogusala jathai slaidaoyahi mnang sganghalaining longkhorha yau khnosenghaba brega bsakhe jibase jiba khlaikhathi. Thorogane rining rihaya. Thoroga khaisa brega bsah sainjilakhabo ‘khaisa naisongkho’ thihi maogusa jar haslalai jilabaseh jilaba. Yau jahng khnohi jiba hathoha maogusani yau nising masi magni brega bsa bakhlahi graiphaiyakhe khonjilahi thoroga jimakhomudou bauhi naikhubaihi thaolakha.

Yaohonha bongphang basauha sumu jakha thikhade, olai thaoyasi khnojibani esephese jajaohi brega buthu maogusani yaukhe longkhor bisingha waihi khophuyasi dukhurikhlaihakhane. Danangla maogusala bre buthu jahng digjaobani saba ede thihphuya, longkhor nising yaubo khophuya jahi grama mijingsi jakhane.

Thorga jakhade maogusa olai jabakhe nuhibo nuyamaisihi brega bsah sainjihakhane. Maogusa jakhade sajauba jahng yau khophuyaba jahang jabaha sainjibani thamsi baigohi thihakha, “Sumadikhe isi rihama sanidu, napphani bokhrokhe rihama ! Ahni yaukhe brega buthu longkhorha digphungtharkha— saba blaiyakha; elai jathaike nihng bakhla niphrang nuhaya ?! Sugao brabaini !” Thoroga thihlakha, “Thikhala duh bedeh khlaimekhoh khaphling ?” Maogusa thihbokha, “Khna khaphling, eboh bondokhe dainsomane nihng ahni noha ‘rowa’ laiithaga, niyakhade janang niyakha.” Blaujaone khinhi maogusa thorogakhe ‘rowa-rowa’ thihphalangma sanikhakho. Thorogabo ‘dei’ thihi maogusa khnaba maidusi ‘rowa rowa’ thihphalangkhane. Odehe gajainha sohidada mnang thailik sainjibaha thokhijaobakhe wainsohi haslese jahi khah bising bising thikhane— “Yawai thaibade dubi, baslai yawai subade laibi !”

Maogusani noha sohidada thorogala bra rowa sainma maogusakhe phainsenghi jima lingmanese sainkhathi, “Baoji, baoji, khaphlingde hagraha brega phaijiba lengbani hamsining hukhriba, di gangba blaiyakhane. Odebani srab khilaihi sauha bolmah phaiphinmane nah, mogong, daudi, lodama samlai songhi odeh maiju brengi angkhebo jirihmane odehe khaphlingnebo bangsasa khilaihi juhi rihamane nihngkhe sanihadu.” Maogusani bihibo lonlahi thihbalilai songkha jirikha odehe basai maogusanebo bangsasa khilaihi laiha bujuh khahi thorogane yaophakha. Thorogabo maiju makham bujukhe juliha lahi baigolangkha.

Brega phaijiyaba hathaniha sohidada khaisa gajain niphrangning Thoroga boni khaphling Maogusakhe thihakhane, “Go labukha khaphling. Nah, mogong, daudi, lodama

jahng samlai songhi maiju makham bujuh nini khlaihi labukha. Nihng akhaihi jilaphai khaphling.” Thorogani boh graukhe khnahi Maogusala sajaobani dagjahng thamsi mukhang jahng Thorogakhe thihkha, “Nihng napphani sumu bosthukhe labuba ? Nihngkhela rowakhese labuma sanibathi ! Sumu jabani blaoma nangba, brabaini sugao !” Thorogabo thokhihi thihkha, “Hai, angbo lamayungha lugurao jahng khaisa sainlaithaoba hathohase rowani graukhela blaolangbathi. Thihkhala duhala bedeh khlaimakhoh khaphling !” Maogusa thihphinkha, “Labuyaba bosthukhe jithar odehe ‘rowa’ ‘rowa’ thihi thangphin. Srab rowa lahi phinphin. Bondo longkhorkhe dainkhaoma nangdu.”

Thorogabo mlai thamsi baigoba hathoha hasle sle khlaihi labuyabasikhe jithardada ‘rowa’ ‘rowa’ thihi nohlai gedeh thangbokha. Maogusa khnadusi ‘rowa’ rowa’ thihphalangka odehe Maogusani noha sohidada Thoroga Maogusani bihikhe thokhihi jasisi khlaihi thihkha, “Baoji, baoji, khaphlingde brega phajjiba gabangning lengjaokha, judi gabangning libikhane. Judi linghi budi-halai khaikhohi brega phaima nangmasene. Odebani khaphlingde noha dongyaba hola halaiba khening dainghi mogong samlai songhi odehe jugra yung nangyabakhe juthai lusenghi judi sogoryaba judi gidikhe anghane riphahama sanihabodu. Angkhebo srab jihi linghi thangphinma sanihadu.” Thorogani graukhe gibining baulahi Maogusa bihila dangtharlakha, songtharlakha; Thoroganebo khroh nangsi jirikha lingrikha odehe basaine khlaihi judi jahng mogong samlaijuh riphahakhane.

Thorogabo bosthu buthukhe laphatharhi gaire gaire khlaihi baigobokha. Hagraha brega phaithaniha sohiyadusi ‘Angkhe bikhi jiribala duha buphani mdai nuh’ thihi khah bising bising baophalangka. Brega phaihthaniha sohidada kahisa gajain niphrangning Maogusakhe thihhabokha, “Khaphling, jilaphai linglaphai, baoji nihngthane riphahaba.” Maogusa jakhade sajaoba jahng blaiphuyahi dong, thamsi jahng Thorogakhe thihhabokha, “Napphani sumu bosthukhe jimane labuboba ? ! Nihngkhela rowa labunese alang alang sanibada ! Sumuni isi blaoma nangba ! Blahm giriyayaba subung, wainsoba maiya ?!” Maogusajahng sarijaobaha hasle-hasle blaubalai jahi Maogusakhe thihphinkha, “Da khaphling, nihngla brega phaibaha lengbani lingmanese judi khaji libibani nohni jugra yung nangba juthaini judikhe odehe hola ho laibani mogongkhe khaji khlaihi labumanese sanibalai angla dongmaiiaodulao ! Odebani angla rowa-ni graukhela blaolanglakha dabo.” Thorogani olai grau khnahi Maogusala wailai dungkhuhi Thorogakhe thihphinkha, “Duha nihng labuyaba bosthu buthukhe jitharhi lingtharhi noha thangphin odeh srab rowa labuhi phai, blaomainang niya. Duha nihng blaore thihkhade waiha thihkhabo khamma, diha thihkhabo glikma. Mnaghalaining rowa rowa thihphalang.” Judi khaji buthukhe jitharhi lingtharhi ho-phlam-phlam jahi Thoroga rowa rowa thihi thangphinbokha.

Thoroga jakhade khaphling Maogusa jahng bikhi jirijaobani graukhe blauning blauphuya. Odebani khabu maibaha phredu. Boh Maogusa khnahadusi ‘rowa rowa’ thihphalangbokha odehe Maogusani noha sohidada thokhihibokha. “Jayabokhathi baoji;

brega bumah bangba ede thihphuya, odehebani waikhudi bullung nangdune. Waikhudi bullung jangsining brega-bumah buthukhe khairiphusima, khaphlingkhebo sogophusima. Niyakhade jathaide desakha bauji. Odehbani khaphlingde nisini nohyungmah noh-gungraikhe saukhuhi waikhudi bullungkhe hairihama sanihadu. Orani wa phonthoni saukhuyaba jahngde musi khusi riya, baoji ! Odehebani nohni bosthu bandi buthukhe nohsur nobroni noha dengdahi thathirihi nohyungmakhe saukhurihi waikhudi bullung hairimani blahmkhe slamrithing thihi baujikhe sanimane khaphling angkhe alang alang thihaba. Khaphling duha oraha bedeha jahi dong baujibo yaohonha nailahitha. Thorogani graukhe khnahi Maogusani bihila gabangning gmang gji jalakha. Thiphrangphuya jophrangphuya jahi baubailakha, 'nohla subungnetha nangyadao, apod bipod jakhala rajikhorni subung buthuni jurumajahngbo nohkhele dangphinriphudu, Subungkhela olai maiphinnang thiyathi.' Thihkhaning basaini khlaihi khah-doya, muh-doya jahng Maogusani bihi Thoroga thihbalining danglakha. Bosthu bandi buthukhe nohbroha dengtharhi noh gungrai gederangmakhe saukhukhlaihakhane.

Nohyungmakhe saukhurihi waikhudi lung-lung jaba jahngning Thorogabo sigalandi phrahi Maogusa brega khojithaniha thangphinboka. Ejang gedehe Maogusani bihibo basai sumu muima jathaibo jakhabo bauhi yaohon yaohon khaihabukane. Danangla Thorogala olaining khaisa rogongha sohidada grau phrethai jahng Maogusakhe thihbokha, "Khaphling ! Hougo naiha, nini nohyungmah nohgungraikhe nihng thiblaining saukhurihi waikhudi lung lung khlaihi hairikha. Waikhudi ejang gedehe gidinbudu, thihkhaning duhade brega buthu khaitharnang odehe nihngbo yaudohkhe bondoh longkhor nising khophunang khaphling." Thorogani olai phrethaini graukhe khnahi Maogusala thamsi jahng lub-lub maukhukha; Thorogakhe gathangning molomathi, jimathi baubaikha. Pherthi phlang thiphuyasi jami sauha miyung masini bolmah khaikhohi jami yaukhe brega longkhor niphrang sigkhon khlaihakhane. Danangla namna bugur thlai gubalai jahi yau thiru-ru jahi gobukha. Sabala sumu thima thibaisi jakha. Thihkhabo thamsi jahng phlung khlaihi maogusa khaiphalanghi thoroga-khe baiphahikha. Olaiba hathohaning maogusani bihibo boh hathaniha sophaikha. Naibala khaphling magnijahng blip blip mathain mathain jasih raolaisaidu. Gnijahng baiphalaiba hathoha sarilaibakhe khnahi thoroga maogusani bihikhe thokhibani graukhe maogusa-bihi mithisengkha. Danangla bobo basai jahng gbaphahi gni jahng thorogakhe rimlaikha. Rimlaihi diha lemsengma nah waiha lemsengma gni jahng thihlaikha. Diha lemsengma thihbala thorogala graseh gradune. Dei thihkhade waiha lemsingnang thihbade gag gag jasiseh thaoyasi mnibokhane. Danangla maogusa hisaigni jahng thamsi jahng rogongni bil-sahaning thorogakhe dangsenghi thihkhane- "Thang duhade napphani madaikhe nunang." Diha dangsengjaobala thorogala jajaosenglakha odehe maogusane 'khiphu gulab' khlaihi phunuhi diha libsenglanglakhane. Olai khlaijaobala maogusala thamsi baigobokha, hathaih waihi thihkhane, "Dei khaphling, nihng bilaiyaba nainang."

Danangla thihbalaining maogusala Thorogakhe gathang rimmane bil-ni dikhe rainrimani khlaihi rajani mihyung grajik'khe labuhi bilni dikhe sroprikhane. Ejang gedehe Thorogabo maogusade bokhe haigarnang niya bauhi bilni diha dongyaba Jerendima jahng lugu khabokhane. Khaphling khadada thoroga jerendimakhe thihkhane—“Khaphling! Jihngla di-ni mih, thihkhaning luguse, hahng masiseh. Thihkhaning asaba khusi-haphrai, apod-bipod jakhabo jihngla sausi sausikhe jurulaima nangmasethi, no khaphling.” Thorogani elai grau khnahi jerendimabo lugu khathiklakha, sumuni juruyamada jurulaima nangmasethi thih thorogakhe thihlakha. Jerendimani grauha jora mailahi thoroga jar thegaibani graukhe khnarilakha. Thorogani graukhe khnahi jerendimah bedeh juma singlabokha. Thoroga thihkha, “Ang galangkhanghi basauha thanghi naihiba, maogusa duha angkhe gathang rimmane rajani mihyung grajikkhe labuhi di sropridu bil-ni di rainrimane. Thihkhaning khaphling bil-ni di rainyagothai nihng mihyung di sropbaha, di raindi raindi jakhaning, mihyung ni bukhu-bugung gedehe di jahng jorophalanghi mihyungni sidiyaba khiphu-khithongkhe muthuhi dengyaba laihgrain buthukhe jeren khlaihi, serenklaiha khaphlung ! Thihkhaning mihyungni khipu gedehe di pom pom khlaihi glaiphinbonang. Thihkhaning maogusa angkhe rimphunang niya. Di-ni yunghala nihngning dedao-phradao ahr budi-halaiibo ninining bangdaoba. Odebani khaphling niniha khainsulaba, khaphling.” Khaphling khalaihani oneya Jerendimabo Thorogakhe jurunang thih grau rilakha. Thorogabo khah delakha.

Ejang gedehe sidi lamah muthuhi mihyung grajik'khe sropribani bilni di raindi raindi japhaikha. Bohaning sibringjaobalai Jerendimah di sropyaba mihyung-ni bukhu bugung jahi habsenglangdada sidi lamah muthuhi dengyabakhe baijang khlaihi neklaihakane. Danangla muthuyaba gohi di phom phom baigohi bilha di gablaiphinbokhane. Olai kharnai di gablai phinbobala maogusahla hu hu jasi thamsi baigolabokha, bokhe juruyaba subung buthukhe sariphlingbokha odehe hamsisi muthuphinrihi mihyungkhe sropriphinbokha.

Danangla olaining japhinbokha bil-ni di raindi raindiha Jerendimah mihyung-ni bukhu bugung jahi habsengdada mihyung-ni sidilama muthuyabakhe neklaihabala bil dijahng gablatharbokha. Boha mihyung mauthu jakhade mihyung-ni sidilama muthuyaba roginghaning songhi dongbane. Bola ebode Jerendimahni khusiseh thih haphrang maikha. Boh, maugusah odeh givin khribnebo graukhe thihkha. Maogusah baukha eboh Jerendimahkhe sajamdama nangma. Olai bauhi mihyung-ni sidi lamah muthuhi di sropriba jenphinbokhane. Odehe mihyung-ni sidi lamah rogongha buyaba sisongkhe dihi jonhi dongkhane. Danangla olaining bil-ni di raindi raindi jerendimah miyungni bukhu bugung graude busudi gedehe hapsenghi sidi lamah muthuyabakhe khruklaihabani lamai lamai di baigokhonbajahng dainklaihabala mihyung-ni khiphu khithong khese phlak khlaihi dainkhaohabala mihyungla sajaohi phling khlaihi bajangbai khailanglakane. Maogusabo mathainhi glaihi thaokha. Thorogabo bilha donghi janang niyakha bauhi sariha bajangbai



gedehe baigolanglakhane.

Thihkhabo maogusani thamsi raya. Thoroga jahng man-lekha girilai khilaihi khithong phunujaobani thamsi dongbani khilaihi thorogakhe gathang rimmene olaining smaiphinbokha. Thoroga jakhade bil niphrang baigodada serebani phadain-ni morsailinghase thanghi morsailingkhe raokhibalai jahi morsaiphang phangsini bakhlaha khamhi dongkhane. Danangla maogusabo bokhe smaihi smaihi orahase blaphnanghibokha thihduthi. Orah maogusakhe nuhi thoroga singkha, 'Hoi khaphling ! Nihngla eraha sumadi khlaiba ?' Thorogala jathaini phasa naihi maogusakhe thihkhane, "Je, sumu khlaima khaphling ! Rajani gjau bathaini phdankhe raokhibailaba. Naihakhala khaphling ! Gjau khilaihi bilai majangsis, jiya jithaothao !" Morsai bormalingla minsaihi dong. Maogusala thoroga jahng thokhijaohi morsailingkhe rajani bthai gajauni phdain thihi thihjaobaha lonsenglakha odehe lalos jahng bokhe jimanese libibokha thihdu. Libiba blaiphuyahi maogusa thorogakhe thihkha, "Khaphling ! Boh bthai gjaukhe thaisilai mamang thihkhabo jinainangmaula ! Nihng khaisa jirikhala khaphling !" Thoroga maogusakhe thihbokha, "Odelade bedeh jamada ? Masi mamangbo gma jaya. Thaisi masilai gmakhaning raja angkhe dobudi, subudi khlaimeseh, ahni raokhiyah khusi jammasego khaphling ! Duh rajani subung gibin angkhe slaine phaidikha." Maogusa jakhade libibajahng thorogani sganghaseh khudi lo-lo khokhlaisengkha. Jimani lalosjahng maogusa sgangni dongbasi graukhe blaotharkha. Olai libibakhe nuhi thoroga thihkha, "Khaphling nihng olai jasining jima mijingkhade rajani subung phaiyasaniha hougo bijingthaoni bogrongha thanghi phangsini bedep depsini bthai buthukhe yaojahng jabraosi khaohi khabaosi khilaihi mugumdada waikhlihi jisengha, thaoba diba jahng nihng maoba ringnang niya khaphling !" Thorogani grau jamsramya maogusa khaikhlaianghi sumu bilaiyaba dedao mindao naihi jabraosi khaodada alangsi jahng khuha dangsengtharhi waikhlibala maogusala buphani mdai nukhane. Morsai sabangdada glau giphin jahi baiderbaihi budu glau glaihi thaokhane.

Thoroga jakhade olaiba hathoha lamah maihi bjangbai gedehe khailanglabokha. Niyakhala maogusa bokhe thamsi jahng sumu khlairebo ! Budu lao laojahng maogusa morsai saba hamdada thorogakhe jithaothao waithaothao smaibokha. Odehe maiyahi duha maikhade eboh thorogakhe haigarya thihi smai dangkha, hagra hagra smailangbokha. Thoroga jakhade daobaihi daobaihi lengjaodada hagraling gathaisiha 'githiraoni thong thiyaba thagong merang methang naibaha gurulai jadu', olaiba thagong billingkhese rajani guru-yam thihi raokhibalai jahi bongphang phangsini bakhlaha khamhi dongbokhane.

Maogusa jakhade thamsi jahng thorogakhe smaihi smaihi thoroga dongyba hathaniha sophnanghibokha. Thorogakhe nuhi khaisa thamsi jahngning thihkha, "Hoi thoroga ! nihng eraha sumudi khlaiba. Sumadikhe jonhi dongba ?" Thoroga jakhade magaindudu khilaihi thihkha, "Je, sumu khlaidaoma khaphling ! Rajani guruyamakhe raokhimani khusi basasa maikhmaba ! Odebani eraha raokhihi dongma nangbalei, khaphling ! Bisilai guruyam

dedu ar bangdu ! Deba thobla thobla, jiya jithao-thao, ahr jikhala diba- ede thihphuya, jithaophuyalaise, khaphling”

Thap khlaihi naihabala githiraoni thong thihyaba thagong billingkhe maogusala gurulaining jajaolakha. Ahr khaisa gajaing nising naiakhade boh buthukhe guru gedebalaining nubaseh. Odebdani guruni grau khnaba jahngning maogusani jadi jimani hasla gedehe thangdaohi maijimakhe sining baolanglakha, boni thamside di jatharlanglakha. Smai dangbani graukhede blaolanglakha. Guru bidikhe libihi thorogani sgangha khudi molohiseh maogusa thihbokha, “Khaphling ! Rajani boh gurukhe gongsilai mamang jirikhala! Gongsu mamang jambahade raja musibo jajaonang niyala, Khaphling !” Thoroga thihkha, “Ode niyathi Khaphling ! Gongsikhebo gmajao phuyabasethi, gongsinibo hisab khisab thiyaba dongthi, odebanise raokhimaibathi.” Maogusala gibi jahngning bauhi libiba blaiphuyahi sainba gejebdaohi thorogakhe thihbokha, “Niya khaphling ! Masi mamangla nini khaphlingne nihng jiriya ? Khaphling baniseh khah dehi angbo niniha sainjilaba; mlainiha thihkhade olaibao ang sainjiyamuh khaphling !”

Thorogabo maogusani olai jathaikhe nuhi phasa gibinkhe khaha baobaihi ora niphrang degaomani baubaihi maugusakhe thihkha, “Dei thihkhade khaphling ! Hougo bijingthauha masi desasa majangsisi dong. Bokhening yader yaphang jahng phikhauhi thausisi jila khaphling ! Jikhade thauba diba jahng nihng maoba ringnang niya, olai sosi jamase khaphling.” Olai thihi thoroga degaomani phasa khlaikha, maogusa githiraoni thong-thagongkhe phikhurjimane thangka hathohaning thoroga baijang khlaihi gihin lamah gedehe degaohi hathani gihinha thanglabokha. Ejang jakhade, maogusa khajasisi khlaihi githiraoni thongkhe phikhurhi khamhi hamsisi jinang baudada gurukhe waisebbalai waihi jibala sumu thihmakho, mdaubajahng musibo thihphrang phuyakhane; slaikhese garang bisingha siksengjaobalai jakhane. Garang mdaubanghi maogusa galao-giphin jahi, lodai-sodai jahi orahaning budu laosasa glaihi thaolakha.

Elai phingni phintham merejaokhabo maogusani jathai gibindaoya, thorogani yaohon sining ruphalanglaba. Thorogakhe rimmani hatho maikhabo, jima lingmani libi phunujaokhaning jamsi blaothardu. Thoroga jakhade baothaihi naithaihi khusi dangphalangdu. Thoroga gaire gaire khlaihi himlanghi hathani gathaisih jurong basaoha jedengmah khun renhi gijilai slamhi dengyabakhese nuphnanghibokhathi. Naithaosisi, jurongni baigni gedehe phangsi phangsi khlaihi gede guju bongphang phang gni, boh buphang phang gnike khadinghi jedangmah khun rendada gijilai, thothilanglai jasosi khlaihi slamhi dengdu. Boh thothilanglai yabani bakhlaha jakhade busuling gablaiyaba jurong guthu. Thoroga smaba phasa khlaihi olaiba hathaniha bongphang phangsini bakhlaha pojojo khlaihi khamhi dongkhane. Ejang maogusabo thorogakhe smaihi smaihi boh hathaniha sohiphnangbokha. Thorogakhe nuhi maogusa thamsi jahng thihkha, “Hoi thoroga nihng eraha sumu khlaiba ? Sumu jonjiba ? Nihngla aing !” Thoroga magaindudu khlaihi gonghi

thihlakha, “Aha, khaphling, ode niyathi, naihakhala nini sgannga bosthu dongyabakhe. Nihng alangsilai elaiyaba bosthukhe nukhathi ?” Thorogabo naihakha. Naihabala gibibo gibining majangsisimah. Naidada maogusala thuthaosisiseh jajaolahi thorogakhe singbokha, “Khaphling ! Bola sumu bosthuda ? Orah thukhala gabangning aram janangthi no khaphling! Mudiribo srabning thangnang thihi angde bauphnangdu.” Thoroga thihkha, “Khaphling ! Bola rajani aramni thothilangsethi. Mlai thujaonang banise angkhe raokhima saniba. Duh sainblini thumane raja phaidikhago khaphling !” Rajani thothilang thihba jahngning maogusala oraha thumanese bayaokha. Thoroga thihlakha, “Odede hamba janang niya khaphling ! Raja angkhe dohbudi suhbudi khlainang. Nihngthanebo hamba janang niya, angtanebo hamba janang niya. Thibudi waibudibo jalaphurekho. Nihng thumani graukhede khuhaning dalabu khaphling !”

Maogusa jakhade thorogani graukhe khnahi khrib blautharhi rajani thothilangha thumanese bayaodaokha. Thihi khainsuhi manijaoyabani thamsijahng thorogakhese baiphathaothao, birphathaotha jakhane. Thoroga jakhade elaiakhening phasa khlaihi jonhi dongba. Bising bising baulakha dude eboh maogusakhe mangdo lairima thihi. Odehe thoroga maogusakhe thihkhane, “Dei khaphling, nihng olaijasining aramjahng thothilingha thuma mijingkhade raja phaiyasani duhaning go nini rogong-ni bongphangkhe khaisa ragaikhuhi bedepsah masakhe rimphong khlaihi gakhudada thothilang-ni thip gejerha naikhlaihi mathainsengha khaphling!”

Thorogani grau jamsrangya, maogusa gebre gebre bongphang ragaikhuhi thoroga thiribalai thothilangha mathainsenghakhane. Danangla brani thothilang jurong bisingha graisenghi longkhraoha nanghi bokhro thel jadada maogusa dambra gakhane.

Bohase khraorao thihba, libibangba hamya, libikhade maugusalai jahi thaore.

Rehpkhuba : Mohanjoy Barman (Hojai), Joypur, Cachar

Bangla rehpmi jahng rehpdongyabakhe engraji rehpmi jahng rehpslaiba Biswajyoti Barman

Phanthaoraja

Biswajyoti Barman (Daolagajau)

Rongpur, Silchar

Mohanjoy Barman (Hojai)

Joypur, Cachar

Banjik sausini bsahthu doh dongbane. Boh buthu raoba phraba sining niyakhoh mussikhebo khinya gjangya, lekha khlayane.

Sainsibakhali bonsini bumah banjikdi bsahthune blaih jadisini samlai songribane. Samlai nalainilai niya, thaobala smukhe thihma, ede thihphuya, slai waiphredu. Bonsi bumakhe singkha– bedehe samlai olai jasi thaokha ! Bumah thikhka– “Oh, blaih-ha Hasigring sidi gasaiphrahanilei.”

‘Sidi gasaiphrahining samlai elai thaodu, thikhkala boni mogongla bisih thaore ? Bola thiyamoli (amrit = ambrosia) laining thaoma jakhathi !’ Bonsi baolaikha, Hasigring-ni mogongkhe maijimaning nangma. Jihngkhe dephugneyaba sere donggaba ? Bonsi bag jakhulaikha. Bumah thikhka– “Hai, gibbir ansarao, Hasigringla gederangmah glaumah jibuhohsethi, jibukhe sere thihba jire ?” Banjikdi bsahthukhe sibringhi thihlakhakhoh– “Boni graukhede isi sainlaibaiba hamya, bode sogohlaisekhoh, gajain niphrangbo boni graukhe malai sainlaibakhe khnahare; ahr khnakhade phaidada nisikhe mlotharkhlaihamaseh.” Bumah olai khinsengbakhe nuhi bsah buthu ho.. ho.. ho.. jasise mnikhaolaikha. Bonsila masainjik niya, miyahrao raothing phraothingyarao nagaraoseh, Hasigring bonsikhe smu khlaiphuma ? ‘Khaisa jon amai, duning nai jing ningthane Hasigring-ni mogong laburinang.’ Banjikdi blaidusi bsahthukhae magnalakha, gasoma nailakha. Thikhhabo smukhe thihma, bsahthuni asaba mungsiha khah thangkhade jakha, ora niphrang bonsikhe gneriphuglau. Olaining Hasigringkhe rimmane khaiphlung doh jahng srabning hagra giri-garani khilaihi baigolailangkha. Luguha blah jlih, sehng, johng langphakha.

Hasigring jakhade gederangmah odeh raoyaba phrayaba jibu-hoh. Boni dongthani braha, sausibo thihphuya. Khribbo bokhe mdai gebreng jibu-sogoh thihiseh baoba. Thihsophuyasi deba, lauba ar bugur simaba raobani subung buthu bokhe hani sigring graode ‘Hasigring’ thihre. Banjikdini bsahthu khaiphlung doh jahng hagraha Hasigring khe smailaikha. Smahi smahi hor jakha, thikhhabo Hasigring-khe maiya. Yaohonha bonsi hor

jabliha jibrobro nohsah masiha sophnaglaihikhane. Boh noh sah jakhade mjangmah srangmah griyayaba sagainjik grajik masinine. Khaiphlung doh jahng grajik-khe khainsuhi thihkha—“Adai adai, dini horsi mamang jihngkhe nini noha dongma ri.” Grajik thiphinkha—“Dongma thikhala donglaila ajurao, thikhkhabo ahni noni graukhela sumu thihma, ahni nohla mlaini laihsba khohlaiseh; khaising-huri jahng yungthe-guthe jahng gablaidu. Ang saujahngla jiba sbailing, thuba wayungsong. Nisi odening horphlai phunang thikhade donglaila.” Grajik khajahning olai thihi singphinbokha—“Dah, nisila smu khusine hagra phailaiba ajurao?” Khaiphlingdohbo smu khusini khilaihi phailaiba, boh graukhe grajik-ne khnarikha.

Grajik jakhade sgainjik masiseh. Bothane raodao, thangdaobani boh jakhade Hasigringkhe jajaoya. Odebani Hasigringkhe sthaikhade boh khajalanang. Thikhkhabo bokhe gaothaimade guleleba grau niya, bokhe gaothaima thihyabade thihbahase laiba, khusihade dubi. Grajik boh khaiphlingdoh boh khusikhe blainangthi blaiyathi phorikkha khilaima baokha. Bonsine horni jimane khilaihi boh grajik serni akhi yaorikha, bokhe bonsi waihi waihi thaolailkha, jiphuya. ‘Bonsi Hasigraing khe dephuglao’ – grajik khabaihi jarkhe jar thihlakha. Danangde najuha daula masi gisihi thihdune—“Banjik bsah jen jen, Hasigring deh deh.” Phorong jakha, khaiphling dohbo bajjalaikha. Grajikbo bonsine Hasigring dongthanini lamakhe phunurihakha. Bonsibo boh lamakhe thanglaikha.

Olaining okhali sainbliha bonsi givin grajik sgainjik sausikhe goronlaibokha; bonihaning khaiphling doh nohma thaolaibokha. Boh grajikbo bonsikhe phorikkha khilaima baubokha odehe longphu gablaiyaba khangkhra jla-ha di khaobuma sanikha. Khaiphlingthu sausibo khangkhra jlaha thipsibo di khaobuphuyakha. Najuha daula masi gisihi thihbokha—“Banjik bsah jen jen, Hasigring deh deh.”

Oraha niphrang bonsi thambayaba sgainjik dongthanina sohilalibokha. Boh sgainjik jakhade bonsikhe sarsing giding busuling gablasi dongyabani gejerha thailikphang majangsisi dongthani rogongha langkha odehe ora nising gijisabo jigaoyahi thailikphang blaih khaobuma sanikha. Khaiphlingthu sausibo khaobuphuyakha. Danagla najuha olaining daula gisihi thihbokha—“Banjik bsah jen jen, Hasigring deh deh.”

Khaiphling doh Hasigringkhe smaihi baigolailangbokha. Sain gebeng japhaiba bleb’ha bonsi hagra guthu phrah jing-grang dongthanina solaihikha. Danagla bonphang sau gedehe naikhuhabala gmangthaosisi khinthaosisi phrah jing-grang sauha bondep gedekhe gamding lahi meraiphahi jibu Hasigringkhe hah sosi lodaihi dongbakhe nulaikha. Boni bukhu khinmah gjangmah grih. Bonsi gosong gosong jibuho-ni rogongha thanghi thihkha—“Jihng badaima thikhade badaila.”

Hasigringla olai khnahi hamsining gmamglakha. Boh lekha khilaiyahi, slebalai khilaihi—“Ahin mogong jima mijingkhala ji dabo ansarao, thikhkhabo angkhela nisi gaothaiphunang

niyathibo. Thihkhabo ahni nanah gilirao, ang nisilai jakhade, hahngsi jahng phraphudusi phrahi khaiphin langlakhamuh.”

Thihkhabo baugejebyaba khaipling doh mlau mni thihyabakhe haphrangning mailaya. Bonsila elai mlau mni jamane hah gajain nising phaibane ! Bonsi Hasigraingkhe dainthaimane sehng sik-hon sramya, blah jlih sasramya jong jong songhi thaolakha, bol grih, maoba ringya joba ringya odehe phungsihaning Hasigring kuh wa sasiyabaha habsenglaihi gmalanglakha. Hasigring, khaipling doh thane gbangning phradao odeh boh hahng sining sikma nangba. “Bisingha ahni mogong jih, jiphubalai lai jih” – Hasigring grauthai sik-hi sik-hi bringma slebalai bringkha odeh dei thihbahaning mudri thangbalai grolanglakha.

Elaiba hathoha ejahng jakhade bsah thu doh phaiphinyabani grajik saujahng grabailadu, bsathukhe rmaubailadu. Boh hathohaning sainsi grajik phdainha phanthao khaomane thangbamuh. Danangla phanthao khaobaha grajik yausiha phanthao busuhseh jaophajaokha. Bohaning boh khurang thaisi khnakhah– “Ning sah sausi mainang.” Srabning boh sau khong gni jaba mithijaokha. Odehe basain sokha, bohor sokha, gibibo gibining sah sausi hajaikha. Phanthao busuh jaophahi sau khong gni jabani odeh nanah hajaibani boh nanah bsahni bumu ‘Phanthaoraja’ graude phanthaoni raja thihi dengkha.

Phanthaoraja dei thihbahaning dekhukha, jukhukha, raothing phrathing jakha. Mdairaloi boni jathai, yawaitai. Sainsibakhali bumah boni bdatu doh Hasigring rimma thanghi phaiphinya thaobani graukhe khnarikha. Phanthaoraja bdatu jahng gorongma mijingka odehe boh bda thukhe smaimane thangmani graukhe bumakhke thihkha. Thihkhabo bumah bokhe thangma riya. Bsah doh gmajaoba bangyakhone ? Thihkhabo Phanthaoraja bumakhke bujaima nailare– “Nihng tharmaiya Mdaisih angkhe hajairiba ? Odebani mdaining ahni raomah bolmah odeh lamah phnuyah. Nihng angkhe thangma sining ri amai, ang ahni bdatu dohkhe labuphinnang. Ang Hasigring-khe goronre thihkhade, ang bokhe gaothainang, bothane ahng gbangning raodao bol bangdao.”

Phanthaorajani khurang, thithai-jothai bumakhke khah derikha. Phanthaoraja thihyabasi mithihi tharmaihing thihba, jobaseh. Bumah Phanthaorajakhe thangma rikha. Phanthaoraja lamaha bdatulai sgainjik gthamkhebo gorongkha. Bonsi phorikkha khlaibaha boh dekha. Serni akhikhe waikhribphukha, longphu gnang khrangkhra jlaha laih thaphi di khaobukha odeh suhling gejer niphrang jigaoyahi thailikphang blaih khaobuphukha. Phorikha gaphrongbo naijuha daula gisikha– “Jibu Hasigring jen jen, / Banjik bsah deh deh.”

Thanghi thanghi Phanthaoraja Hasigring dongthaniha sohikha. Danangla bdatu dohkhe lekha khilaiyaya khlaibalai Hasigring Phanthaoraja-khebo lekha khilaiya jare. Thihkhabo Phanthaoraja-niha boni olai budi khusi riyakha. Phanthaoraja sohidadaning dei thibahaning sehng khohi Hasigring-ni bokhro dainsokhlaihakha odeh bedang-dang jahi dongyaba bohokhe jaophru khlaihakha. Naibade bdatu gabaolaihi bumphalaihi Hasigring-ni boho bisingha mudri thanghi donglailadu.



Khaipling doh thuba nising smauckha oded muthai husinghi haikhulaikha. Gibining bonsi hamsining mudri thangka laokha. Bonsini bumah waimuh nangma jakha. Bonsi gebrelaikha. Bumaneh grau ribalai thiyamolilaiyaba (ambrosia) Hasigring mogong lahi thangka nangma. Graude bonsi jarraoning Hasigring-khe dainthaiba thihi baolailadu. Bonsi khribbo noha thangmakhe gebrelaiba thihkhabo Phanthaoraja dongbakhe mamang bonsi naithailaiya. Gebre sebre khlaihi buthu jahng Hasigring bahain rakhaolaihtharhi khaiphling dohneh phantha-doh ronphailaikha. Bohaseh bonsi dohthane sausi bangdaobakhe naithailaidu. 'Sere ansa masi ereha sophailangbokha' - bonsi thihlaikha. "Bda grarao angde, angde nisini gididaothaoyaba buphlungseh, Hasigring-ni boho nising angning nisikhe sogobaseh." - Lajisrusru jahi magaindudu khlaihi Phanthaoraja sainthihlakha. 'Sohsi mosol grauseh, jihng khaipling sni niya, khaiphling doh seh.' Eboh ansa jarkhe gbangning grijjaodu. Hasigring-khe dainthaiphubani sahngkhe eboh jini nising sesolama baodu. Dubo bumani abudi jiba gaoyanaidukho ! Mogong phantha maimani phasa khlaiba. Jini buphlung gididaothao yabanego !? Bda radaothaoyaba sining niyaba, gbin buthu, buthu buthu jahng Phanthaoraja-khe yaosum ribaseh riba, jigphabaseh jigphaba. Bda radaothaoyabade magnabailakha, gasobailakha, ansa basasah seh da thihbailakha !

Khaiphling doh Hasigring-ni mogong bujuh lahi noh lamakhe himbulaikha oded Phanthaoraja-bo prik prik baijahng baijahng bonsini yaohon yaohon thangphalabamuh. Thangphabakhe nuhi khaiphling doh-ha gididaothaoyaba bokhe busu gnang buphangha raiding jahng khahi garbukha. Phanthaoraja olai khajaoba nising lailoloning golakha oded bda thujahng nujaoyahi yaohon yaohon thangphakha.

Banjikdi bsah thu doh-khe nuhi khajalakhabo luguha Phanthaorajakhe nuphayahi gmang-gji jalakha. "Oh ! Nisila nisini buphlung gididaothaoyabakhe goronya na ? Bola nisikhe smaima baigolangkha" - Banjikdi gmang gji jahi bsathu dohkhe singlakha.

Khaiphling doh gibir guthurlai smu khusi dangjaokha bohaseh haphrang maidu. Lajihni bonsi khusi gjai dangbakhe thihraolaiyahi prik prik thaolaiikha. Danangde nokhimgrong-ni bakhlahaseh hahngma sik'hi sik'hi sreba grabakhe khnakhane. Banjikdi boh gedehe khaikhlailangkha. Orahni prik prik khamhi Phanthaorajakhe graba nusenghikha. Grahi grahining Phanthaorajani grau jamyakhoh. Boh bumahkhe thihkha, "Amai anthane khunthon dosi risei." Bumah gmanghi singlakha. "Sumu khusine nangba, ahni gjauthai ?" "Angde sworgoha thangphinlama jakha amai. Ang eboh phirthiha phungsibo dongma mijingyakha. Khun jahng ang sworgoha thangmani yaokhrai khama."

Bumah gbangning khinsengbailakha. Thihlakha, "O ahni gjauthai, angkhe haigarhi nihng mussihabo thangmainang niya. Nihng thanglare thihkhade ang thimase."

"Thihkhabo amai, angde thangning thangka. Ang baothai blaikha." Bumah bsani magaindudu thihkhabo gejebthithi khurang khnakhaha; elaiyaba khurangkhe boh mithidu. "Thihkhade angbo thangphama" - bumah thihlakha.

“Olai thikhade jare” – Phanthaoraja thihphinkha.

Phanthaorja bumah khunthon bodo riyabakhe sumu khlaikha thikhade, khunthon’ni khun bukhu saisikhe rimhi khunthon bodokhe basau gedehe lemkuhakha. Khun gubruphalanghi nokhasau judao judao gakhuphalanghi khun’ni saisi sworgoha sohikha. Eboh khun yaokhrai gahi bumah-bsah sworgoha thanglaima. Boha gakhuba lamai Phanthaoraja bumakhe sibringhi thikhka, “Basau sohsi sohiyasi, asaba jalathing, dok bakhla gedehe naiphinmainang niya.”

Sworgoha gakhulangbani sgangha ahni khusi mungsi dongkho thihi Phanthaoraja thikhka, “Agni bdadu angkhe gbangning dukhu rikha, angjahng subunglai yawaiya. Odebdani bonsi habsauha subunglai dongjagothai niya; ang bonsine thagothai saja rilangdu. Radaoathaoyaba bdanide khaisa thikhkhabo khadoya dongba, ang bokhe noh-nemah slamdu, boh nohnema jahi noha dongthing. Gejeside gogemah, dimbong, mlijorma, sorerema, ahr lorema jahi nohni baijiha bongphang, samphang buthuha dongbaithing. Bonsini basauha ang nokhasao grujlihi srabthai gaoma. Thikhkase bonsi gjai goron griyayabakhe doba subani saja maijima.” Thihbalaining Phanthaorajani grau jamsrangya bda radaoathaoyaba nohnemah jahi khumpiha rgaikhulangka, gejesila gogema, dimbong ebebasi jahi baijiha bongphang samphang buthuha rgaikhubaihikha.

Eboni yaohonha bumah bsah khun yaokhrai rimhi basau gedehe gakhulailangkha. Bonsi sworgoha sohimani lama gejer sosi sohibajahng phirthini hahng gnangrao dongbasi bosikhe nulaihakha. Miyah, masainjik, ansa-khrao, naga-mathla, dau-mih, samphri-samphra khribbo khabaisisi khlaihi jrikkhaolaihakha. Olai jrikkhaoba khabaisisi jajaobani banjikdi grajik jakhade dongsengphuyahi bakhla gedehe naikhlaihakhane. Danagla thip bohaning khun jogokhane.

Banjikdi nokhasu gejerha khun jogothaniha thaolakha. Basau niphrang Phanthaoraja thihabakhe boh khnaba maikha, “Ang sibringbakhe nihng blaoba amai ! Duhade nihng orahaning donglama glaima. Ang nihngkhe juruphuyakha. Angde basau gedehe gakhulangma nangma amai. Thikhkhabo basau nising ang nihngkhe naikhlaihanang. Nihng bakhla gedehe naikhlaihakhaning nokhasau gurjlinang, bojahng ang nihngkhe nunang odeh grimhi nihngthane sar rinang. Odehe boh gurjlithai jahng nuhi ang ahni hamyayaba bdatu gogema, dimbong odebasi buthukhe srabthai jahng gaonang.

Boh niphrang grajik bakhla gedehe naikhlai hakhaning glau khalaihi nokhasauha gerem gathap wai nujaodu. Rakhabani grajik blenghi naiphuyane. Odehe boh nokhasau wai jengbakhe nuhi Phanthaoraja bdatuni gedehe srabthai gaoharene. Nokhasau gurjlibakhe grajik mugur gaoba odehe hadi girimbakhe Phanthaoraja bumane sar riba thirekho.

Rehpkhuba : Biswajyoti Barman (Daolagajao), Silchar, Cachar odeh Mohanjoy Barman (Hojai), Joypur, Cachar.

Japhnuthaisah (Playlet)

Nanah Gjauthaih

Deepak Barman

IIT Guwahati

Bumah sausini khlaihi bsah thijaoba thihyaba grau gabangning khah bairiyaba grauseh. Boh dukhukhe thihi thihsohphunang niya, khaha bauhi bausoh phunang niya. Eboh graukhe bauhakhade khah glodu buma sausi bsah maiba, dehriba, juriba odehe naga jabaha thijaoba. Olaining, bumah saunini kharminkhe eraha thimane rehpnang baudu.

Eboh kharminkhe jakhade bsah thijaoyaba buma sausini, bohni bumu jakhade Dumaidi. Dumaidi bsah thijaoba maithaisi lailangkha, thikhabo, bohde duhabo danghphrang jiphrang ringyalai jadu bsahkhe wainsokhade. Hor-sain bsahkhe wainsohi grahdu, mudi ruladu odehe khahni graukhe dambra gaayaba bsahneh sainthibailadu.

Dumaidi: O-baba, ahni nanah gjauthaih, nihng smadini thanghlaba anghkhe haigerhi. Ahng serejahng donghmakho odehe sereni khlaihi dongmakho. Nini abaibo nihng nanah basasah dongbahaning dambra gaba. Duha nihngbo ahngkhe haigerhi thanghlakha. Jing dukhisa jakhabo, phadain dangghi odehe ju songghi solilabamuh. Duha nihng giribani, dangma, jima khah girikha. O-baba, ahni nanah gjauthaih, smadini thanglaba.

Dumaidikhe graba khanahi, Dumaidini bojolajik odeh nohari Midimdi naiphaikha.

Midimdi: Abi makham jikha?

Dumaidi: Jiphuya, jima khah phaiya.

Midimdi: Odehla bedeh jama Abi. Phai ahng songyaba nah-hohn odehe naphlam berenghyaba jahng khisa makham jilainang.

Dumaidi: Jiya jiya makham jiya. Ju labu, ju lingnang. Ahni bsahbo jukhening linghi jambaseh. Ahngbo ju linghining jamsongnang.

Midimdi: Haih! Abi, odehla bedehening jamakho, khribbo jamtharlaikhalah bedehening jamakho. Buphabo jujahngning jamba odehe bidihbo (Midimdini basaih) jujahngning jambaseh. Jingbo eboh lamakhke thangkhalah bedehe jamakho.

Dumaidi: (Grahiah grahih thihladu) Bsah gmabalah ahng bumayabaseh mithilaba.

Midimdi: Haih! Abi, ninisining dukhu niya. Ebo dukhude jini eboh nohlai, jini eboh rajini dukhuseh. Khrib nohabo serebani basah odehe serebani basaih thilabaseh.

Dumaidi: ha ...aa ...aa (grahdu) jinibo thibasehda.

Midimdi: Jinglaining jini nohlaiha banjikrao bangbi. Bunsinibo ansarao basah basah dong, odehe makthisaraobo bangbi. Bunsibo jinglaining dukhu ganangseh.

Dumaidi: Ju labu aneh ajahng, ju labu.

Midimdi: Niyah abi, makham khisa jiseng.

Dumaidi: Jiphuya, molophuya, bakhah sadu.

Midimdi: Jini nohlaini miyahsaraode jujahngning jambaseh. Jukhe bonsi lingbaneh, juseh bonsikhe jiphinba. Ahngbo basaih thijaoyabaseh. Ansarao gni gnikhe sau dukhu khlaihi naisohbaseh.

Dumaidi: Ninide ansarao dong. Ahnide sausibo girikha. Sereni khlaihi ahng thanghi dongmakho!

Midimdi: Haih! Abi, olai khah baihma nangya. Ahni bisik ninibo bisiksehda.

Dumaidi: Ahnibo bisikseh, ahni bisik niya thihide thiya ajahng. Ansaraoneh makham jirikha na jiriya ajahng?

Midimdi: Braha jima bunsu. Duh sosi dikhongniphrang dugurhi phaiyakho. Smaba khlailailaduboh. Yaobalah ansaraobo. Ahngde.hatho hatho blaisophuya jadu ebunsikhede.

Dumaidi: Ajahng khalau. Ansarao yaobaseh hamba, khajasisi jaba. Bonsi yaobakhe hamya damai, khasaomah rih. Bsah giriba yahonha, ahng mithiladu, ansarao noha girikhade bedehe jadu.

Midimdi: Abi, niyakhade tha dikhongha ansaraokhe naihibalai odehe dikheboh khaohima thanglainang.

Dumaidi: Dei, tha thanglainangh ajahng.

Bonsi ginijahng dikhong gedehe longkhaiha didik khaihi thanglaikha. Odehe, dikhong rogongha sohibade ...

Dumaidi: Elai dukhu nangsisilah serening rjabkha?

Midimdi: Jini nohlaini Hojaijik, bohnibo bsah thibalah. Nalaibo dirgongha khamhi rjabdu.

Hojaijik (Grahsimang rjabdu):

Kormon hamiya banghining
 Elai janeh gayamuh
 Elai mithine thikhade
 Habisau sadiya lailanang
 Ninibo daurili thuraokhe
 Nubunang khasilik baibunang
 Nihng sausi girini yaohanha
 Bedening dangringnang jiringnang
 Nihng sausi girini yaohonha
 Khahsilik baihining sain bainang ...

Dumaidi odehe Midimdi sausikhe sausi muthaiha naiphalaihi mudi rulailakha odehe grahlailakha.

Eboh kharminkhe (japhnuthaisakhe) erahaning sajamnang. Eboh kharminde dukhuni kharmineh. Eboh dukhude jini nohlai berenah, jini rajiha, jini noh nohni kharmineh. Jujahngning jini nokhor baibaseh, jini noh jambaseh, jini nohlai dedaophuyabaseh, odehe jini raji thangdao phuyabaseh. Eboh jini jadi 'Dimasa', Dimahni sah, sik, di niphrang jing hahng maiba, di bijingha nohlai, raji khaba. Duha jing jini nohlai, raji odehe jini jadikhe mathao phunang na mathao phuya, mathanghi deng phunang na dengh phuya, bohseh grau. Thikhade, hain-thih-grengrao, jukhe jing garlaima nangma. Niya thikhade jing eboh kharminha Hojaijik dikhong bijingha khamhi odehe di thangbakhe naihi Grahsimang rjabalai, jing jini rajikhe, jini jadikhe jambani lamaha thangbakhe sining naihi thaolailamaseh.

Gedemah Deepak Barman (Jrmbusa) linguistic-ha master degree khlayyaba. Graudimajahng rehpyuh rehpyasah sausi. Duha Guwahati IITni Library sectionha khusi danghi dong.

Thairili :

Phanindra Kumar Gorlosa

Haflong, Dima Hasao

Nohlaini Phorikhoh

Mananghade phorikhoh bangya masi magni sening,
Thihkhabo boha phoriba hamba hoja bangyahining.
Ansaraobo grau laba hoja maniba,
Nalaini phora sau nanghi phorilaiba.
Dini dakna nohlai nohlai phorikhoh sotharkha,
Ansaraobo nini ahni phorikhoh thangtharkha.
Phorokhohni laihsimah graha bumu rehpthardu,
Khamphaibade sausi gini phorikhoh komjadu.
Saingni damsi maimuh tharba bangkhi thaolakha,
Bokhe laihi hatho thaohi habah jen slamkha.
Jenslambakhe nainang bauhi phorikhoh thangbukha,
Ranphabukha sau nanghi bakhi dengyakha.
Khasa donghi sophaubukha Busu basainse,
Busu salaima nangma thihdu maithaisinise.
Nohlaiha Busu jiba laubi basain bohor nangbi,
Jiblaidada jrai jro srup hamba dubi.
Laihsi garba laosalangkha blaokhlikha
Phoila niphrang jenma nangkha laihsi dujaokha.
Dujaosibo jenphinbokha baisi japhaikha,
Hathohaning nohlaikhorha disengma basain kakha.
Disengbani phira sohsi phorikhoh nuhiya,
Bera baihi thangphinbukha phora blaiya.
Blaiyasi blaiyasi ranpha phorikhoh thangla,

Masterbabu Haflong thangkha phorikhoh nangkha thala.
 Hoja giri phorikhoh bonse ansarao thangkha hagra,
 Laihsi laibra blaolakha mihsib jakha nohbra.
 Bainsi donghi master phaikha phorikhoh khurukha,
 Ansaraokhe lungthimdada phori riphinkha.
 Khorongphangning maisalaini gerba dara dong,
 Gerya jaya rajihade gilim gasa dong.
 Bohabo phorikhoh thangma bakhi thaolabudu bisi,
 Besing jiriba madai huba hathai basain bisih.
 Hahngso Surem haoba rgai Gajaibaoni dangba,
 Mathingmani hah duhthorni ar haithibari bangba.
 Bangkhi bangba chuthi bangba phori hatho maiya,
 Maithai maithai gidingkhabo khamthani slaiya.
 Inspector-babu phaidu thangdu smaba rehplangdu,
 Masterbabu Gambura gedeh botholjahng lugu jadu.

Master hamya phorikhoh khamya chuthisening ridu,
 Sausi gini kharaindada report rima thihdu.
 Phorimijing ansaraobo phori hatho maiya,
 Nohlai nohlai phorikhohni jathai slaima bauya.
 Jadini subung master jaya laihsi ringdaoya,
 Ilailaining jalamase mlaide gibindaoya.
 Jadini yader laihsihase bokhe ringya jaya,
 Mahoni graujanhng laihsi niya ring gibi ringya.
 Odebani nangkha jine hadai grau Dima,
 Gibinjahngde jaya jini niya jadi gmah.
 Grau giri jadi giri eboh habsauha
 Grau dongnang jadi denang mithijaonang muluk bajiha!

Gedemah Phanindra Kumar Gorlosa rehyaba eboh thairilikhe 1986 maithaiha baigoyaba 'Dima Khurang' lai hajab nising jasosi sguba. Bangla rehpmi jahng dongyabakhe Dimasa Sahitya Sabhani minjohm formula maphi roman rehpmi jahng rehpslaiba Biswajyoti Barman (Daolagajau).

Anupama Naiding

Haflong, Dima Hasao

Sibaraini Rajabthai

Baba Sibarai, Muluk buba,
Nihng khaisa khasaodada,
 Jingkhe naiphaidi
Nihngning muluk buba
 Phirthi sangsaiba,
Nihngning thangdaoba,
Nihngning raodaoba,
 Jingkhe naiphaidi.
Sain hor, bardi, barbai
 Nihngning slamba.
Dibu, dikhong, hajik, harang
 Nihngning luriba.
Marsi, mih, dau, khimbar, khimsain
 Nihngning sangsaiba.
Nihng girikhahi Phirthima andar,
 Khasaomah ganang nihng
Khasaomah gabang.
Nihng khaisa khasaodada
 Jingkhe naiphaidi.

Anupama Naiding

Mdai Masining

Eboh Habsau, Nokhasau, Dain, Sain,
Sathrikhela serening salamkba ?
Hajik, Haphlai, Dimah, Disah.
Khimbar, Khimsain, Buphang, Bathai,

Dau, Mih, Marsi Marsa khela ?
 Khimbarni majangmah, midimmah,
 Habsauni majangrili lalimah,
 Sainjali, Dain, Nokhabling
 Nokhasauni hadi jimih barsra baryung.
 Dimah disahni gakhrangli gasainmah
 Serening sangsaiba, slamba ?
 Raodao thangdao mdaikhe garhide
 Sausibo salamphuya, sausibo sangsaiphuya
 Mandir, Masjid, Girja, Daikhoh bumu givin givin
 Sibarai, Khrishna, Ram saukholi givin givin
 Gibin givin bumu, givin givin saukholikhe jing maniba
 Judao, thangdao, raodao mdai masikhening
 Khrosau denghi, buthujahng jing gonghi khilimba.

Anupama Naiding

Phoriansaraoni Rjabthai

Dinini majang basainha,
 Dinini gathar bubliha,
 Jini sibringyah hojarao,
 Jini gedemah hojarao,
 Nisikhe jing سوالادو,
 Nisikhe jing کھلیملاڈو.
 Andar lamah dismaiya'rao,
 Hamba lamah phunuyarao,
 Hadam guphu maimuh gisim
 Nisining dangjen riba.
 Nisini yaphrikhe jing rik langma,
 Nisini yaublaikhe jing yauwaima,
 Dinini majang basainha,
 Dinini gathar bubliha,
 Nisikhe jing سوالادو
 Nisikhe jing کھلیملاڈو.

Anupama Naiding

Hajaithani Amai

Wainsodu amai hajaitanikke,
Ramaoladu niniba majang rilikhe
Balaophuya jiniba khasaomah thanikke.
Maithai gadainni sain baigodu,
Mander, Bonju bubar barphaidu,
Barbajahng khimbar bahai siblangdu,
Wainsoridu amai hahthanikke.

Nohkhim sainkhlím gasain dik dik,
Dibuni di sorlangdu gakhranglik lik,
Hagra, bongra naiba majang,
Thaiju, thailik buphang gabang.

Sariphangni barsara sibbaha,
Muthaih khabisisi khnabaha,
Amai thanini garaukhe sainthidu,
Barbai midim, barbai gasain
Garaujma labudu.

Anupama Naiding

Bon Githi

Bon githi buthu dilanjahng gajaophalangdu
Bakhaliba, brabai nising gajaohi gajaohi phaidu
Maphaode dinar bijingha thiyasi donghi thaodu,
Maphaokhede sereba sereyaba rimthaohi mathaoladu
Maphaode dillam girih di gejerha sadap phadi thaodo
Gejeside di gejer, di dirgung jahi daophalangdu,
Braha sohinang lambra gejerhathi thaolanang,
Bakhali sohinang, bisilai daophalangnang bonsi mithiphuya

Bon githini jathaijahng munisraoni jathai khapharise
 Nalaibo daophalangma, gajaophalangma
 Thaoyasi thangphalamananing bonsini khusise
 Braha thaohinang, bedehe jahinang,
 Sausibo baoba maiya,
 Sausibo thihda phuya.

Gedemajik Anupama Naiding-ni eboh thairili butuha yahonthaonikhe garhi gejesikhe boni thairili laihsab 'Kha Thairilee' (2015) nising eraha jasosi suguba. Thihkhabo minjohm (spelling) buthukhede khaisa slaihi Dimasa Sahitya Sabha-ni formula maphi khlaikha – Rehpsaikhusgao.

Jyotiram Chorong

Howraghat, Karbi Anglong

Ajuni Khasaomah

Gujuh gujuh thaiju thaidu
 Jaoreh jaoreh jaohi mundu
 Dodop - dadap hahah graidu
 Birphah-birphah Aju khondu.
 Thaisih thaisih lekha saindu
 Baosih-baosih khribne rondu
 Ajangne bantha thaisih ridu
 Angbo olaining thaisih maidu.
 Jarniha je bisilai thaodu
 Abai-Amaine bokhe dengdu
 Nailago Aju belai hamdu !
 Aju jingkhe bisih khasaodu!!

Jyotiram Chorong**Subung Samphang**

Nokhasaoni bakhlagedekhe
Khere khere Sain jrolangdu.
Sri-sri barbaijang giphinbudu
Hajukhroni khabaisisiba
Thimi thimi murithai khurang.
Khasaosisi Subung Samphang
Khambrolaihi gainsonglaidu,
Nujaoya bosini jnamah
mukhang odeh baigoya
bukhuhabo thamsi Khurang.
Phaiginyaba basainbuthu
Gma-gmuh janangthibo
Bauhi bosu khinsenglaidu,
Sausijahng sausi gabaokhriblaihi
Muhni mudithai rulailadu.
Badai-Bujusaoni gibi jarimin
Bosini mudithaiha rlangkhudu.
Subung Samphangni
Hangslikmah khnalaihi
Smaulaiba thikhade !
Bosi jabraosinaibaha
Basau sajaolaiba thikhade ...

Jyotiram Chorongphang**Sainsolainang Phai**

Dirgung-dirgung Nasah daodu,
Mabisi daodu?
Bobrojahng daodu.

Hamrim-hamrim Mukhum bardu,
 Barbisi bardu?
 Bakhlabjahng bardu.
 Bonling-bonling misai khaidu
 Mabisi khaidu?
 Buhurjang khaidu.
 Khimling-khimling Damah bahdu,
 Mabisi bahdu?
 Bojomjahng bahdu.
 Bojlong-bojlong Hathrai jingdu,
 Mabisi jingdu?
 Blangjahng jingdu.
 Birgi-birgi thinthri thaidu,
 Thaibisi thaidu?
 Bajrabjahng thaidu
 Sausi-sausi laisih khebdu,
 Saubisi khebdu?
 Berenjahnng khebdu.

Jyotiram Chorong

Agun Badainni Rajabthaih

Maithaihsini Agun badain sophainang,
 Maithaijahng maihadam gurmunang.
 Maiju-maimah maigrongni bahaijahng,
 Hayam warba-debasi midimnang.
 Ansah-Khrao khaja-mini baigonang,
 Dangba-dihba khribbo badainang.
 Yausi-yausi gabao-jru sagangnang,
 Naga-Malla khah-muh jilainang.
 Surem dangba darakhe khajanang,
 Busu basain slaibakhe jonlainang.
 Gajaibao Hojakhe gainsongnang,
 Naga-Malla grausi-lamsi jalainang.

Maidudi mairabase naithabajahng,
Yauphre khaba gejobba smaibajahng.
Rajabhagong rajabase sringbahng,
Maiyauphre bairibase thalnangbahng.
Maidudao lep-lep mai bainnang,
Maibainba khribthabo raodaonang.
Bejengkong bairi-bairi naiphin hanang,
Maidudikhe mugur gursi gaobaihanang.
Maidudibo rajabthai khahi sainlaihanang,
Sariha maiju rongthep sujilainang.
Khani grau dongbasikhe sainthilainang,
Bairensani judimah khaohi linglainang.
Maithaisini Busumahbo sophaihonang,
Bususini bojor jahi bailaihonang.
Gathar basain-bohorbo samphaphainang,
Thiyasini bojor khahi donglailainang.

Jyotiram Chorong**Babaidao Nini Amai Gubaidu**

Gainson 'go Gajaudao Babaidao
Nikhurni bonjuphang birgiha
Horgejer horguthu hormaoha
Daulingdao bedede guphaidu!
Khinthaotao bedede murkhudu!
Nokhala nainangning bauyakho
Sainjala khunangning thihyakho
Smubede badera phainangbo!
Smuba kharengthai janangbo!
Dinिसosi jraisongba laosakha
Duhاسosi glaithaiba bangsakha
Garangha khurangbo daphakha
Khujerjuha khurilibo sagaikha.
Josringya thihsringya japhaidu,

Muhnuya-khuhmaiya dongladu.
 Yagaphang smaomani jayakha
 Khrophang disaimani niyakha.
 Jling-jlang Halangini basauha
 Jonthaimani haganthi gmakha
 Lili-thithi Dilangini digierha
 Dainyasahni yaganthi gajaokha.
 Asimsani grauthaise bladaokha
 Johi-johi bose dini khnathaokha
 Guphusani grause sremdaokha
 Thihi-thihi bose dini lebdaokha.
 Sangabani jathaijangbo janaiba
 Leoabani darajangbo mainaiba
 Bomajang gajaikhade gajaorene
 Bomajang sarijaokhade jrairene.
 Lonya-phaya dajabaila Babaidao
 Khnaya-dahiya dajala Gajaudao
 Bomani bolmah maibase bolgibi
 Bomani raumah maibase raugibi.

Jyotiram Chorong

Khailim Gajamni Rih Horglai

Gabera Raji khaba– baijaoba
 Jbahni basauha jbah
 habaside gosongjahng sagangba
 gebeng jahi alang alang khaiphinmaiba
 Gur-gur rajirao khaigmang-birgmang
 Bra khainang bra thimnang
 Wathilinghaning khaisengba
 Hayusini thanglam lamah
 Dorga dorgaha jagaoba
 Ejang-ojang gmang-jimang
 Gmah-gmuh jalangba

Jadisauni thangrai rothai
Durudao-durudao durulangba
Jbahsarao Rihorglai gainlaiba
Sain-hor khaikhuba-khaikhlaiba
Dinide jbasau debuthing.....
Khribjang khurangsi hairingba
Odejahngbo daradaoya dinisosi
Khnahe nuhi ar thegaihibo
Blahmgojo lamakhening remphnangjaodu
Basain hamya hajorakhening goronphindu
Khailim gajamni Rihorglai
dauslaiya dinibo gainphinlaidu.

Jyotiram Chorong**Aniba Khainsumah**

Bakhani majangba khimbarjahng
niniba yagaphangha bauladu,
Grauni gatharba bathaijahng
niniba sagangha khainsudu.
Gathar baulamlamah dongkhade
Jingkhe ojang gede daorilang,
Gibi danglamlamah maikhade
Jingkhe ojang gede hemrilang.
lamayungkhe nusingya jalangdu
haduri-waikhudi dimphungdu,
gibikhe maiphrangya jalangdu
khah-muh sibirjaohi thaoladu.
habasi sagrajaoba thihkhabo
habaside khajamaima baoladu,
alangsidi dukhu-hadi jakhabo
alanside suk jama janaidu .
khrimbkebo khah-muh sringri
sausikhebo meser-mosoh dabauri

hamba gede khah-muh phrangri
 jaba gede buthurjahng daolangri
 Oisor Mdai
 Brai Sibrai.....
 Ho Rao Lim.

Famiebar Barman (Gorlosa)

Dolu, Cachar

Khusong

Songhasein nihng khaisa songha,
 Raurihi niniba bejengkhong,
 Hoi pherdabdao khusong.

Khajaphunang, songkhuhi himkhade nihng
 Jarni yaphaha jarni yaga jahng
 Nuba mainang hamdaohi majangdaohi
 Baudaophonang thangdaohi phradaohi.
 Hoi pherdabdao khusong
 Mlaini graukhebo khaisa gainsaong.

Blubpha sorpha himdu sumuni,
 Simaha baphalanghi bakhari nini ?
 Bokhro huidu bokhro jobrehi
 Nuyathi nihngla phasa khilaihi sausi
 Khamma thihdu sihmaha nini Hasong;
 Khamau bahrihi khaisa gainsong.

Songhasei nihng khaisa songha,
 Yajmu brai rinang, raoriphuya' de bejengkhong
 Phinsi mamahng phunuha jahi gosong,
 Hoi pherdabdao khusong.

Famiebar Barman (Gorlosa)

Aju jahng Adaini Jathai

Adai khuthaithai
Girikha boni bahathaih,
Aju lamthotho
Bokhro boni dma phontho.
Yajmuh lahi adai himdu
Gongkhlahi naikhlahi,
Ajude himma khisrai derkhuhi
Yajmuh phaidingrihi.

Aju thudu Adai thudu,
Aju gorob blaibaha Adai gorobdu,
Adai gorob blaibaha Aju,
Meser mosoh phinle phintha
Bagsadaodu khram muritha !
Baiji nising khnayarao
Khnajlihi gainsonglaidu
Sreba gaolem
Srebade dmakhoh thihbodu.

Famiebar Barman (Gorlosa)

Therkhu Gujidao

Therkhu berkhu Gujidao
Phesle phasla jabaido
Mnirihi mlaikhe
Jarla miniyalao !

Guji guji jabaidao
 Therkhu berkhu Gujidao
 Khahdukhukhe jarni huihi
 Khribkhe miniribaidao !

Famiebar Barman (Gorlosa)

Dau Bakhari

Dau Bakhari ! Hoi Dau Bakhari
 Ridanangthi aneh khasa
 Nini boh bakhari?

Mjangya mjangsisi, naiya naithaosisi
 Sre horikha, sre kharikha
 Olai gejbthithi ?
 Niya braibathi haphthasini hathaihathi
 Dau Bakhari ! Hoi Dau Bakhari ?

Ridanangthi aneh khasa
 Nini boh bakhari ?
 Daobainangmuh angbo nalai
 Raji raji nohlai nohlai
 Bagrang bakhari maikhade ninilai !

Prafulla Barman (Thousen)
Panchera, Cachar

Ahni Amai

O Amai ahni Amai
 Nihng niyala ang bedeh dongma,

Nihng giri khala angkhe
 Sere bamah bamma bakhuma!
O Amai nihngning deriba juriba
 Nihngning hajairiba habsauha
Nihngning jiriba nihngning lingri jenba
 Nihngning naisoba nuhsoba,
O amai thihyabala nihngningthi
 Nihngning amai thihrijenbathi,
O amai nihng giri khala
 Serekhening amai thihnang angla !

Prafulla Barman (Thousen)

Baigodei Dima Bsahrao

Baigodei Dima bsahrao
 Grausi lamsi dongyarao,

Hathani gathar naisoh
 Mjang nusoh dongyarao
Thuba mudri thangyarao
 Gana khuja dongyarao;
Rogong gajain dathihlasi
 Kham degao dakhamlasi,
 Jing greng masi
 Jing bithih bausi
 Jingning hahng
 Jinging hayu
Baigodei Dima bsahrao.

Prafulla Barman (Thousen)

Bedehe Jaba

Rahng banghibo
 Bangjao sojaoyaba,
 Mai grikbangba
 Maiphang songkhu phuyaba,
 Di grikbangba
 Dirimma khatharba,
 Yaurehp rehpbangba
 Rehp gjai jalangba,
 Yau gbang jaba
 Khusi mjangsoyaba,
 Joba gebrebangba
 Jothao phuyaba,
 Mihyung debangba
 Jarkhe nuthar layaba,
 Namah Timi debangba dongba
 Dimlang di rlaoba.

Jatiram Barman (Bodo)

Hojai

Nokhasau

Nokhasau sangsaiyaba habaikhlaho dong eboh Habasau.
 Jorai (swadhin) jarkhe baulaya nokhasausalai maijare basau.
 Subong jahi dongyaro habasaukhe joranilai hadaiyaro.
 Habasaukhe Nokhasaune thangdaodao sangsaima bauyaro.
 Waisoma donghi girilai bauham donghi danghamyalai.
 Habasau soyaiya japhaidu subungni jathaike jenbalai.
 Khiphi dong Nokhasau habasaukhe nikhim badim gidinglai.
 Nikhim maisoya hari maisoya baudu nokhasau girilai.

Hamhi dongba sainkhali habasauha sausikhe nanghaya.
Habasauha dong sotharsi Nokhasaukhe nangbo nandaoya.
Dang gajaikhe dangham thihi hamdao thangdao danglaidu
Baugajaikhe bauham bauhi yahon sagang dang badailaidu
Nokhasau dongla nokhasauha nangdao haya tharmaimani
Habasauha dong sere badailaiba jaba jaya santhirmani
Badailai dangham boprang glaiya yaublai nuhi khinphaidu
Habasauni thimung jathai yaublai bubli samphadao sophaidu.
Habasau dini soyaiya jarai joro jaladu riya khusi muli sandi
Gmangdu Nokhasau eboningthi Habasauha ahni yausandi?

Nokhasau nihng joraini hang jahi khribha khaoyunglai
Thimhi dongre habasauha jogaoya nujaoyah budunglai.
Sangsaiphin baugajai danggajai saukhuli jahi Nokhasau .
Phungsi phai Habasauha lonma mainang dong Nokhasau.

Jatiram Barman (Bodo)**Gakhrangdi**

Ahni nolai gakhranglili dikhongma narni hajik yaraiha.
Hain-thi buthujahng khaisenphaiba jbah nangbaha.
Delaidi ang majangdi mathla Gakhrangdi ahni bumung.
Thumplung khaiphlung donjenbani raji ahni dongphlong.

Dikhongmah ahni mlauthani bonsaling lugujahng thumthani.
Phadain ahni himbaithani nohphela dong phungsi lengothani.
Phorikho girih phorimani yungma kharangma thakhri luma.
Aju adaikhe sower jama rihandi dauma megain gorima.
Murithaih kharamthaih biringkhade khaigo naigo jamaima.
Sgang khunangni baikhoha sohiyakhade bojor goronma.
Dikhongmah haphaini naga phoriyansarao baiba naiphaire.
Bainang bainang bairingya bojor maiya baiyahi thanglare.
Dikhongmah narni haphai gnang raja bandla nagadao.
Baiji baiji bailare baola nangbalai jasimaiba bangdaodao.

Sikari dajabai daumeser gaomani guthu hagraha thanglakha.
 Bongreng danabai phadain dagaphai saingjer mathi mathiha.
 Phisa phinba slaihi dikhongmah narha phorong sainbli dasongbai.
 Di khaohima ang dikhongmaha alang alang naima thajaobai.
 Haphai narni naga khah gnanng thihkhabo khah gbangdao.
 Dukhisa thihkhabo girisa thihkhabo hamdao ahni khah masidao.
 Babajahng khunang thangsmaidu gabasi phadain dangsmaidu.
 Sah dephaikha suh mathla japhaikha bahamjik langma baophaidu.
 Khanai laobangdi baikhoha baiba ringbangdi lengba ringyadi.
 Khurabai hambangdi hathai majangdi himba himthai naithaodi.
 Disrudi niya nihng majangbi Disrudilai Joyadi niya raobi Joyadilai.
 Nihng jukhuba sainkhali jurumah rihinang gainsari phisari sosilai.
 Phadainha mlaolailahi phejenlaiyaba grau mlang amai khnakha.
 Mlaudao jakhabdao sah sik khah nanglaibani diniha goyju garphaikha.
 Hamya dabau gakhrangdi haphaini naga thihkhabo angbo hainse.
 Dukhu hadi jakhade thanghi dongba soside habajaomaimase.

Biswajyoti Barman (Daolagajau)

Rongpur, Silchar, Cachar

Barhi Thaihi Khrengthing Graudima

Jathingmuh magrau graudima
 Phraphangmalai gedemah gujumah
 Bedeb bosoh haiding haima
 Bubarjahng bthaijahng gablaima;
 Bosohkhe naikhabo bosoh rijing
 Bedebkhe naikhabo bedeb rijing
 Baryung phaikhabo debsih gaoyama
 Hayung hakhabo laihsih graiyama.

Jathingmuh magrau graudima
 Phraphangmalai gedemah gujumah,
 Daurijing ora gablaima githimma

Yaderha mihrijing khaibaima mlaoma,
Ahnsabo khraobo khaja khaja
Nagabo mathlabo hurja hurja
Magrau jahng joma rehpmā
Magrau mjangkhu mjanglangma.

Jathingmuh magrau graudima
Phraphagmalai gedemah gujumlah
Gakhranglili blaih jahng gablaima
Budung-bubar jahng majangma;
Bahai jahng dikhongsni gablaisi
Majanghi hadingsni jnakhusi
Magrau graudima barma thaima
Sain-dain dongdusi gmaya dongma.

Biswajyoti Barman (Daolagajau)

Magrau Graudima

Ahng jodu grau graudimajahng
Nudu saumin mah khurangjahng
Ahng khajaha khajadu
Ahng dukhuha gradu
Ahng mnidu, khabaidu
Ahng thaidu, rjabdu
 Eboh grau jahng, eboh graujahng
 Ahni graumajang, graudimajahng.

Rjab-hi thangdu hagong dangyarao
Thaisong thaidu, bisong bidu hojairao,
Nandao suhthaisa gaosling gaodu
Nandibo khajasi rigonthai mlaudu,

Kharmin-badera gablaiya gablaidu
Jarimin gede boha rmaohi dongladu—
Dongbasi ahni grau magraujahng
Eboh grau gidi graudimajahng.

Baithere bailangdu sere murisa damhi
Baijlom bailangdu sere khramsa damhi,
Khimbar bardu blai gakhrang gejerha
Dau rijing rjablaidu bahi bongphang 'deb-ha
Dilam sordu gerem gathap baithelik baibalai
Barsara sibdu, ahdungsa gisibsa yau dibalai—
Dongbasi ahnining magraujahng
Eboh grau majang graudimajahng.

Baohi khim Gabarani yaphakhlaha
Khah-mujahng bihi thaihi boniha,
Rmauhi wainsonang hainthi ahpnakhe
Khlirnang ahju ahdai, bupha-bumahkhe
Khasaoyung khasaonang ahjang ahdungkhe
Raji mamahkhe gabaokhu gabaonang—
Eboh graujahng, eboh graujahng
Ahn magrau graudima majangjahng.

Rabindranathni Thaislaiyaba Rjabthai-Thairili :

Bakhlaha dongyababuthu Phirthini kobi thihhi mithijaoyaba Rabindranath Tagore (Thakur)ni rjabthai-thairili. Grauhadi nising grau Dimaha thaihslaiba Biswajyoti Barman (Daolagajau).

Nangyabo Nini Nangya Lathingmuh

(Graudimajahng Rabindranath Tagore'ni Geetabitan'ni rajabthai thahsi)

Ningthane khisa rinang thihi
Bauladu ahni kha-muh
Nangyabo nini nangya lathingmuh.
Jekhali nihngkhe nuba maiba
Andhariha saujahng boha
Himbaiba hasiri hagra giri-garaha.
Thaophari masi masain hanang
Lamaha nini, ahng baulabamuh
Nangyabo nini nangya lathingmuh.

Nuba, subung buthu hathaini
Nihngkhe johi sarilangre
Sauha nini haduri saiphrare.
Apomanni lamah gejerha
Bin nini bringsong bringlare
Jarni birilikhe jar khah nanglare.
Nangjaobamuh lamjao luhsari
Godoha nini gainrinangmuh
Nangyabo nini nangya lathingmuh.

Buthu buthu phaidu subung
Rosidu nini stob bisi bthaijahng
Bisi grau bisi khurangjahng.
Bhikkha sainhi nini dergaha
Dophaire bisi ahlang ahlang
Bisining srapp bisining grathaihjahng.

Nangjaobamuh mussi sainyahi
Yagaha nini jarkhe rinangmuh
Nangyabo nini nangya lathingmuh.

Apoman = dishonour, insult; Lamjao lusari = welcome garland; Stob = prayer, praise

Boniha Phinlangneh

Nihng lemkhlaibukha srekhe
Hoi khah khah ahni
Hajai(hi) laikha obani shanti maiyalakha
Hoi khah, khah ahni.

Je lamah jahi phailakha
Boh lamakhede blao langkha
Sumdehebo phinma bonihade
Hoi khah, khah ahni.

Dibu-diha dahire khmau sahi
Maore bakha laihgrain graihi,
Khaha baodu mainang smaihi
Khimni grau bujire thihkhade
Je lama thangkha horhathraini gede
Hoi khah khah ahni.

Horhatrai = hathrai naiding, sandhyatara, venus.

Rabindra Rjabthai : Geetanjali : 08

(Boh rjabthai grauhadi jahng jenbaha edehe 'Aaj dhaner khete roudro chhayay/ lukochuri khela)

Dini mai-hadamha sain-sainkhlimni
Thimkhao khaikhao mlaubai,
Neel nokhasauha sere msaukha
Hadi guphuni rungbai.

Dini breyung blauhi bidi jopneh
Birding baidu jnajahng mlaunch,
Dini smune dibu dirgungha
Dau-dirgung ni mel-lai.

Hoi thangya dini, khaiphling, noha
Thangyakha dinide noha,
Hoi baijikhe dini nokhasau ruhi
Langlailanang sehi.

Juwar diha bukhudi bothonlai
Barha dini mni gablai,
Dini khusi grini damhi suphin
Lainang bubili bjangbai.

Rungbai = boat, rungsa; Neel = blue; Juwar = tide, juwari nisining se 'juwar' grauthai phainaiba thihi sausi, gni graudima ringseng yahraoni grauthai.

Klimjahm

(Shes Namaskar, Rabindranath Tagore, Gitanjali - 148, Song Offering ni eboh Thairili khe grau-slaihi 'Graudimajahng Rabindra Thairili' bumuni laihsiha suguphaba. Eraha khaisa saikhuphinba).

Khlim gasiha, gabara,
Khlim gasiha
Basau gibim lodai glaithing

Nini songsarha.
Srao khrimni hadi bothonlai
Bidi risiglai loglai gongbalai
Khlím gasiha, Gabara,
Khlím gasiha
Khah khrib glai dongthing
Nini nohdirungha.

Birili bisini dilam khahdihng
Sursmai surhi khajasing
Khlím gasiha, Gabara,
Khlím gasiha
Khrib rjabthai jamtharthing
Dimlang sirihá.

Hongso Manas daolangbalai
Sainsong horsong olailai
Khlím gasiha, Gabara,
Khlím gasiha
Jamsi hahng birlangthing
Githiyung-narha.

Khahdihng = anxious; Hongso = Dauphlamdu hayung, graudimajahng bthai laobangdubani banglakhenig denaghakha; Manas = Himalay hajikmaha Kailash mount rogong Manas saravor ba lake. Ebo thirthothani masi.

Dimasa Laihsi Rehpyahraoni Saujarimin Songthe :

Rehpkhring Hojakhring Sonaram Thaosen

Sau khongsihaning rajkanti hojakhring, somaj daukhuslammani baukhring, dangkhring, olaiboning rehpkhring - elai subung Dimasahala smu mlai gbin jadihabo maiba sehngbi - olai dongba sehngyaba marsisah marsikhring sausi dongba Gedemah Sonaram Thaosen. Gedemah Thsosen smu habahni graukhe bauya, dangya smaihi maima dusabi. Hajaiba 26 January, 1922 Maibang haphaini Boila thihyaba nohlaiha. Dambra gaba 31 August, 1996. Bupha Boyandao Thaosen, Bumah Rongjadi.



Gedemah Sonaram Thaosen Haflong Public M. E. School nising first division'ha pass jabani yahonha Head Master jahi Mupha Railway Station'ha slingkho masi slamkhuba. Orahaha boh maithai khaisa khusu dangre. Bohabo gedemah correspondence course'ha Londondi Public School of Economics odeh British Institution of Correspondence Courses'ha phoriba. Gedemah Thaosen Didaokhoni Dhansmaidikhe 1948 maithiha jukhure. Bonsini sah bonwa, sik bonwa.

1952 maithaiha Gedemah Thaosen N.C.Hills Autonomous Councilha Langting nising member songjaojenba odehe Executive memberbo jaba. 1968 maithaiha Councilni Chief Executive Member songjaobakhao. 1977 maithaiha Gedemah Thaosen M. L. A. jahi Janata sorkarha Assamni montribo jaba. Gedemah gbin gbin sorkari hosom odeh besorkari hosomnibo Chairman jaba bangkha.

Somaj daukhuslammane slamyaba 'Dimasa Dara Disani Dol' bumuni hosom masini gedemah Sonaram Thaosen slamkhujenyah Melhoja dongba. Dimasa Cultural Meet jayabasi buthuhabo boning melhoja jare. Hawar odeh haphai gbin buthuhabo Dimasa jadini melmah buthuha narwaisgao jahi gbahiba bangkha.

Laihrimin habahni graukhe thihma thihkala Gedemah Sonaram Thaosen Bodo Sahitya Sabhani General Secretary jahi khusi dangsoba. Gedemah Jaybhadra Hagier odeh Gedemah Thaosen-ni Bodo (Boro niya) grau-khaoyung slamkhumani bauthai dongbamuh. Grau Dima, English, Bangla odeh Assamese jahng rehpre Gedemah Thaosen. National

News Paper buthuhabo boni rehpjuh baigoba. 'Evolution of the Hill People', 'An Introduction to Dimasa History' - eboh buthu gedemah rehpyababuthuha thandaathaoyaba. Silchar nising baigoyaba Dimacha laihjab, graujmalai 'Kolongma' ha gedemahni rehpjuh baigoba bangsabi. Ebone bara All India Radio, Silcharni Dimasa Programme' ha boh rehpyaba rehpjuh b' caste jaba bangsakha. Gedemahning jar Rehphoja jahi grau Dimani graujma laihsi khaikhojenba, bumu- Gdain Khurang. Bangla rehpmi jahng saphaiyaba eboh Gdain Khurang baigojenba 17 July, 1972. Gedemah Thaosen Dima Khurang thihi laihsab masini rehphoja dongbakho. Gedemah Sonaram Thaosen rehpyabasi laihsi buthu edehe -

1. Deemasa Porijen (Poriseh), laihsia khaikhoba maithai rehpyaba grih, grau Dimani eboh phorijen laihsikhe Shillong'ni Aguan pressha saphaiba thihide rehpphadu. Eboh laihsikhe 1954-55 maithai bleb' ha saphaiba thihi sausi gnini rehpthaiha phoriba maiba. Khaikhoba - Haflong Bodo Sahitya Sabha.
2. Deemacha Porigniba (Kho maner pathyo), 1972. Rehpmi Bangla.
3. Habbah Gdain (Japhnuthai, Playlet), 1985, eboh Bangla rehpmi jahng saphaiyaba.
4. Chicagoha Swami Vibekananda, laihsia khaikhoyabani bumu odeh saphaiba maithai rehpphayaba grih.
5. Dimasa augury laihsi 'Dima Khurang' thihi 1986-ha baigobane (Jingde laihsikhe nuba maiya).
6. Dimasa Bhasa-Bijyan Parichay, 1994, eboh Bangla jahng rehpyaba grau Dimani grau gonthai (grammar) laihsi, ebokhe khaikhoba Haflong Art Society, jruba Nikhil Bharat Banga Sahitya Sammelon, Haflong Branch, rehpsaikhuba Jagannath Chakravarty.
7. 'History of the Dimasas and Other Writings of Sonaram Thaosen', 2015. Eboh Sonaram Thaosen rehpyaba Dimasa jarimin odeh gibin rehpjuh buthukhe gathaisiha johmhi Vandana Thousen editing khilaiyaba laihsi. Eboh laihsikhe khaikhoriba District Information and Public Relations Office, Haflong, Dima Hasao.

Ebohbutuni basauha Gedemah Sonaram Thaosen rehpyaba rehpjuh (essay) bangbi.

Eboh sauriminsahkhe rehpkhuba Biswajoyoti Barman, Rehpsaikhusgao, KHURANG, Dimasa Sahitya Sabhani laihjab.

Rehpkhringdi Nirupama Hagjer

Dimasa jadikhe msakhumane odeh somajni rahng-rihni habbaha gakhurimane bauhi dangyaraoha Gedemaghjik Nurupama Hagjer thangdaothaoba sausi. Laihsi laihbra rehpbha phaih bani habah-habo Gedemahjik Hagjer sgangdahi wainsojaoginyaba sausi. Laihrimin habah-ha Dimajikraoha bonining yaublai bangdao odeh thangdaothao.



Gedemajikni bupha Rajendra Barman (Hasnu), bumah Niradhani. Gedemajik Nirupama Hagjer Cacharni Borkhola haphai jarimingnag Bijoypur nohlaiha hajaiba 15 April 1928 maithaiha. Dambra gaba Haflongha 11 July, 2011. Gedemahjik 1950 maithaiha hojakhing Gedemah J. B. Hagjerkhe jukhuba. Jukhubani maithai sguh yahonha Gedemahjik Hagjer 1959 maithaiha matric pass khlaire.

Bonsini bsah gtham, bisik gtham. Khribbo jar jarni habah-ha gede guju sakhri dangyarao. Bsah radaothaoyaba duha Dima Hasaoni M. L. A jahi dongyaba Gedemah Birbhadra Hagjer I.A.S. jahi Assam sorkarni Commissioner Secretary jahi sakhri nising denegaolaba. Bisik Gedemahjik Marmi Hagjerbo I.A.S. officer sausi dongba. Bsah langjer Dr. Shilbhadra Hagjer Assam sorkarni health Departmentni sausi officer gede dongba. Bsah langjer Balabhadra Hagjer Assam sorkarni Tax departmentni Superintendent, bisik langjer Dr. Sumitra Hagjer Diphu Medical Collegeni Principal odeh bisik gididaothaoyaba Namrata Hagjer, Indira Gandhi National Open University (IGNOU)ni Director sausi.

Gedemahjik Nirupama— bsai Hagjerni sausingring mamahng jahi dongyahi yaphrisgang khurangsgang jahi somajni khusi dangkhring dangba odehe 1960 maithaiha Haflong Mahila Samiti khajenhi boni melhojajik jajenba. Gedemahjik Hagjer Cacharni Silcharhabo Dimajikraoni hosom masi khajenriba odeh Dimasa jarimin khakhuslammani hosom masi kharihi boni melhojajik jabakhoh. Dimasa Sahitya Sabha khajenbahabo boh eboni Sibringyahjik songjaoba. Eboni basauha boh N. C. Hills Autonomous Council-ni Member saikhujaoba odehe State Social Welfare Board odeh Assam State Integrator Councilni member songjaobakhoh.

Bumugnang laihjab, magazine, journal odeh rmaulaih butuha gedemajik Hagjer rehpuh rehpbha bangbi. Boh Graudima, Graubangla odeh Grauasum jahng rehpre. Rehpujeba Cacharni Daluni Shasanka Barman yau jahng rehphi khaikhoyaba 'Derpnai'

bumuni magazineha 1950 maithaiha. Silchar nising baigoyaba 'Dimacha' bumuni magazinehabo Gedemahjik rehphlaire. Upendra Chandra Guhani 'Cacharer Itibritta' bumuni laihsikhe editing khilaihi khaikhoslamriba boni gede khusi mungsi. Boni thangdaothaoba yaublaih jakhade Dimasa-Assamese thaiseb (Dictionary).

Gedemajik boni dang yaublaih mjangni khilaihi gibin gibin yausandi manlekha maiba bangbi, Boh buthuha thangdaothaoba jakhade- Asssm Sahitya Sabha Yausandi (2004) odehe Assam Masainjik Rehpyahjik Yausandi (2006) maibakho. Gedemajik Hagjer Assam sorkarni Literary Pension-bo maiba. Laihmin habbaha boni dangyaublaini khilaihi Dimasa Sahitya Sabhabo Gedemajik Nirupama Hagjerne J.L. Thaosen Sahitya Yausandi yauphaba 2011 maithaiha. Dimasa jadiha Assm sorkarni Literary Pension Gedemajik Hagjer majjenba. Gedemajik Hagjer Dimasa somaj odeh yawairiminni phantha gibin gibin maiphahi rikhiphla rehpyaba bangbi. Gedemajik rehpyabasi laihsbuthu edehe -

1. Dimacha Bhasa Sikkha, 1972, Bangla grau jahng rehpyaba eboh laihsi grau Dima slingneyaraone khilaihi.
2. Dimasa, grau Asum jahng rehpyaba eboh laihsi Dimasa somaj odeh yawairimin maiphahi.
3. Dimasa A, Aa, Ko, Kho, 1985, rehpmi Asum jahng saphaiyaba eboh laihsi slingjenkhone khilaihi.
4. Hagjer Chengphong, 1986, Hagjer sengphong'ni bongso budung lsihsi, khaikhoba rehpyahjik jar, Convent Road, Haflong.
5. Mairong Phasaidi Khaseba Julu, 1991, eboh juluni doptor laihsi, khaikhoba rehpyahjik jar, Convent Road, Haflong.
6. Dimasa Sadhu Katha, 1998, grau Asum jahng rehpyaba Dimasa khuhrgai kharmin laihsi, khaikhoba - rehpyahjik jar.
7. Dimasa Grauren, 2005, Dimasa - Assamese thaiseb (Dictionary), khaikhoba - Birbhadra Hagjer, Shilbhadra Hagjer, Balabhadra Hagjer.
8. Dimasa Samajor Itibritta Aru Lokacharat Ebhumukee, 2009, grau Asum jahng jar rehpyaba rehjubuthuni johmkhulaihsi, khaikhoba - rehpyahjik jar.

Gedemajik laihsbuthu Bangla odehe Assamese rehpmi jahng rehpyabasi gaja.

Eboh sauriminsakhke rehpkhuba Biswajoyoti Barman, Rehpsaikhusgao, KHURANG, Dimasa Sahitya Sabhani laihjab.

Rehpkhring Jatindralal Thaosen

Dimasa laihrimin habsauha jnakhuhi dongyaba bumu masi Gedemah Jatindralal Thaosen. Laihrimin habah-ha sining boni yaublai dongba niyakho, somaj jadikhe daumjang dausgumane nangyaba habah gibinha hamside slinghabah-habo boni yaublai dongba bangsabi.



North Cachar Hills (duhani Dima Hasao) ni Gonjung'ha Gedemah Jatindralal Thaosen hajaiba 2 December, 1930 maithaiha. Dambra gaba 10 February, 2003. Bupha Jogendranath Thaosen, bumah Chandrabali. Swadhinni sgangha Sub-Division dongyaba N. C. Hills nising Dimasaraoha matric pass khelaijenba Gedemah Jogendranath Thaosen, gedemah 1916 maithaiha matric pass khlaire.

Gedemah Jatindralal Thaosen Haflong Govt. Boys School nising 1954 maithaiha 2nd Divisionha matric pass khlaire. Yahonha Shillongha Assam sorkarni Transport deparment'ha chakribo dangre odeh St. Edmunds Collegehabo phorire odehe 1958 maithaiha B. A. pass khlaire.

Gedemah J.L. Thaosen 1958 maithaihaning noh jare. Nobrajikni bumu Tribeni (Barman, Kemprai), somajni khusi dangyahjik sausi. Bonsini sah gni, sik gni. Beren jahng 1) Ajoilal Thaosen (Tito), businessman, 2) Tapati Thaosen (Nunisa), House wife 3) Sujoylal Thaosen, IPS Officer gede, duha BSF-ni Addl. Director General, odeh 4) Ritu Thaosen (Nunisa), Head of the Deptt., History, Cotton College, Guwahati.

Slinghabah-ha Gedemah J. L. Thaoseni yaublai bangbi. B.A. Pass jablaihi jarni hathaniha gidingphinre odehe Maibang M.E.Schoolkhe judaorihi High School slmare, Langtingha M.E.School masi slamkhure - jarning boni Headmaster jare. Yahonha Jatinga Sarkari M.E.Schoolha Headmaster jahire. Oraha chakri dangba dainbonwa jabahaning 1960 maithaini June bdainha Assam sarkarni Sub-Divisional Publicity Officer jahi Haflongha chakriha gbahire.

Gedemah J. L. Thaosen maithaijahng 1969-70 beleb'ha All India Radio, Gauhatiha deputationha donghiba bleb'ha 1975 maithaiha Gauhati University nising Law pass khlaire. Eboni yahonha Umrangsoha Bharat sarkarni NEEPCO, Kopili Hydro Electric Project-ha Administrative Officer jahi project gdainkhe dangbani khusiha hoja jare. Jarni department'ha

gidingphinhi Gedemah Thaosen gubin gubin post'ha khushi dangre odeh Joint Director jahi 1995 maithaiha retired jare.

Thihkhabo gedemah prik pkrik noha khamhi donglayahi somaj jadikhe dausgumani gubin gubin khusiha yau sengre odeh sganghalaining thaoyasi rehpphalangre. Gedemah Dimasa Sahitya Sabhani jajenyaba melhoja dongba. Ebokhe garhibo gubin gubin besarkari hosombuthuni melhoja jabakho. Gedemahni laihrimin hadaithai grau Dima jahng sining niya. Engreji odeh Bangla jahngbo rehpre phaihre. Grau Dimani thairili laihsi saphaihi baigojenyaba gedemahning. Laihsini bumu - 'Deemasa Deemayung Sadinang'.

Gedemah yausandi maiyaba buthuha thangdaothaoba jakhade - a) Leela Smriti Sahitya Sanskriti Samman, 1996; yauphaba Eka ebong Koyekjan, Guwahati; b) Seva Samman, Bhaosaheb Seva Nyas, Lucknow, 1999 odeh c) Nazrul Shata Barsha Purashkar, 1999, yauphaba Barak Upatyaka Banga Sahitya o Sanskriti Sanmellan.

Gedemah J. L. Thaosen rehpyabasi laihsi buthu edehe -

- 1) Ansaraoni Sainrenlaih, 1972, eboh slingjenkhohni khilaihi Bangla rehpmi jahng saphaiyaba grau Dimani dharapat laihsi, khaikhoba - Assam Phorilaihsi Naislam Naihi Khaikhoyarao, Gauhati - 1.
- 2) Deemasa Deemayung Sadinang, 1978, Bangla rehpmi jahng saphaiyaba grau Dimani thairili laihsi, khaikhoba Gopal Chandra Naiding.
- 3) Paramhamsadeva, 1978, Swami Paramhamsadevani laihsikhe grau Dima jahng thaislaiyaba, Bangla aikhor jahng saphaiyaba.
- 4) Maduli, 1995, ansaraokhe sibringyaba thairili laihsi, Bangla aikhor jahng saphaiyaba, khaikhoba rehpyahsa jar.
- 5) Grau Deema jahng Rabindra Nazrul, 1997, Rabindranath Tagore odeh Nazrul Islam-ni rjabthai grau Dima jahng thaislaiyaba, khaikhoba - Nikhil Bharat Bongo-Sahitya Sanmelon, Haflong Branch, N. C. Hills, Assam.
- 6) Bibleni Dhormo Singrikhi, 1998, Swami Bishupuriji-ni laihsikhe grau Dima jahng thaislaiyaba, khaikhoyah Kumbha Kumar Hojai, Haflong.
- 7) Deemasa Jatir Utso Sondhane, (1998 ?), khaikhoba Kumbha Kumar Hojai, Haflong
- 8) Deemasani Shol, 1999, grau Dimani graukhandi (Proverb) laihsi, khaikhoba - Kumbha Kumar Hojai, Haflong.
- 9) Hitopadesh, 1999, Sanskrit literatureni kharmin Dr. Mukunda Madhava Sharma grau Asum jahng rehpyabakhe grau Dima jahng thaislaiyaba, khaikhoba - Kumbho Kumar Hojai, Haflong.


- 10) Shrimad Bhagavad Gita, Grau Deemajahng, February, 2000, Khaikhoba - Bharat Vikas Parishad, Haflong Branch, Haflong -788819.
- 11) Dr. Keshav Baliram Hegdewar, 2000, Khaikhoba - Kumbha Kumar Hojai, Zila Sangha Chalak, Haflong, N.C.Hills.
- 12) Repmien-Diema, 2002, Roman rehpmin jahng grau Dimani minjohm bedeh jama nangre bokhe maiphahi jarni bauthai rehphlayaba, kaikhoyah - rehpyahsah jar.
- 13) Guru Khunee Ramayan, 2002 (?), Swami Vedananda-ni Guru Mukhee Ramayan-khe grau Dima jahng thaislaiyaba.

Eboni basauhabo Gedemah Jatindralal Thaosen rehpuh (essay) rehpyaba bangsabi. Gedemah rehpyaba thairili saphaiyahi dongkho. Gedemah rehpyaba laihsi masi magnikhe garhi gejesi dongbasibo Bangla rehpmin jahng rehpyaba gaja.

Eboh sauriminsahkhe rehpkhuba Biswajoyoti Barman, Rehpsaikhusgao, KHURANG, Dimasa Sahitya Sabhani laihib.

Rehpkhring Uttam Chand Barman (Hagjer)

Dimasa jadini habsauha danang danang sosibo wainsojaohi jnakhuhi dongginyaba bumu masi Gedemah Uttam Chand Barman (Hagjer). Rehpsgang rehpkhring, bauhoja baukhring odeh dangsong dangkhring Gedemah Barman Dimajadini thangdaothaoba jarminkhringbo (Historian).



Gedemah Uttamchand Barman 1934 maithaiha 29 July tarik'ha Cacharni Kalain haphai Kurkuri nohlaiha hajaiba. Bupha Bipin Chandra Barman (Hagjer) odeh bumah Madri (Miyungma gedeva). Gedemah U. C. Barman daphuyung-bihadaothuni berenha bumah-buphani sah thaiham thamyaba. Bumah Madri Dimaraja Lakshmichandra-ni (Raja jih maithai 1772-1774 A.D.) rani Udayavati-ni nising yeryaba hajairen jaih (8th generation).

Nohlaini slingjenkhoha phoriblaibani yahonha Gedemah U. C. Barman Kalain M. E. School odeh Barkhola Raja Gobindachandra Memorial High Schoolha phorire. Gedemah matric pass khlaire 1955 maithaiha. Eboni yahonha gedemahkhe montri gede Joybhadra Hagjer Shillongha langre. Montrini oraha donghi St. Edmund's College-ha gbare. Clerckni chakribo maire. J.B.Hagjer Rajyasabhani M.P. jahi Delhiha thanglabani Gedemah Barman dongthani slaihi Jonmejoy Barman Rajkunwor-niha noh bhara lahi dongre. 1959 maithaiha Gedemah Barman B.A. pass khlaire.

Eboni yahonha Gedemah Uttam Chand Barman Central Administration of North-East Frontier Agency (NEFA) (duhani Arunachal Pradesh) ha Deputy Co-operative Officer (Incharge of Frontier Tirap Division, Khonsa) jahire 1961 maithai bleb'ha. Yahonha jarni graude Assam Govt.ha Sub-Registrarer jahi phailare odehe Deputy Registrarer jahi 1997 maithaiha retired khlaire.

Gedemah Barman jukhure 1968 maithaiha. Bihini bumu Maya Rani. Bonsini sah sausi sik sausi. Sah Pragjyoti Barman (Monsoon) Public Engineering Department'ha Executive Engineer; bisik Sanskrit'ha M.A., Haflongha Govt. Boys Higher Secondary School-ni slinghojajik, bjamadi Phanindra Jidung, Assam sarkarni Higher Secondary School buthuni Director.

Rehpha phaibaha sining niya, Gedemah Uttam Chand Barman somaj dausugumani gibin gibin khusihabo harsenghi dangre. Phoriansa dongba sainkhaliha Dimasa Chatra Samitini hoja sausi dongba. Gedemah Barman Dimasa Sanskriti Parishad odeh Dimasa

Sahitya Sabhani slamkhujenyah Melhoja Pharain. Khajenbani maithaisini bisinhaning Dimasa Sanskriti Parishad-ni melhoja jaba odeh budu glau Parishad-ni melhoja dongba. Gedemah Dimasa Historical Heritage Foundation-ni slamkhujenyah Melhoja; dubo eboni melhoja jahi dong. Scheduled Caste and Scheduled Tribe Association-ni gedemah slamkhujenyah melhoja. Ebohni basauhabo gubin gubin hosom jahng dongphabakho.

Gedemah Uttam Chand Barman phoriansa dongba nisingning Dimacha bumuni laihseb odeh gubin magazine, grau jma laihsi buthuha rehphabure. Chakri dangba sainkhali khusi raobahabo rehpha phaihba haigarya. Grau Dima, Bangla odeh English grau jahng rehpre. Rehpyabasibuthu jariminning bangdao. Gedemah Barman-ning swadhinni khilaihi hahng riyaba Vir Sambhudhankhe jarimin laih buphin nising Dima jadi odeh gibinni khah muha khamribaha hojsgang jaba, Sambhudhanni saurmin laihsibo rehpenba. Gedemah rehpyabasi laihsi maji damsi jadu.

Gedemah Barman elai dang yaublani khilaihi gubin gubin hosombuthu nising yausandi, manlekha odebasi maiba bangbi. Itihas Ratna, Sahitya Ratna thihi upadhibo maiba. Dimasa Sahitya Sabhani manlekha gnang Jatindralal Thaosen Laihrimin Yausandi maiba 2014 maitaiha. Eboni sgangni maitaiha Assam sarkarni Literary Pension-bo yauphajaoba.

Dimasaraoha duh sosiha rehpyahraoha Gedema Uttam Chand Barman-ning rehpha bangdaothaolai dongmajaodu. Smuni thihkhade boni laihsi buthuni buphin bangbi graude boni laihsibuthu dekhlibi. Raba sainkhalihabo gedemah dubo rehphalangdukho. Gedemah Barman rehpyabasi laihsibuthu edehe -

1. A Peep into the Past of the Dimasas, 1982; English jahng rehpyaba jarimin laihsi, khaikhoba - Dimasa Sanskriti Parishad, Silchar, Cachar.
2. Shahid Vir Sambhudhan Fonglo, 1989, swadhinni khilaihi hahng riyaba Sambhudhan Phongloni saurimin laihsi, khaikhoba - Dimasa Sanskriti Parishad, Silchar, Cachar.
3. Habling, 1994; Bangla rehpmmin jahng saphaiyaba grau Dimani Thairili laihsi, khaikhoba - Dimasa Sanskriti Parishad, Silchar, Cachar.
4. Ranighat - The Last End of The Royal Voyage of The Dimasa Kings, 2005, english jahng rehpyaba jarimin laihsi, khaikhoba - rehpyahsa jar.
5. Khimthori, 2005, Bangla rehpmmin jahng saphaiyaba grau Dima jahng thairili laihsi, khaikhoba rehpyahsa jar.
6. Chandragiri, 2008, Bangla grau jahng rehpyaba Cacharni Sonai Siv Mandir'ni jarimin laihsi, Mandir'khe Dimaraja Krishnachandra jahng sanijaohi montri Joysingha Barmma slamriba. Laihsikhe khaikhoba rehpyahsa jar.

7. The Dimasas and The Ancient History of India... - Vol. I, 2011, Dimasani jarimin yader smaihi rehpyaba jarimin laihsi; khaikhoba rehpyahsa jar.
8. The Dimasas and The Ancient History of India ... Vol. II, 2012, Dimasa raja jibani jarimin rehpyaba laihsi Dimapurha raja jiba sosini, khaikhoba rehpyahsa jar.
9. The Dimasas and The Ancient History of India ... Vol. III, 2017, Dimasa raja jibani jarmin rehpyaba laihsi - Maibang nising jenhi Wabari, Khaspur, Rajapathar sosini. Khaikhoba - rehpyasa jar odeh Bindiya Publication, Tarapur, Silchar, Cachar.
10. Heromborajader Bongso Parichay Ebong Itihaser Patai Karkari O Rajaghar, 2018; khaikhoba - rehpyahsa jar.

Eboh buthuni basauhabo gedemah rehpyaba rehpyahsa gbangning dongkho. Gedemah rehpyaba laihsi baigoyahi dongkho.

* Nangyaba Grau : Gedemah Uttam Chand Barman-ni jarmin laihsi Vol. I odeh Vol. II khede Bharatvani-ni portal-ha maidu.

Eboh sauriminsahkhe rehpkhuba Biswajoyoti Barman, Rehpsaikhusgao, KHURANG, Dimasa Sahitya Sabhani laihjab.

Rehpkhringdi Anupama Naiding

Dimajikraoha laihrimin hadaiyarao wainso jaodaginyarao buthuha Anupama Naiding thangdaothaoba sausi. Somajni khusi haphraihabo gedemajik dangba bangbi. Slinghojajik jahibo boh khrib jahng manijaohi phaidu.

Gedemajik Anupama Naiding hajaire Cachar haphlaini jarimin gngang Bijoypur nohlaiha. Hajaiba tarik 30 September 1938. Bupha Rajendra Barman (Hasnu) odeh bumah Niradhani. Tihphajare, Gedemajik Naiding bumugngang Dimajik rehpkhringdi Nirupama Hagjerni bahandao.



Anupama Naiding Haflong Govt. High School nising 1956 maithaiha entrance pass khlaire odehe Shillongha Lady-Cane Collegeha I.A. ha phorire. Boh sainkhaliha duhani matric ba High School Leaving Certificarte Examination (H.S.L.C) khe entrance odeh Higher Secondary (H.S.)khe I.A. thihre.

Gedemajik Naiding jukhure 1960 maithaiha. Bsai Gedemah Digendra Chandra Naiding North Cachar Hills Autonomous Councilha sakhri dangre. Yahonha Gedemah Naiding Autonomous Councilni Member's hostelni Superintendent jahi retired khlaire.

Jukhuhi phoribaha hatho thaokhabo Gedemajik Naiding yahonha 1973 maithaiha Haflong Centre nising Hindi Bisharad pass khlaire. Suru suru Haflong Govt. College nising B.A. 1976 maithaiha pass khlaire odeh 1985 maithaiha Silcdhar Teacher Traning College nising B.T.bo pass khlaire.

Gedemahjik Naidingni sakhrini graukhe thihma thihkhala 1960 maithaiha phorijenkhooni slinghojajik jajenre odeh Haflongni givin givin phorijenkho 1967 maithai sohsi phorihojajik phoriribaha bumu jare. Eboni yahonha 1971 maithai sohside Haflong Middle English Girls Schoolha slinghojajik jabore. Yahonthaoha Haflong Govt. Girls' Higher Secondary Schoolni slinghojajik jahi 1996 maithaiha sakhri nising retired khlaire.

Sakhri dangbani lugu lugu Gedemahjik Naiding somaj hamkhurimani khusi haphraihabo gbaba odehe Haflong Dimasa Mohila Samitini hojajik jaba. 1981 maithai nising boh samitini givin givin hathoha Danghojajik sgao, Melhojajik pharain dongba odehe 2005 nising 2010 maithai sosi eboni Melhojajik dongba. Eboni basauhabo boh North Cachar Hills Dimasa Women Societyni Sibringyahjik odeh Haflong Writers Journalist Associationnibo Melhojajik songjaobakho.

Gedemahjikni bsah gtham bisik gni. Bsah radaoyaba Debasish Naiding Blok Development Officer dongbamuh, dambra gakha. Dongyarao gbin bsah gnibo business khlayarao Debadutta Naiding odeh Sebojyoti Naiding. Bisik gniha radaoyaba Sujoya Naiding Haflong Govt. Girls H.S.School ni slinghojjajik; gidaoyaba Dr. Sumona Naiding Assam sorkarni healtha departmentni Joint Director.

Rehpba phaiba lahrimin hadaibakhe Gedemajik Naiding mathla dongba sainkhali nisingning nangjaohi harsenghi phaiba. 1956 maithaiha baigoyaba Bodo journalhabo rehpba. Gedemajik rehpyaba buthu jakha rehpu, thairili odebasi. Dimasa somaj, slingthai, yawaiphabutai, lahrimin, mdai-haithi odebasi maiphahi gedemajik phlahi rehpu rehpre. Graudima odeh Graubangla jahngning rehpba bangdao. Gibin gbin rmaulaih, laihjab-magazine, periodicals buthuha gedemajik rehpyaba baigokha. All India Radio, Silcharni Dimasa Programmehabo boh jar rehpyaba graujuh phoriba bangbi. Thaislai lahrimin habah-habo boni yaublai dong. Gedemajik phinsi Haflong Dimasa Mahila Samitini rmaulaih 'Gonthai' nibo rehphojajik dongba.

Gedemajik Anupama Naiding boni dangyaublaini khilaihi 1997 maithaiha Dr. Ambedkar Fellowship Award maiba. Assam sorkarni Industries department nising 1991 maithaiha best craftman yausandi maiba. Eboh buthuni basauha 2005 maithaiha Dimasa Students Union (DSU) odehe 2017 maithaiha Dimasa Sahitya Sabha (DSS) nising man-yausandi maibakhoh.

Gedemajik Naiding rehpyaba rehpuh laihsiha gathaisiha johmhi baigoyakhabo ansaraone khilaihi rehpyaba Ramayan ar Mahabharatni kharmin laihsi odehe thairili laihsi baigokha. Boh laihsi buthu edehe –

- 1 Ansaraoni Ramayana, baigoba 1999, rehpmi Bangla.
2. Mahabharanni Kharmin, baigoba 2007, rehpmi Roman
3. Kha Thairili (thairili laihsi), baigoba 2015, rehpmi Roman.


Gedemajik Anupama Naiding rehpyaba kharmin gdain laihsi publish jayahi dongkho.

Eboh sauriminsakhke rehpkhuba Biswajoyoti Barman, Rehpsaikhugao, KHURANG, Dimasa Sahitya Sabhani laihjab.



Rehpkhring Vijayananda Barman (Khemprai)

Gedemah Vijayananda Barman (Khemprai) daugari gnang slinghoja jahibo bumu gnang, laihrimin rehpkhring jahibo bumu gnag. Dongba-jiba sadharon thihkhabo bauba thaiba gedeh guju. Dimasaraoni laihrimin habah-ha wainso sgang wainsojaogneyaba sausi Gedemah Barman.



Gedemah Vijayananda Barman hajaiba Cacharni Bihara-Bikrampur haphaini jarimin gnang Gorervitor (Hawarmah) nohlaiha 09 September, 1941 maithaiha. Buphani bumu Joyendra Chandra Barman (Khemprai), bumah Sukhada.

Eraha Hawarmah nohlaini graukhe khaisa thihphahanang. Gedemah Barman hajaiyaba Hawarmah nohlai Dimasa jadini laihrimin habsauha gjauni bumu thaisi. Smuni thihkhade eboh nohlaihaning grau Dimani laihsi rehpyenyaba Gedemah Manicharan Barman (Dibragede) hajaiba. Boh rehpyaba laihsini bumu 'Hairimbo Bhasa Probesh'; baigojenba 1904 maithaiha. Manicharan Barman raja Krishnachandra'ni montri dongyaba Joysing alias Sulai Barman nising yeryaba hajairen doh (6th generation). Dimarajasauha Bangla jahng thairili rehpyaba Gedemah Chandra Mohan Barman'bo (Hapilasa) eboh nohlaininingne. Boh 'Jatiyo Kobi' thihi jariminha mithijaore. Jariminkhring Gedemah Nalinindra Kumar Barman'bo (Khemprai) eboh Hawarma nohlaihaning hajaiba thihdu.

Elaiba gjau thaiyaba guphu baryaba Hawarma nohlaiha hajaihi Gedemah Vijayananda Barman Bihara slingjenkhoha phorire. 1961 maithaiha Haflong Govt. School nising matric pass khlaire. Silcharni Cachar College nising 1966 maithaiha B.A. Part - I pass khlaire.

Collegeha phoriba sainkhali nisingning Gedemah Barman rehpre-phaihre, laihrimin hadaire. 1960-61 maithaiha grau Dimani baigojenyaba laihsib (magazine) Dimacha (Dimasa)ni Gedemah Barman phingni rehphoja jaba. Phinsi 1964 - 65 odeh ahr phinsi 1965 - 66 maithaiha.

Gedemah Vijayananda Barman 1966-67 maithai bleb'ha Postal department'ni Silchar Head Office'ha clerck jahi maithai sih'gejer damsai khusi dangba. Yahonha 1968 maithaiha Headmaster jahi Nabdilangting M. E. School'khe slamkhujenba. Gedemah Barman gibinlai slinghoja mamahng jahi donglaya. Baithaih, luhthai, japhnuthaihbo rehpre

odeh slingrire. Haphaikhe hamkhurimanebo bausgang baure, danglangre.

Boh rehpyabasi japhnuthaisa bangsabi. Slinghoja gedeba jahi olai lengba mithiyasi khusi dangba raobani bisinghabo gedemah laihrimin hadai phalangre. Boh sainkhali bleb'ha 1972 maithaiha 'Gdain Khurang' thihi Haflong nising Gedemah S. R. Thaosen graujma laihsi grangsi khaikhore. Boha gedemah Barman 'Baukhring' mungkhao jahng rehpheren (serial) rehpphalangre.

1978 maithaiha Gedemah Vijayananda Barman (Khemprai) noh jare. Nohbrajikni bumu Usha Rani. Gedemajik slingjenkhoni slinghojajik sausi dongba. Bonsini sik sausi, sah gni. Sik radaothao, bumu Pharmi, bobo bumalai slingjenkhoni slinghojajik; bsah radaoyaba Delon, Punjab National Bank'ni Officer sausi; gididaothaoyaba bsah jakhade Desring (Mona), bode business khlaidu.

Gedemah Vijayananda Barman 23 February, 1968 nising maithai thimjibri slinghoja jahi khusi dangbani yahonha 2002 maithaiha retired khlaire odeh Haflonghaning Surat Nagarha hayam dongyam slamhi noh danghi dongre. Retired jabani yahonha gedemah Barman Dimasa Sahitya Sabha'ni dangkhring dangyasah hamside Dimasa minjohmni daradisa (spelling formula) odeh Dimasa Text Book Evolution Sub Committeeni hoja sausi jahi khusi dangre. Slingjenkhone phorijen nising phori bonwa sosini laihsi lengba mithiyasi boning rehpkhutharbase. Phori rendoh ((class VI)ni laihsibo gedemah rehplangkha. Gedemah Barman Surath Nagarni Khunang jahibo khusi hamsisi dangsore.

Gedemah Barman boni dang yaublaini khilaihi gibin gibin yausadi, blaisandibo maikha. Slinghoja hisab jahng boni dangyaublai gedehni khilaihi gedemah Barman 1978 maithaiha Assam Sarkarni sling departmen nising 'rajini man-yausandi' yauphajaore. Dimasa Sahitya Sabha nising 2017 maithaiha manlaisandi maire odehe phin 2018 maithaiha Dimasa Sahitya Sabha Laihrimin Yausandi (Award) maire.

Gedemah Vijayananda Barman (Khemprai) rehpyabasi laihsibuthu edehe -

1. Baohkhringdaoni Laihrepkho, 2012, Dimasa jadi somajni gibin gibin grau maiphahi rehpyaba rehpuh (essay) buthuni gathaisiha johmyaba laihsi, rehphmin roman, khaikhoyah - rehpyahsa jar, Haflong, Dima Hasao.
2. Yaowaiphabayaba Dhormo odeh Somajni Graohha, 2016, Dimasa jadini dhormo odeh yawairimin maiphahi rehpyaba, khaikhoba rehpyahsa jar, Haflong, Dima Hasao.
3. Dimasa Graoh Gonhai odeh Hadaislingyaba (A text book of Grammar of Dimasa Language), 2018; khaikhoba Dimasa Sahitya Sabha, Haflong - 788819, Dima Hasao, Assam.

4. Dima-rajaraoni Haganthi-Diganthi-Daohgari (Kosai seh/ Part - I), March, 2018, khaikhoyah rehpyahsa jar, Haflong, Dima Hasao.
5. Dima-rajaraoni Haganthi-Diganthi-Daohgari (Kosai gni/ Part - II), March, 2018, khaikhoyah rehpyahsa jar, Haflong, Dima Hasao.
6. Gdani Hinduraoni Kharimin Gra, 2019, eboh thaihslaiyaba laihsi, khaikhoba - rehpyahsa jar, Surath Nagar, Haflong, Dima Hasao.

Gibin gibin Laihsi baigoyahi thaoyababuthu :

1. Dima-Raja Jashonarayan (Jarimingnang Japhnuthaih).
2. Raja Harish Chandra Narayan (Jarimingnang Japhnuthaih).
3. Hamyagri-Thaoyagri (Samajik Japhnuthaih).
4. Vir Sambhudhan (Jarimingnang Japhnuthaih).
5. Karnarjun (Mohabharat'ni kharmin maiphahi Japhnuthaih).


Ebohbutuni basauhabo Gedemah Vijayananda Barman (Khemprai) rehpyaba rehpu (essay) dongkhlidukho.

Elai yaublai mjang gnang Gedemah Vijayananda Barman Khemprai Haflongha dambra gare 11 September, 2019 maithaiha.

Eboh sauriminsakhke rehpkhuba Biswajoyoti Barman, Rehpsaikhusgao, KHURANG, Dimasa Sahitya Sabhani laihsjab.

Rehpkhring Kumud Chandra Bodo

Gedemah Kumud Chandra Bodo Dimajadini odeh duhani grau Dimani laihrimin saukholikhe slamkhuyaraoha rensngngni rehpkhring sausi sining niya Dimasa somajni sausi baugang bauhoja odeh somajni khusi dangyahsabo. Dimasa somajni sauha dinibo jing boni yaublai nuba maidu. Hamside Dimajadikhe dhormoni habah-ha Gedemah Bodo daukhuslamma naiyaraoha bauhoja, danghoja dongba.



Gedemah Kumud Chandra Bodo Dima Hasao (sgangni N. C. Hills) ni Masab nohlaiha hajaiba, tarik 01-05-1944. Dambra gaba 13 June, 2012. Buphani bumu Khired Kanta Bodo, bumah Shyamala. Bonsini nohkhori laihsi laiibra slingmani odeh gibin hadam slamkhudaomani bauthai jahng 1950 maithaiha Lanka haphai Natun Panchbhandar nohlaiha jaihlange. Gedemah Bodo Lanka-ni Barman Pathar Slingjenkhoha phoribani yahonha Lanka High School nising matric pass khlaire odehe Shillong-ni Saint Anthony's College nising Pre University pass khlaire. B.A. pass khlaire Nogaon-ni A.D.P. College nising. Gedemah Lanka haphaini Machaga M.E. Schoolkhe slamkhure. Gedemahning boh slingkhohni slamkhujenyah (founding) head master. Elai slinghojani khusi majangkhe dangre 2002 engraji maithai sohsi.

Gedemah noh jare 1972 maithaiha. Nohbarajikni bumu Sabitri Bodo (Hafila sengphong bisik, julu Mihyungma Gedeba). Bonsini bisik bonwa odeh bsah gni. Bonsi jakhade Mungmajangdi Sujala Bodo, Munmajang Bhaskarjyoti Bodo, Dr. Suphala Bodo, Mungmajangdi Tilo Bodo, Mungmajang Mukut Bodo, Mungmajangdi Mili Bodo odeh Mungmajangdi Birili Bodo. Sah sik thuha radaothaoyaba Sujala Maibang H.S.Schoolni Principal, Bhaskar Dipu Govt. Collegeni Professor, Suphala daktar odehe gididothaoyaba Birili APDCLni Asstt. Engineer.

Gedemah rehpyaba laihsi grau Dima odeh grau Asum jahng. Jarni bumu jahng odeh mungkhao 'Munggridao' bumu jahng rehpre. Boni rehpthaih buthuni grau thubi. Bthaih khonthai odeh rilithai chaondo mjangbi, phorithaobi. Dimasa somaj, jadi odeh dhormo jahng dophayaba rehpthai odeh thairilining bangdao. Phoriansa dongba sainkhali nisingning gedemah rehpbha khakhubaha yaublai phnuphabuba. IXha phoriba sainkhaliha school magazine 'Riwongni' ni rehphoja jamaiba. Boh rehpyaba thairili baigojenre Bodo Sahitya Sabhani journal 'Bodo' bumuni laihibaha 1956 maithaiha. Gedemah rehpyaba laihsi

khribjahng grang khon damsi jadu. Gedemah Bodo Kapili Thirthakhe msakhuphinyaba hojakhring. Kapili Thirtha Somaj thihi hosom khaba. Nogaong Tribal Sanghanibo hoja sausi dongba. Sibarai Bosong School slamba. Gedemah Bodo Sibrai Missionkhe dausugujenba odeh somajkhe dausugu slammane danglangba. Hojai haphai Komrakataha Dimasa Sahitya Sabha khajenbaha 1999 maithaiha Gedemah eboh melni Melhojapharainbo songjaoba.

Laihrimin odeh gibin gibin habah-ha dang yaublai mjang'ni khilaihi gedemah Bodo gibin gibin manlaihsandi (felecitation) odeh manyausandi (award) odebasibo maiba bangkha. 1988 maithaiha laihrimin habbaha yaublaini khilaihi Asom Sahitya Sabha nising manlaihsandi maiba. 1997 maithaiha All Dimasa Students Association, Dimasa Mohila Samiti, 2005 maithaiha Dimasa Students Union bonsini Genereral Conference ahr Golden Jubilee mel khambaha odeh 2010 maithaiha Dimasa Writers Forum Gedemah Bodone manlaihsandi yauphaba. Gedemah Bodo maiyaba thangdaothaoba manyausandi jakhade Dimasa Sahitya Sabhani J. L. Thaosen Laihrimin Yausandi 2011. Boha dongba rahng rijing dan, manlaihsandi odeh rimsau.

Gedemah Kumud Chandra Bodo rehpyabasi laihsibuthu edehe -

1. Dima Raji Harang Gaodu, (Thaidab) 1982, eboh laihsi Dimajadini jarimin yader, M dai haithi maiphahi rehpyaba. Khaikhoba Lanka Tribal Cultural Centre (LTCC), Lanka. Rehpmin Assamese, grao - Dima.
2. Hangslikmah, 1983.(Thairili), Khaikhoba L. T. C. C., Lanka, Nogaon. Rehpmin Assamese. Thairili laihsi.
3. Kapili Thirtha Vol. I, 1983, Grau Asum jahng rehpyaba Panimur, Kapili Thirthani jarimin laihsi, khaikhoba Kapili Thirtho Somaj, Panimur.
4. Dimasani Dara, 1984, Dimasani Dara Disani laihsi, rehpmin Assamese, grau Dima.
5. Mudi, 1984, Thairili laihsisa, rehpmin Assamese, khaikhoba L. T. C. C., Lanka, Nogaon.
6. Horaolim, 1984, Horaolim dhormoni graukhe thairili jahng phlayaba laihsi.
7. Kapili Thirtha, Vol. II, 1994, grau Asum, khaikhoba Reception Committee, 1994, Kapili Thirtha Holy Bath.
8. Sibrai, 1985, Sibrai bihthaini Thairili laihsisa, khaikhoba - Sibrai Mission, Lanka, Nogaon.
9. Horaolim Dharma (Assamese), 1985

10. Horaolim Barai Sibarai, 1985
 11. Horaolim (Danghojani grauthai), Panimur, 1990
 12. Faugun Badainni Yausandi, 1996, rehpmín Assamese, grau Dima jahng thairili laihsi, khaikhoba Sainyader Reb Hosom, Lanka, Nogaon.
 13. Sainyader, 1996, rehpmín Assamese, thairili laihsi, khaikhoba Sainyader Laihridim Haba, Lanka, Nogaon.
 14. Thairili, 1997, rehpmín Assamese, thairili laihsi, khaikhoba Sainyader Lairimin Haba, Lanka, Nogaon.
 15. Maimu, 1997, rehpmín Assamese, thairili laihsi, khaikhoba Sainyader Lairimin Haba, Lanka, Nogaon.
 16. Khunang, 1998, rehpmín Assamese, grau Dima jahng thairili laihsi, dhormokhe dosa rusa khilaihi slamkhune rehpyaba, khaikhoba Dimasa Lairimin Haba, Lanka, Nogaon.
 17. Dimu, 1998, grau Dima jahng rehpyaba dhormoni laihsi, rehpmín Assamese.
 18. Horaolim Dhormo, 2002, dhormoni laihsi.
 19. Horaolim Rimfong Dimu (Assamese odeh Dimasa bilingual), 2002, dhormoni laihsi.
 20. Rimfong Dimani Yaderma, 2005, Horaolim dhormoni graukhe rehpyaba laihsi.
- Eboh buthuni basauhabo Gedemah Kumud Chandra Bodosa gibin gibin rehpuh (essay) rehpkhakho. Gedemah rehpyabasi laihsi Assamese rehpmín jahng bangdao.

Eboh sauriminsakhke rehpkhuba Biswajoyoti Barman, Rehpsaikhusgao, KHURANG, Dimasa Sahitya Sabhani laihjab.

Rehpkhring Phanindra Jahari

Sau khongsihaning officer gede odeh laihrimin rehpkhring Gedemah Phanindra Jahari. Jarni ranphathai odeh dang yaublaih jahng bakhla nising judaothao sosi gakhuhibani daugari khongsi Gedemah Jahari. Jathai hungthai boni danglamakhe gaphingphubagrih.



Raohasi khah bolmah gngang Gedemah Phanindra Jahari Dima Hasao zila (sgang'ni N. C. Hills)-ni Kalachand rogong'ni Muphanagar nohlaiha hajaiba sain seh January, 1945 maithaiha. Bupha Kishacharan Jahari, bumah Nanaidi. Ansa sainkhalikhe gedemah P. Jahari Bonlaihdisa nohlaiha phlaire.

Gedemah Phanindra Jahari slingkhoha laihsi phoribaha blaibani bumu jaba. 1962 maithaiha Matriculationha 71% marks maihi pass khlaire. Sanskrit odeh Mathematics-ha letter marks maire ahr National Scholarship rijaore. Boh sainkhalihai elai hamhi pass khlaiba gbangning sehngbi.

Matric pass jahining gedemah Jahari 1962 maithaiha N.C.Hills Autonomous District Council'ha Lower Division Assistant jahi chakhriha habre odeh Haflong College'ni horni shift'ha phorisengmane gbahre. B.A. pass khlaire 1966 maithaiha.

Phoriba chakhri dangbani bisinghabo Gedemah Jahari hoja jahi phoriansaraoni odeh somajni khusi dangphalangrekho. 1960 ha Haflong Govt. High School odeh 1965 ha Haflong Govt. Collegeni Phoriansa Union'ni General Secretary jare. Ebobuthuni basauha Diyungbra High School, Maibabg Degree College'ni Secretary odeh Haflong District Sports Association'ni Asstt. Secretary jarekho. 1965 maithaiha Dimasa Students Union'nibo President jaba.

Eboh joraha Gedemah Phanindra Jahari jukhure 1972 maithaiha. Bihini bumu Nilima. Boh slingkhoni slinghojajik sausi dongba. Bonsini sah sausi, sik gni. Bsah Partha Sarathi Jahari, B.A., A.C.S., Assam sorkarni officer gede sausi. Bisik langjer Nivedita Jahari, B.A. Hons, ICDSni Supervisor. Bisik gidi Sanghamitra Jahari Women College, Silchar-ni History Department'ni Asstt. Professor.

Gedemah Jahari N.C.Hills Autonomous District Council'haning gibin gibin officer post'ha chakri dangbane barabo deputation vacancy'ha Assam sorkarni N.C.Hills'ni Sub-Divisional Information and Publicity Officer jahire maithai sih damsai. Yahunha 1970 maithaiha N.C.Hills Autonomous District Council'ha Asstt. Revenue Officer jahi gidingphinre. Eboni

yahonha yahon phinyahi gedemah Jahari Autonomous District Council'ni givin givin judao judao post'ha chakhri dangbaha Autonomous District Council Court'ni Judge'bo jarekho. Yathonhao 1987 maithaiha N.C.Hills Autonomous District Council'ni Principal Secretary (Normal) jahi 2002 maithaiha chakhri nising retired jare.

Elai khusi raobani bisinghabo Gedemah Phanindra Jahari givin laihsi laihsbra odeh laihrimin hadaiphalangre. Odejahng boni rehpgong nising givin givin laihsi baigophaire. Gedemah rehpyabasibuthu thaislaiyaba odeh dhormo jahng daophayaba bangdao. Boni laihsibuthuha thangdaothaoyaba grang gni jakha- 'Dimasa Garaojang Srimad Bhagavat Geeta' odeh 'Garaothai ni Phandar' - Dimasa nising English thaihseb (Dictionary). Laihrimin habah-ha rehpyaublaini khilaihi Gedemah Phanindra Jahari 2016 maithaiha Assam Sarkami Literary Pension maiba. Dimasa Sahitya Sabhabo 2017 maithaiha gedemahne manlekha yausandi yauphaba.

Gedemah Phanindra Jahari rehpyabasi laihsibuthu edehe -

1. Dimasa Garaojang Ramkrishna Upanishad, 2009, Sri Rajagopalachari rehpyabakhe grau Dima jahng thaislaiyaba laihsi, khaikhoba rehpyahsa jar, Haflong - 788819.
2. Kalika Puranni Shiva ni Kharmin, 2009, thaislaiyaba laihsi, khaikhoba - Nilima Jahari, Gdain Razi, Haflong - 788819.
3. Dimasa Graojang Srimad Bhagavat Geeta, 2009, thaislaiyaba laihsi, khaokhoba - rehpyahsa jar, Gdain Razi, Haflong - 788819.
4. Garaothai ni Phandar, Garao Dima nising English, 2010, eboh thaihseb (dictionary) laihsi, khaikhoyah - Phanindra Jahari, Gdain Raji, Haflong - 788819, Dima Hasao, Assam.
5. Ansaraoneh Kharminsah, 2016, Sanskrit lairiminni 'Kathasaritsagar'ni kharminbuthukhe grau Dima jahng thaislaiyaba, khaikhoba Dimasa Sahitya Sabha, Haflong - 788819, Dima Hasao, Haflong.
6. Geeta ni Muima ode Geeta Phuribani Yaublai, 2018, khaikhoba - rehpyahsa jar, Haflong - 788819, Dima Hasao, Assam.

Ebohbutuni basauhabo Gedemah Phanindra Jahari givin givin rehpuh (essay) rehpa bangbi. Hadisa kobikhring Rabindranath Tagore-ni khaisa khusu rjabthaibo grau Dima jahng thaislaikha.

Eboh sauriminsakhke rehpkhuba Biswajoyoti Barman, Rehpsaikhugao, KHURANG, Dimasa Sahitya Sabhani laihjab.

Rehpkhring Biswajyoti Barman (Daolagajau)

Gedemah Biswajyoti Barman Bishu thihi mithijaodao. Sengphongde Daolagajau. Phoriansa dongba sainkhali nisingning Dimasani laihrimin habbaha laihrimin hadaisong hadaihi phaire. Odejahng grau Dimani laihrimin habah-ha khrib jahng mithijaoyaba sausi. Jar rehplaba phaihlaba sining niya, gibinkhebo grau Dima jahng rehpmene khajarire, rehpsaikhu-hoja (Editor)ni khusibo baini danghi phaidu.



Grau Dimakhe slamkhune bausong dangsong jabade boni baurim thirimha habsengbalai jalanglakha. Gedemah hajaire Cacharni jarimingnang Khaspur rajathani rogong Thaligram nohlaiha 01 September, 1953 maithaiha. Somajni khusi dangyasah Gedemah Brajendra Narayan Barman (Daolagajau)ni bsah sahgra. Bupha somajni khusi dangyahsa gede, hojakhring dongba; rajkanti habah-habo Congress'ni tribal hoja dongba. Bumah Gedemajik Dwijendu Prabha (Thaosen bisik, Yamthaidi jilik)khrib jahng manijaoyaba slingjenkhoni slinghojajik sausi dongba. Barmanni buphani gedede phagrasau rajasauha rajanokhoha 'Lekhok' graude (Hisab Rehpkhuyah) dongbane.

Eraha Thaligram nohlaini graukhe khaisa thihphahanang. Eboh nohlai gbangning gjamne. Dima rajasau nisingning dongba. Eboh nohlaini nohbro sgangha Nagadung dikhong'ni sainjroba narha dongba, duha Dimasa nohbro sainja narha dongba bangdao. Rajanokhoni lugu dophayarao dongba bangbani eboh nohlaini bumu Thalebor-gram nising Thaligram jabane. Thalebor-ni khaoli (ortho) jakhade respectable/ influential.

Ansaha Biswajyoti nohlaini slingjenkho Rajanikanta Basic School'ha phoriba. Yahunha Khaspur Krishnadhan Barman M.E.School odeh Morley High School, Salganga'ha phoriba. Boh phoriyaba Collegede Silcharni Cachar College.

College'ha phoriba sainkhali nisingning grau Dima jahng rehpre. 1972 maithai bleb'ha Khaspur Rajbari rogong Thaligram nising 'Daunaiju' bumuni laihsab grangsi baigore; boni rehphoja pharain dongba.

1975 maithaiha Sub-Divisional Welfare Board for S.T. ha clerckni chakriha gbare fixed pay-ha. 1976 maithaiha Silchar'ha Asstt. Controller of Weights and Measures Office'ha clerck'ni chakri'ha gbabore. Yahunha 1977 maithaiha All India Radio, Silchar-

ha Dimasa Programme'ha Junior grade Announcer/Compare'ni chakri maire. Boni yahonha Sr. Grade Announcer odeh yahonthao Selection Grade Announcer jare odehe 2014 DececeMBER bdainha retired khlaire.

Gedemahni chakri jahng odeh rehpbaisi jabaisi jahng bedeba jasisi miliphrekha thijare. Chakrini khusi jahng Dimasani hah khong bri daobaima maiba–nuhi slinghi rehpbaisi phaibaha boni sau-sigringbo khaisa khusu nujaoba. Haflong nising Jalairaoni Hosom khaikhoyaba Waimijing graujma laihsia rehpbaisi. Yahonha Chakri mamahng danghi donglayahi buphakhe Publiser odeh Editor slamhi odeh jar Honorary Executive Editor jahi Kolongma thihi dain gaphrong'ni graujma laihsia grangsi khaikhoba. August, 1984 nising February, 1988 sosi eboh Kolongma baigosongre. Yahonha boni thihlahining Jalai Khurang thihi 1993 maithaiha Silchar-ha chaphaihi, Haflong nising basain jra-ni graujma laihsia grangsi khaikoyabanibo Honorary Executive Editor jarekho. Boh joraha Haflong Information & Public Relation nising khaikhoyaba Hasao Publi-habo boh rehpbaisi. Chakrini habah-habo Youth Prog., Radio Magazine Prog., Radio Literary Prog. khe jar jenhi naisoba, dangsoba.

Jukhubani graukhe thihyakhabo soyalai jalangbonang, jukhure 1988 maithaiha. Nobrajikni bumu Chinu Rani (Hojaisa bisik, Miyungmah Gedeba jilik, Dimaraja Lakshmichandra-ni rani Udayavati nising yeryaba). Bonsini bsah gni. Radaoyaba Ayan, Electronics & Communication'ha B. Tech, gidiyaba Avik, CBSE 12 pass jahi phoridukho.

Mlauthai mnithai habahni graukhe thihma thikhade hamsi ansaha football mlaokhabo bode indoor games mlaubaning bangdao. Carrom odeh Chess mlauba hamsi khajadaore. 1989 maithaiha Silchar DSA-ni Annual Sports-ha Chess mlaubaha District Runner-up jaba. Ansaha masi magni Dramaha acting khlaikha. Poem recitation khlaiba baisi.

Hosom smani graukhe thihma thikhaha ansa sainkhali nisingning Dimasa jadini hosom gibin gibinni hojalai jahi phaiba. Phoriansa dongba sainkhaliha Khaspur Dimacha Chatra Samitini Danghoja dongba. Yahonha Dimasa Sanskriti Parishad, Silchar; Nikhil Cachar Haidimba Barman Samiti, Dimasa Historical Heritage Foundation, Silchar odeh Dimasa Sahitya Sabhanibo hoja jare. 1999 maithaiha Dimasa Sahitya Sabha (DSS)ni khajenyaba dangbosong johmni Joint General Secretary songjaoba. Eboni yahonha DSSni Cachar Zila Johmni President 2008 maithaiha odehe DSSni dangjohmsgaoni Vice President odeh 2016 maithaiha DSS dangjohmsgaoni President songjaoba. Duha DSS dangjohmsgao'ni odeh Dimasa Sanskriti Parishad, Silcharni Sibringhoja. Eboni basauha duha DSSni journal Khurang' nibo Rehpsaikusgao (Chief Editor).

Gibin gibin hosom salaiyaba graukhisai-mel (seminar), literary festivals buthuha joyah odeh thairili phoriyah jahi gbahikha. Boh buthuha thangdaoba jakhade Assam University, Silchar, Tripura University odeh Sahitya Akademy salaiyaba Seminar odeh

North Eastern Literary Festivals.

Gedemah Biswajyoti gibin gibin hosom nising duh sosiha alang sni damsi manyausandi, award odebasi yauphajaokha. Boh buthuha thangdaoba jakhade - Dwiralap Smarak, 2015, Barak Upotyoka Bongo Sahitya Sanskriti o Sanmelon ar DSSni manyausandi odehe 2017 maithaiha maiyaba Assam Sarkar'ni Literary Pension odebasi.

Duh sosiha gedemahni yau jahi grang khonseh damsi laihsi baigokha. Boh buthu edehe -

Baigoyabasi Laihsi :

1. Thanggamin (Book of poems), 2009, Bangla rehpmi jahng chhaphaiyaba eboh laihsikhe khaikhoba Chinu Rani Barman, Silchar, Cachar, Assam.
2. Dimasa Vir Kingbadanti Purus Sambhudhan Phonglo : Uttar Purbanchaler Ekti Anyatama Jagoron 'Vir Dimasa Kharimingnang Sambhudhan Phonglo : Sainkhlip Sainja Haphaini Smaokhumin Khongsi (A bilingual research Book in Dimasa and Bengali language on Dimasa Freedom Fighter Sambhudhan Phonglo), 2013, khaikhoba Dimasa Sahitya Sabha, Haflong - 788819, Dist. Dima Hasao, Assam.
3. Rmauthairili (Collection of poems), 2016, khaikhoba - Chinu Rani Barman, Barbhuiya Lane, Rongpur Pt. IV, PIN - 788009, Cachar, Assam.
4. Graodimajahng Rabindra Thairili (Translation of Rabindranath Tagore's selected poems and songs of Geetanjali in Dimasa), 2017, Dimasa Sahitya Sabha, Haflong - 788819, Dima Hasao.
5. Maibang-Khaspur-ni Jarimin Odehe Gibin Gibin Grao (Collection of self written essays), 2017, khaikhoyah - Biswajyoti Barman, Barbhuiya Lane, Rongpur Pt. IV, PIN - 788009, Cachar, Assam.

Laihsi Editing odeh Compiled khilaiyaba :

1. Dimarajar Bongshaboli (written by - Joykumar Rajiyung Barman), 2014, Khaikhoba Dimasa Sahitya Sabha, Haflong -788819, Dist. Dima Hasao, Assam.
2. Ansaraoneh Kharminsah (Tales of Kathasaritsagar, Translated by Phanindra Jahari), 2016, khaikhoba Dimasa Sahitya Sabha, Haflong -788819, Dist. Dima Hasao, Assam.

3. Dimasa Rjabthaihgrah-Rjabkharmin odehe Murithaih (A Compilaion of Dimasa Folk Songs, Ballads and Murithaihs), 2018. Khaikhoba Dimasa Sahitya Sabha, Haflong - 788819, Dist. Dima Hasao, Assam.
4. Dimasa Khuhrgai Kharmin (Jabkhu Seh), (Dimasa Folktales, Vol. I), 2019, Khaikhoba Dimasa Sahitya Sabha, Haflong -788819, Dist. Dima Hasao, Assam.
5. Khabaih Kharmin (A compilation of Modern Dimasa Short Stories of different story writers) 2019. Khaikhoba Dimasa Sahitya Sabha, Haflong -788819, Dist. Dima Hasao, Assam.

Editing khlayabasi Souvenir odeh Magazines :

1. Rmaulaih (Souvenir of Nikhil Cachar Haidimba Barman Samiti, 48th Joypur Sivastan Conference), 2006.
2. Sadeema (A little mag. of Dimasa Sahitya Sabha, Cachar District Committee), 2009.
3. Khurang (The Voice, A journal of Dimasa Sahitya Sabha, Central Committee), Vol.I, 2011; Khurang, Vol. II, 2014; Khurang, Vol. III, 2015; Khurang, Vol. IV, 2016; Khurang, Vol. V, 2017; Khurang, Vol. VI, 2018; Khurang, Vol.VII, 2019, Vol. VIII, 2020.
4. Compiled a Souvenir booklet on the occasion of unveiling the staue of Late Nandalal Barman (Milaopha), a great visonary. Published in 2015.

Ebobuthuni basauha dubo rehppha langyabayaba thairili odeh rehpuh gibin gibin laihsiha johmhi khaikhoyahi dongba bangsabikho.

*Dongsengyaba : I***Dimasa Kharmin Dongphayaba odeh Gibim jahngyaba
Dimasa Kharmin Laihsi**

1. A Historical Account of the Kachari Tribes of North Cachar Hills : With Speciman of Tales and Folk-lore, 1885, C. A. Soppit, Shillong. Eboha maji damsi kharmin dong. (English).
2. Tribal Folk Tales of Assam, 1970, S. N. Barkataki, Gauhati. Eboh 1982 ha reprint jaba. Eboha 11 (majiseh) Dimasa Kharmin dongphadu. (English).
3. Dimasa Deshor Sadhu, 1973, Nagendra Nath Barua, Gauhati. Eboha 16 (majido) Dimasa Kharmin dong. Boha Sambhudhanni graukhebo Kharmin (Folk tale) lai rehphadu. (Assamese).
4. Dimasa Anvesa, 1996, Zahid Ahmed Tapadar, Haflong, eboha 10 (maji) maji Dimasa Kharmin dongphadu. (Bengali).
5. Dimasa Lokkotha, 1996, Zahid Ahmed Tapadar, Haflong, eboha Assamphani kharmin laphahi khrib jahng maji kharmin dong. (Bengali).
6. Dimasa Sadhu Katha, 1998, Nirupama Hagjer, Guwahati, eboha 14 (majibri) Dimasa Kharmin dong. (Assamese).
7. Dimasa Lokokathayen, 1998, Awadesh Kumar Mishra, Silchar, eboha Assamphanikhe laphahi 19 (majisguh) Dimasa kharmin dong. (Hindi).
8. Dimasa Lokkotha, 2004, Nayan Medhi, Haflong, eboh Zahid Ahmed Tapadar rehpkhuyabakhe thaislaiyaba, (Assamese).
9. Sabuj Desher Lokokatha, 2006, Zahid Ahmed Tapadar, Haflong. Eboha Dimasa kaharmin 06 (madoh) dongphadu, (Bengali).
10. Dimasa Loka Sadhu Sangraha, 2008, Bhisma Ram Barman (Dawdong Langtha), Hazagapher Village, eboha majibri Dimasa Kharmin dong, (Assamese).
11. Dimasa Lok-katha, 2015, Ashok Verma, Silchar, eboh Awadesh Kumar Mishra rehpkhuyabakhe thaislaiyaba, (Bengali).
12. Dimasa Khuhrgai Kharmin (Jabkhu Seh), 2019, givin givin Dimasa rehpkhuyabakhe jabkhuyaba (compiled) kharmin laihsi, jabkhuba Biswajyoti Barman (Daolagajau), eboha 21 (makhonseh) Dimasa kharmin dong, (Dimasa).

Dongsengyaba : II**Duha Sohsiha Dimasa Sahitya Sabha Khaikhoyaba Laihsi**

Dimasa Sahitya Sabha (DSS) duha sosiha bangya thihkhabao rmaulai, slingkhohni phorilaihsi, laihsjab (journal), gibin gibin laihsi dongbasi jahnag khrib jahng 35 (thimjibonwa) mamangde khaikhokha.

DSS dangjohmsgauni General Meeting Guwahatiha jayabakhe mamahng garhi gejesi General Meeting buthuha khrib jahng grang jaih Rmaulaih (Souvenir) baigokha.

Slingjenkhoha phoririmane khrib jahng grang bonwa laihsi duha sohsiha khaikhorikha.

KHURANG laihsjab (Journal) khrib jahng grang jaih duha sosiha baigokha.

Eboni basauha duha sosiha bakhlaha rehpbalai gibin gibin laihsi khaikhokhakho. Boh buthu edehe -

1. **Dimasa Vir Kingbadanti Purus Sambhudhan Phonglo : Uttar Purbanchaler Ekti Anyatama Jagoron) 'Vir Dimasa Kharimingnang Sambhudhan Phonglo : Sainkhlip Sainja Haphaini Smaokhumin Khongsi** (A bilingual research Book on Dimasa Freedom Fighter Sambhudhan Phonglo), 2013, Rehpb - Biswajyoti Barman (Daolagajau). Rehpmn Bangla odeh Roman rehpmn jahng.
2. **Dima Rajar Bongshaboli, Dima Rajaraoni Bongso Beren**, Bilingual, 2014 (Reprint) Rehpb - Joykumar Rajiyung Barman, Grau Dimajahng thaislaiba odeh Rehpsaikhuba - Biswajyoti Barman (Daolagajau). Bangla odeh grau Dima jahng.
3. **Thairili Thangamin, 2014**, grau Dimani thairili johmkhuyaba laihsi, johmkhuba - Gopal Bhargov Thaosen.
4. **Ansaraoneh Kharminsah (Tales of Kathasaritsagar), 2016**, grau Dimaha thaislaiba Phanindra Jahari, Rehpsaikhuba - Biswajyoti Barman (Daolagajau).
5. **Graodimajahng Rabindra Thairili** (Rabindranath Tagore-ni saikhuyaba Thairili odeh Rjabthaike grau Dimajahng thaislaiyaba), 2017, Thaislaiba - Biswajyoti Barman (Daolagajau).
6. **Dimasa Rjabthaihgrah-Rjabkharmin odeh Murithaih** (Dimasa rjabthaihgrah, Rjabkharmin odeh Murithaih johmkhuyaba laihsi), 2018, Johmkhuyah - Biswajyoti Barman (Daolagajau).

Dongsengyaba : II**Duha Sohsiha Dimasa Sahitya Sabha Khaikhoyaba Laihsi**

Dimasa Sahitya Sabha (DSS) duha sosiha bangya thihkhabao rmaulai, slingkhohni phorilaihsi, laihsjab (journal), gibin gibin laihsi dongbasi jahng khrib jahng 35 (thimjibonwa) mamangde khaikhokha.

DSS dangjohmsgauni General Meeting Guwahatiha jayabakhe mamahng garhi gejesi General Meeting buthuha khrib jahng grang jaih Rmaulaih (Souvenir) baigokha.

Slingjenkhoha phoririmane khrib jahng grang bonwa laihsi duha sohsiha khaikhokha.

KHURANG laihsjab (Journal) khrib jahng grang jaih duha sosiha baigokha.

Ehoni basauha duha sosiha bakhlaha rehpbalai gibin gibin laihsi khaikhokhakho. Boh buthu edehe -

1. **Dimasa Vir Kingbadanti Purus Sambhudhan Phonglo : Uttar Purbanchaler Ekti Anyatama Jagoron** 'Vir Dimasa Khariminguang Sambhudhan Phonglo : Sainkhilip Sainja Haphaini Smaokhumin Khongsi (A bilingual research Book on Dimasa Freedom Fighter Sambhudhan Phonglo), 2013, Rehpb - Biswajyoti Barman (Daolagajau). Rehpmn Bangla odeh Roman rehpmn jahng.
2. **Dima Rajar Bongshaboli, Dima Rajaraoni Bongso Beren**, Bilingual, 2014 (Reprint) Rehpb - Joykumar Rajiyung Barman, Grau Dimajahng thaislaiba odeh Rehpsaikhuba - Biswajyoti Barman (Daolagajau). Bangla odeh grau Dima jahng.
3. **Thairili Thangamin**, 2014, grau Dimani thairili johmkhuyaba laihsi, johmkhuba - Gopal Bhargov Thaosen.
4. **Ansaraoneh Kharminsah (Tales of Kathasaritsagar)**, 2016, grau Dimaha thaislaiba Phanindra Jahari, Rehpsaikhuba - Biswajyoti Barman (Daolagajau).
5. **Graodimajahng Rabindra Thairili** (Rabindranath Tagore-ni saikhuyaba Thairili odeh Rjabthaike grau Dimajahng thaislayaba), 2017, Thaislaiba - Biswajyoti Barman (Daolagajau).
6. **Dimasa Rjabthaihgrah-Rjabkharmin odeh Murithaih** (Dimasa rjabthaihgrah, Rjabkharmin odeh Murithaih johmkhuyaba laihsi), 2018, Johmkhuyah - Biswajyoti Barman (Daolagajau).

7. **Dimasa Graoh Gonthaih, 2018**, Rehpba - Vijayananda Kemprai (Barman).
8. **Dimasa Khubrgai Kharmin (Jabkhusch), 2019**, Dimasa kharmin (Folk Tales) buthukhe johmkhuyaba laihsi, Johmkhuba - Biswajyoti Barman (Daolagajau).
9. **Khabaih Kharmin (Dimasa Kharmin Gdain Jabkhujohtmlaih) - 2019**, Johmkhuyah - Biswajyoti Barman (Daolagajau).

Dimasa Sahitya Sabhani gibin gibin zila johmbo rmaulai odeh laihsi khaisa khusu khaikhokha. Olai khaikhoyahrao jakhade Cachar Zila Johm, Karbi Anglong Zila Johm odeh Nogaon Zila Johm. Cachar Zila Johmde rmaulaihke garhi gibin laihsi khaikhokhakho. Boh buthukhe bakhala rehpdud.

1. **Sadeema, 2014**, laihsabsah, little mag. , Rehphojasgao Biswajyoti Barman, khaikhoba Dimasa Sahitya Sabha (DSS), Cachar Zila Johm
2. **Khani Thaophari, 2014**, Thairili laihsi, Rehpba Mohanjoy Barman (Hojai), DSS Cachar Zila Johmni bumu phnanghi laihsikhe khaikhoriba boh sainkhaliha DSSni melhoja dongyaba Gedemah B.B.Hagjer. Laihsiha khaikhobani tarik saphaiphaya. Laihsi Bangla rehpmmin jahng. Saphaiba Guwahatiha.
3. **Japhnu'thaisah, 2014**, Grau Dima jahng playlet laihsi, rehpbba - Sudhir Chandra Barman (Langthasa), DSS Cachar zila johmni bumu phnanghi laihsikhe khaikhoriba boh sainkhaliha DSSni melhoja dongyaba Gedemah B. B. Hagjer. Laihsiha khaikhobani tarik saphaiphaya. Laihsi Bangla rehpmmin jahng. Saphaiba Guwahatiha.



DIMASA LAIHSI REHPYAHRAO



Sonaram Thaosan



Nirupama Hagjer



Jatindralal Thaosan



**Uttam Chand Barman
(Hagjer)**



Anupama Naiding



**Vijayananda Barman
(Khemprai)**



Kumud Chandra Bodo



Phanindra Jahari



**Biswajyoti Barman
(Daolagajau)**

BARPATHAR EXCAVATION-KHE NAISOHIBA



Dimasa Sahitya Sabha (DSS) ni dangjohmsgaoni Melhoja Gedemah Dinendra Thaosen hoja jahi odehe DSSni givin givin zila johm-ni khrib jahng subung jisehni buthu masi 16 March, 2019 Golaghat zilani Barpathar excavation-khe nailaihibani odeh gbai-gojoni givin gibinni photo. Erani saukholi ahr gbai-gojo buthukhe 7th Centuryni Kachari kingdom-ni janaidu thihi baulaidu. Photo buthukhe haiba Haflongni Gedemah Surjyo Thaosen.